


Sorunu Kaläg na Ikä
Caning



Caning Bible Translation

Sorunu Kaläg na Ikä Caning

Caning Bible Translation

copyright © 2018 Pioneer Bible Translators

Language: Shatt

Contributor: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files dated 29 Jan 2022
2b40784a-4366-56e0-9a60-47746d31e227

Contents

Luka	1
----------------	---

Inycil Luka

Täländiccä Legeygi tä Kaxsä Sorunongang

Sorunu Luka näka Luka me dāx biskonu me kälägä Poläs garekärejeyang. Luka garekärejey sorunong ta apangza ngondey säbangäs Tiyaflus. Luka paye Tiyaflus bale legednicc tä ngakä Yasuwa appoyo.

Ma Luka mändey mäpaye kän tä ota kä'day ndey bale zänggä nga tä legednicc ka xänang näs Yasuwa Almasiyang. Luka lapedäng ka yaxsäwecca apo tä ngakä Yasuwa näkä kän kä'dayang dacadas Yaxudiny na känggi näs Yaxudiny songang, kängga sogo ngaka tasiny na känggi apoccong, menggä wiy na känggi wegka tängang.

Sorunu Luka lapedäng ngaki Yasuwa kangad na kasogkang ndey sog kän bale akäsogi Kaläg xonyo kän täng tä ngaka tasiny. Sorunong lege ngakä aygä Yasuwa cawu xongondi musku siyäma tängang basa xongondi mägämel tiyating.

Luka togodäng bandagä nga tä ngakä yänakä Yoxana me Pac na yänakä Yasuwa. Bandagä ngakenegi lapedäng ka Yasuwang näs me yaxsäwecci Kaläg kadästäkog ka yaxsedängang. Sorunong koyo yaxsäwecca nake tädäxiny tä ngakä Yasuwa, packäma na 'dongädäma na zägädäniccäma, Yasuwa na menggä räbke, wexekä Yasuwa, bäldeygä Yasuwa tä kän, menekäma, gadeygäma tä kalic, xäskäma na ngäsakäma tä xäs.

Läpidänic

¹ Kän mange käsäkädä dackä ngakä wexeki kasogäning na kä'desesäning tä warogkang tä räbäne kä'day, ² winy ka'das luguki känggi wexe ngakä Kaläg na koxtu nga na aga ndä lugung tä kogkang. ³ Nyenyan agänang na ngasang karäbtä ngakä weg kä'day appoyo tä debic ndä oxowa apo ka agä mändey anggärejey bandagä räbäne tägi käxa ngondey Tiyaflus, ⁴ ndey ka gi bale zänggä ngakä wegki kaläpesäning tä giningang.

Duwalegä Iyänakä Yoxana

⁵ Tä butugku Xirudus buguningzä Yaxudiya, me tämed tä Kaläggkandäng age ka Zakariya näs wayagkä menggä tämed tä Kaläg tä udsa säbangäs Abija. Ndä uxumandäng age ka Alizapad näs caxsä Xarunag. ⁶ Pädaxkäsa sälexexiny tagä Kaläg ndä sämene ngakä täsediccä Kaläg kä'day na akäsogi Kaläg payis känang appoyo. ⁷ Ndä pipindäng täsa säxong xa uxuma Alizapad pixing, ndä sa pädaxkäsa saboxso.

⁸ Xongonendäng Zakariya na udsä menggä wexeki kamen wexetang, kamen wexekä tämed tä Kaläg. ⁹ Na 'dodony* kadel täma täbangä tanyaranä menggä tämed tä Kaläg ka mä'doc taxä tämekä tedeldäkä Kaläg tä lägoygä mäsäs. ¹⁰ Ani mägä'doccus tä lägoygä mäsäsang, kulung känggi tängang kapasäning tunyu palacca.

¹¹ Na kala malayikanä Kaläggkandäng kawayasa täma dokolo tandä abanic täwang tumunu lägoygä mäsäs. ¹² Na todi Zakariya kox malayika na nyigatäg kamen ma mädätägä.

¹³ Na malayika ngade täma ka, "Zakariya, wanga nyigatäg xa Kaläg kädäng paleygägi. Uxugi Alizapad 'do yedäng päxä apang tägi ndä gi

* 1:9 Mändey säbangäs "curungguduni."

n'doco dogada age ka Yoxana. ¹⁴ Ma mäsogo wanägi laye tidi, ndä kän mange lededäning xa sägäyäng ma, ¹⁵ ndä ma mälayis käxa tädäx na apo tagä Bazuwec. Ndä mäwuxi bux säxong, na mändey wuxiki 'dazic tängang mäwuxi säxong. Ma mälayis käxa päsewa na Ligidä Kaläg cawu cukuma tä bälegkä bosa. ¹⁶ Ma mämelede menggä Israyil mange ta Bazuwec Kaläg. ¹⁷ Ma mälayis käxa päccada tagä Bazuwec na panggu kala panggudugku me logey Iliya ndey mäwex mäganygä menggäsa ndey laley enggengga, na menggä ko'do mäwexe mäganyga ndey nyangädä leleertäggä däppic ndey mäbolasa kän tä benggä Bazuwec."

¹⁸ Na Zakariya kamänze ka, "Agä asogowa key ndey abäle ka ngakong layecänäs tireneng? Xa agä kaboxsu ndä uxang kaboxsu mändey."

¹⁹ Malayika kabuc ka, "Agänang anäs Jiprayil. Agä awede tä cuku Kaläg ndä Kaläg kayaxsä agä ka agä awung alegeyze tägi agoying yaxsäweccong apong tägi. ²⁰ Ndä gang nyäpäladas gi legecce säxong, basa xongondi ngakong sogoduning tängang, xa gi kämen ngakang säxong, ndä kăcag wunosuno layeccänäs tire tä xongondi tängang."

²¹ Ndä kănatäng bene Zakariya tunyu mänedäning ka oxadi siye Zakariya kalaygädä taxä tämeki tedelang mänang. ²² Na kala mawetä tunyu ndä ikäma kaxsäwa mäyex legey täsa säxong, na todi sabäle ka mägox nimic tä cukuma taxä tedeläccä Kaläg, malewa na läläbey yä mäyex legey säxong. ²³ Kala wexekäma käpeläning na mägämele tä pa.

²⁴ Na kala todi uxuma Alizapad koxsonga kăcatäng asämeny mädäg 'da'danyewa. ²⁵ Cängade ka, "Kaläggkang kawex ngakong tagä, tä sänggong nyaläpäng paygänya ndä nyägăcay zänggä motakang tä warä kan."

Duwalegä Iyänakä Yasuwa Almasi

²⁶ Tä asämexsi aran layis näkä oxsongdugku Alizapatang, Kaläg kayaxsä malayika Jiprayil tä cabärä Calil tä kaxsä pana säbangäs Nasra, ²⁷ ta kedenweccandäng säbangäs Mariyom sader ta apangandäng säbangäs Yusif tä caxsä Dawud. ²⁸ Na malayika kawung täce, kämodey ce ngade täce ka, "Gingang nuxundugkăgi kăbaxändey tä kănang, Kaläggkang nagi!"

²⁹ Na Mariyom kăbabangwa tä ngaki malayika kangatang, ndä căgäre bangä modeygi mänangang. ³⁰ Na kala malayika ngade täce ka, "Wanga nyigatäg Mariyom, xa Kaläg kadong baxändäg tägi! ³¹ Dănge! Gining no noxsongada ndä niyedäng päxă apang ndä dogada age ka Yasuwa. ³² Ma mälayis käxa nake tädăxiny ndä säbangäs ma päxă pe Kalăgi tiyating, ndä Bazuwec Kaläg togada butugku wawanăma Dawud tăma. ³³ Ma mämene butug tä kănggä Yaxup ndä sanydenendäng säxong, ndä butugkuma 'desetăsăno säxong."

³⁴ Mariyom ngade ta malayika ka, "Ngakong layeccă key, yă taxă nuxu kasăng na apang songang?"

³⁵ Na malayika kămeley ngade ka, "Ligidä Kaläg coccolacca tägi na panggu Kalăgi tiyating wunodung wayedäng tä bälegkăgi na asämexsăgi lada, nenyang päxă pipini niyedăngang näkä tedelang, ndä säbangäs ma päxă Kalăg. ³⁶ Ndä za, wayigo Alizapad na boxuske mändey oxsong tä päxă apang yă kän bangäs ce pixi, gang satăng täce asämeny aran! ³⁷ Ndä 'doga bede tä Kalăggkandăng song."

³⁸ Na Mariyom kăgixi ngade ka, "E, bi, anăs me wexiccă Kalăg. Wanga ngaki sogoduning tagăng layis wega tä bangă ngakigigong." Na malayika kă'doc kawangasa ce.

Mariyom na Alizapad

³⁹ Na tä sänggi Mariyom kangäsa tetex kä'doc tä kaxsä pa tä cabärä Yaxudiya, ⁴⁰ na caläs pang Zakariya na cägämodey Alizapad. ⁴¹ Na Alizapad kädäng modeygä Mariyom, na pipini tä bälegkäce Alizapatang kápäräwa, na Ligidä Kaläg kälīgä Alizapad. ⁴² Na Alizapad kasan kädäwa ka, “Kaläg kadä wanägi tä warä uxu kä'day na pähägini tä bälegkäging! ⁴³ Agänang anäs xäng kädäppa ka bo Bazuweccang wung copu agäng? ⁴⁴ Ani kandängäs modeygägi na wundangang, päxä pipinong tä bälegkangang kápäräwa na wadäkä tididäg. ⁴⁵ Gi kábaxändey xa gi kämen ngaki Kaläg kalegey tägi ka 'desetäsäningang.”

Mildä Mariyom tä Logakä Kaläg

⁴⁶ Na Mariyom ngade ka, “Mägaxsang dädäxti Kaläg, ⁴⁷ na ligidang kadeb led tä Kaläg me nayiccang, ⁴⁸ xa nyägox cuku molgang, agä me wexiccänya. Ndä ganang menggä zädong, kä'day bangäs agä käxa kabaxändey. ⁴⁹ Xa nyang nyäs Bazuwecca pädäkgang kawex wexeka ngoniny tagäng ndä agänya tedeliny. ⁵⁰ Tä menggä zong na banga, agänya watasa tä känggi nyaye nyang. ⁵¹ Nya nyawex wexeki tädäxinyang na andänya. Ndä nyawasa känggi logoduning na wexe degejeý tä mäganyganang. ⁵² Nyägäcoccoley menggä butug yä nyägäpoka känggi butug wundung tängang tiyati, ⁵³ ndä nyägämas menggä xas na weka apoccu, yä nyamatä känggi näs tanganuwang na asängga päloccu. ⁵⁴ Nyaxony menggä wexekänya Israyil xa nyanimäng agäwaydakänya, ⁵⁵ kala täseki nyadästäs wawanakogki mägaccängang, na ta Apraxim na atuge näs ur'dug.” ⁵⁶ Kala Mariyom kuccu na Alizapad ta asämenyga kodos na cägämel tä panäce.

Iyänakä Yoxana

⁵⁷ Xongondi Alizapad kiye tängang, cägiyäng päxä apang. ⁵⁸ Na menggä sogalinygäce na wayakäsa kädäng ka Kaläg kädädäxti agäwaydad täce na sägäledäno nace.

⁵⁹ Tä sänggi tespedespeng sawuno tä luwuku päxä pipi, ndä sägäpay ka sädogas agäma ka Zakariya täbangä mesa. ⁶⁰ Neng bosa kämele täsa ka, “A'a! Basa sädoga agäma ka Yoxana.”

⁶¹ Na sängadeccä täce ka, “Nuxu kigkandäng tä caxsägo age mänang song.” ⁶² Na sägertäcce ta mesa Zakariya ndey ka sä'dox aga mäpaye mädogas ta penäma.

⁶³ Na mamän owdu badaxiccä garekärejeý na mägärekärejeysa ka, “Age ka Yoxana.” Na sägädongasa kä'daygäsa. ⁶⁴ Na käccogos ikä Zakariya kalengesäwa na nyipäräma kä'dakasäwa na malegeyze, malog Kaläg.

⁶⁵ Na menggä sogalinygäsa kä'day nyigatäg kamen, na ngaki ka-sogänong kalaye legyädäno tä kaxsä cabärä Yaxudiya kä'day. ⁶⁶ Na känggi kä'day kädäng ngakiyang kameskädä tä mäganyga ndä ngadeccä ka, “Päxä pipinong wunodung layis wi?” Xa andä Kaläkgang nang seley.

Logeygä Zakariya

⁶⁷ Na Ligidä Kaläg kälīgä Zakariya me Yoxananag na malogeza ka,

⁶⁸ “Andädäx̄ti Bazuwec Kalägä Israyil,
xa nyawung tä posakä k̄än na 'dakakä k̄än.

⁶⁹ Ndä nyägängusey yaxticcä xonyad tä kog tä känggä me wexiccänya
Dawud,

⁷⁰ ka'das ani nyalegeyzenäs na ikänggä menggä logeygänyagi mägaccäng
tedelinyang,

⁷¹ ndey ka nyäxony kog tä menggä kurog,
na mändey ta asänggä känggi k̄a'day saxe kogkang.

⁷² Nyasog ngakong ndey nyälapa agäwaydad ta wawanagkog,
na ndey nyäniming axäskänyagi tedelinyang,

⁷³ na täsedicci nyägäloguwa nang ta wawanog Apraximang.
Täsedicci lapedäng ka

⁷⁴ kogki nyaxony kog ta asänggä menggä kurogkang
ndakä wexedig nya na nyigatäg song,

⁷⁵ tä tedeldäg na lelextäg tagänya tä loydugkä aygog.

⁷⁶ Ndä gi päxä penangong säbandäs gi me logeygä Kalägi tiyating,
xa gi piccadas tagä Bazuwec ndey bolasa sota tänya,

⁷⁷ ndey dogä ligiccä xonyad tä känggä Kaläg na wangakä ngaka tasiny tä
känggänya.

⁷⁸ Xa agäwaydakä Kaläggog
wunodung xonyo kog paratasawa ka'das keyzic

⁷⁹ ndey bowdic wung tä känggi kăcasäng tä lätäng na tä ligidä xäsang,
ndey meskede exenggog ta akäsogä modey.”

⁸⁰ Ndä päxä pipi wedede na kiniy tä wane na yexkä nga. Ndä mäguccu
tä pumpung basä xongondi mawesawa na wexed tä Israyil tängang.

2

Iyinakä Yasuwa Almasi

¹ Tä enggä sänggi Axustus Kaysar kabokung asiriye tunyu ka k̄än
k̄a'day 'docco gärekärejeysa aga tä cabär k̄a'day tä wexekä tuluba. ² Ndä
gärekärejeysa täzäläggang, tä cuku Kuruniyos tä butug tä Suriya. ³ K̄än
k̄a'day k̄a'docco tä cabärtaga ndey gärekärejeysa aga täng.

⁴ Na kala Yusuf kawetä mändey tä cabärä Nasra tä Calil k̄a'doc tiyati
tä Petlaxam cabärä Dawud, tä Yaxudiya, xa ma mäs me cabäri ndä mäs
wayäwan tä caxsä Dawudag. ⁵ Mägä'doc ndey sägärekärejeysa agäsa na
Mariyomzi sader tämang ndä cägä'dosuwa.

⁶ Na tä cuku sa todi, pipi kagasäng ce. ⁷ Na cägiyäng päxäcenä zäläg näs
päxä apang na camulungi na tandä ndä cäzänggasa tä kuburicci säziye
male tängang, xa axa säzänggasa täng undung.

Copkä Menggä Megäs

⁸ Ndä tänya owdi menggä megäsätäng cuccu kāsac tä korongo meske
sagunuga ondu. ⁹ Na malayikanä Kaläg kaweyesawa täsa na tädäxticcä
Kaläg kabanyeza tä waräsa na nyigatäg kadele sa nano.

¹⁰ Na malayika kangada täsa ka, “Wanga nyigatäg! Ndänge ngakong,
agä anduwale yaxsäwecca apo tanggo aki kodung wadäkä tididäg tä
k̄än k̄a'dayang. ¹¹ Xongondong sägiyäng me nayic tanggo tä cabärä
Dawud. Mang mäs Almasiyang ani näs Bazuweccang. ¹² Ndä boliccongong
lapedäng tanggo ka, anggo 'doxadang päxä pipi kamulungiwa na tandä
ndä sängo tä kuburicci säziye male tängang.”

¹³ Na kälilic malayikadagi tiyating kaweyesäno mange na malayikani dädäxti Kaläg ngadeccä ka,

¹⁴ “Dädäxtic tä Kaläg tiyati, na modey täzäg tä känggi nyäpayeng!”

¹⁵ Na kala malayikada kawangasa sa kä'docco tiyati, na menggä megäs ngadeccä tä ngastängga ka, “Nycugo tä Petlaxam ndey laleyig ngaki kasogäno todiyang, aki Kaläg kaläpäng täkogkang.”

¹⁶ Na sägä'docco tetex sa'doxa Mariyom na Yusuf na pipi sägäsänggasa tä kuburicci säziye male tängang. ¹⁷ Kala sägox pipi, na saser ngaki saläpa täsa tä ngakä piping, ¹⁸ na känggi kä'day kädängang käsaydä aga tä ngaki menggä megäs kalegeyang. ¹⁹ Yä Mariyom kameskäde ngaki kä'day tä mägaxse ndä cägäre tä mägaxsäce ka ngakong key.

²⁰ Na kala menggä megäs kämele, dädäxti Kaläg tä ngaki kä'day sägädäng na sägoxang, xa nga kä'day ka'das ngaki saläpe täsang.

²¹ Tä sänggi tespedespeng, salu ma na sadogas agäma ka Yasuwa, agi malayika kadogas musku cägoxsonga täma songang.

Koyakä Yasuwa Taxä Tämed tä Kaläg

²² Ani Mariyom kä'desenäs sänggä iyekeneng, tä bangä asiriyenä Musa, Yusif na Mariyom kagoying Yasuwa tä Ursalim ndey sädogas ma tä Kaläg ²³ ka'das ngaki garekärejeyno ta asiriyenä Kaläggkang, ka “Pipugi siyedäng tä zäläggkang näs enggä apangasang sädogä kä'day tagä Kaläg”, ²⁴ ndey sädämze ka'das legeygi asiriyenä Kaläg kangatang, ka sädogä enggä kurugä pa pädax na cong näs kurugä kaxsetang sädogä pädax.

Logeygä Simiyan

²⁵ Ndä gang 'doxtiyandäng tä Ursalim säbangäs Simiyan apangza lelexang ndä kamen ngakä Kaläg ndä bene käxa xonyo Israyil. Ligidä Kaläggkandäng täma. ²⁶ Ligidä Kaläg kaläpe täma ka mähse song basa ka mox Almasini Bazuwec Kaläg kayaxsängang. ²⁷ Na Ligidä Kaläg koyo Simiyan na mawung taxä tämed tä Kaläg, mändey Yusif na Mariyom kagoying päxä pipi Yasuwa ndey ka säsoq tanyara täng tä bangä asiriye, ²⁸ na Simiyan käpokä ma tä asängge ndä log Kaläg ngade ka,

²⁹ “Gang, tä bangä ngadagkägi gi Kalägi ngondeyang, mene andang 'daki me wexiccägi 'doc na modey.

³⁰ Xa agang kox me 'dagkicci

³¹ käbolasa tagä kän kä'dayang.

³² Mangang mäs banyiccang, ndey gi Kaläg, lapasäwa tä känggi näs Yaxudiny songang, na dädäxtic tä känggägi menggä Israyil.”

³³ Na todi Yusif na Mariyom käpegse tä ngaki kalegeyno ta päxasang.

³⁴ Simiyan kapes sa. Na ngade ta bosa Mariyom ka, “Ndelde wunggugo appoyo! Kaläg kalebäng päxä pipinong ndä mang mäsoq telänad na ngäsakä kän mange tä Israyil na mälayis bolicci kän saxeng. ³⁵ Ndä nästire, mäganygä kän mange lapetäsäno tä bangä wexekäma ndä gining tä ngasägi, mägaxsägi 'dudowa!”

Ngakä Xana

³⁶ Mändey me logeyandäng näs ux säbangäs Xana päxä pe Fanawil tä caxsä wayakä Asir. Ce caboxsä na'do, sabagäning na yoxuce sägäcuccu tä jendäg paxtänding basa xäskäma. ³⁷ Na cäguccu tä mandurtug tä jendäg

udiny tesped wang tesped (84). Ndä casäja axä tämed tä Kaläg song, cädukuru na uxkud tä ngasäce ndä cäpalacca ongud na säxe kä'day.

³⁸ Na tänya xonggondi, cawung täsa na cadeb logakä Kaläg ndä cälege ngakä pipi tä menggä Yaxudinygi kä'day bene tegic tä Ursalimang.

³⁹ Na kala Yusuf na Mariyom kä'dese nga kä'day tä bangä asiriyenä Kaläg, na sägämele tä Nasra tä cabärä Calil. ⁴⁰ Na päxä pipi ka'donga ndä kalay pädag, käpäsäwa na lelertäg ndä payiccä Kaläggang na ma.

Yasuwandäng Taxä Tämed tä Kaläg

⁴¹ Me Yasuwanag na bosa 'docco tä Ursalim jenijeni tä Pärkid*. ⁴² Ani jendäggä Yasuwa käcogäs asiny wang pädaxang, sägä'docco tiyati tä Ursalim na bangä adi. ⁴³ Sägä'docco sägä'dese Pärkid na tä melgäsa tä pa, päxä celic Yasuwa kalay tong tä Ursalim. Ndä mesa na bosa yex song. ⁴⁴ Sa säcuccu ka mandäng na känggi säwedeccä nangang, sägäcogu sängädi nuxungang, na sägä'docco sämänecece sänyame ma tä warä wayakäsa na biskodagäsa. ⁴⁵ Ndä sa'doxas ma song na sägämele tä Ursalim tä nyam.

⁴⁶ Tä sänggi kodos tä bangeneng, sa'doxas ma taxä tämed tä Kaläg, tä kaxsä kal. Mägäcca tä pidänä balduwiny, mädelde wunduma täsa ndä mämäne sa. ⁴⁷ Na känggi kä'day kädäng legeygä Yasuwanag, kädongo tä yerändäggäma na bucuku nga tä menggä bäldey. ⁴⁸ Mesa na bosa kox ma na wadäka koyo na bosa ngade täma ka, "Päxang, wi siye gi käsogkuwa täwas mänang? Lala, menggo na agänang wanyamedig owdugi pacey."

⁴⁹ Na mägämele täsa ka, "Wi siye anggo nyamadang owdangang? Anggo 'diyang ka pang Appanang nyaza anycu tängang?"

⁵⁰ Ndä musku kax menggäsa kabäle ngakäma täsa song. ⁵¹ Na sacoccoleza sägämelese tä Nasra ndä mädede nga täsa. Ndä bosa meskede ngaki kasoguningang kä'day tä mägaxse.

⁵² Ndä Yasuwa 'dongada na lelertägke, ndä Kaläg na kän paye ma.

3

Weyekä Yoxana ta Akäsog

¹ Tä jendäggä asiny wang mädäggang tä butugku Tapariyos Kaysar, ndä Pälatis Alpondi buguningzä Yaxudiya. Xirudus bazuweccang tä Calil, na päxä bosa Filipus päxä bazuweccang tä cabärä Itoriya na Taruxontis. Yä Lisaniyus bazuweccang tä Apäliya.

² Legeygä Kaläg kawuno ta Yoxana päxä pe Zakariya tä pumpung ani Xanas na Kiyafa, seley layis ngotorpugu menggä tämed tä Kaläggang. ³ Na mägä'doc tä Colonggonä Urdun kä'day, mäduwale ngakä xajkä kän tä ngaka tasiny, na pac tä ma. Ndey Kaläg cay ngaka tasinygäsa xa sägäxaje.

⁴ Ka'das ani gärekärejesawa tä sorunu legeygä me logey Isayang, "Ndänge ngasawan logacca tä pumpung ka, 'Wey akäsog tä Bazuweccog, ndokala akäsog täma.

⁵ Ko'dota kä'day 'docco päseccä, cabärta na enggä cobocoboriny mäxotusuno, na akäsogi kagolopewang dokol, na sogi ngudungudulang zäräzirigiwa,

⁶ ndey kän kä'day laley xonyakä Kaläg.' "

* **2:41** Karamana Yaxudiny sogong ndey säniming 'dakicci Kaläg kä'dakasanäs tä cuku sa tä cäläxtäg tä Masarang. Yaxudiny bangäs sapärkidki "Lägey" ndey ka malayikanä xäs kawungang keley padäggäsa lägtä xa sägadas tamiccä päxä dopolog tä akäsogalinygäsa.

⁷ Na Yoxana ngade tā xā'dāni kawuno tā paccang ka, “Ama caxsā enggā tāmong! Xānang kādaxā anggo ka mpexkeng zāngaygā Kalāg tanggong?

⁸ Ndā gang lāpāning 'dogi lapedāng ka anggo kālayisang kāngga kāmēle tā Kalāgkang. Ndakā layisang kāngga bāngada Apraxim tā ngastāngga ka menanang. Ndakā ngadang ka, ‘Doga siyewa tā kogkandāng song.’ Agānang alāpedāng tanggo ka Kalāg nguso nganyugong teyis pipu tā Apraxim! ⁹ Seley ganang kompa kācicilisuwa tā māxkā ewe ndā eti iyedāng engge apoccu songang sāluwutāsa tāzāg ndā sāgawa tā mas.”

¹⁰ Na xā'dā kamān ma ka, “Neng gang wasogig wi?” ¹¹ Yoxana kabuc tāsa ka, “Kāxa tandu tāng pādaxang larā na kāxi ne wundungang ndā kāxa siyake tāngang sog mānang.”

¹² Menggā yawgā tuluba māndey kawuno tā pac tā ma na māne ma ka, “Me bāldic, yā wasogig wi?” ¹³ Na malāpe tāsa ka, “Ndakā yawadang weg mangleccā tā wegki salāpāng tanggong.”

¹⁴ Ndā kulung asāgaru māndey kamān ma ka, “Yā was, wasogig wi?” Na malāpe ka, “Ndakā bagkadang weg tā kām na rejic māndey na celdug, gixi maxiye na 'dogi sādogodāng tanggong.”

¹⁵ Na todi kām wadāka kalaye tidiny xa satāng bene Almasi, na soxo ka Yoxanang nās Almasi. ¹⁶ Yoxana kabuc tāsa kā'daygāsa ka, “Agā anās kāxa pacce anggo tā ma winy, yā kigkandāng wunodung ndā panggudugke mo'do kanggā. Agānang anās kāxa ulidi kābadage song. Ndā ma māwunodung māgodung Ligidā Kalāg tanggo na mas. ¹⁷ Ndā adalandāng ta andāma ndey mexenās nyada tāpox yā mādoga kuny tā curunuma, yā nyada mādunyu na masa paxewa song.”

¹⁸ Ndā tā akāsogong na pagad mange, Yoxana kalogey yaxsāwecci apo lege ngakā Kalāgkang. ¹⁹ Ndā ani Yoxana kā'dedeyis Xirudus tā ngakā batakā uxā pāxā bosani sābangās Xirudiya na wexeki māndey mawex tasiny kā'day, ²⁰ Xirudus kasog 'doga tas māndey. Madene Yoxana tā ax.

Packā Yasuwa

²¹ Kām kā'day kāpacāning tā ma, na Yasuwa māndey kawung sāgāpaccā. Ani māpalaccanāsāng tiyati kalengesāwa, ²² na Ligidā Kalāg kacoccoleza tāma oxowa ka'das kuruwic na legey kāpātāsāng tiyati ngadeccā ka, “Giningang nuxundugkāgi nās penanggi ampaye ngakeneng. Xā ngakāgi kasog wanang tiding.”

Caxsā Wawanagā Yasuwa

²³ Ani Yasuwa kadebās wexekeneng, satāma jendāg ud wang asiny. Ndā kām oxo ka mās pāxā pe Yusif,

pāxā pe Xali, ²⁴ pāxā pe Matad,

pāxā pe Lawi, pāxā pe Malki,

pāxā pe Yuna, pāxā pe Yusif,

²⁵ pāxā pe Matāsaya, pāxā pe Amus,

pāxā pe Naxum, pāxā pe Xasāli,

pāxā pe Nacayi, ²⁶ pāxā pe Mas,

pāxā pe Matāsaya, pāxā pe Samayin,

pāxā pe Yusic, pāxā pe Goda,

²⁷ pāxā pe Yoxanan, pāxā pe Resa,

pāxā pe Zarāpāpīl, pāxā pe Saltīl,

pāxā pe Niri, ²⁸ pāxā pe Malki,

pāxā pe Adi, pāxā pe Gāsīm,

pāxā pe Almadam, pāxā pe Ir,

²⁹ pāxā pe Gesuwa, pāxā pe Alāyasār,

pähä pe Yoram, pähä pe Matad,
 pähä pe Lawi, ³⁰ pähä pe Simiyan,
 pähä pe Yaxuza, pähä pe Yusif,
 pähä pe Gonam, pähä pe Aliyakim,
³¹ pähä pe Maliya, pähä pe Minan,
 pähä pe Matada, pähä pe Nasan,
 pähä pe Dawud, ³² pähä pe Yasa,
 pähä pe Oped, pähä pe Pos,
 pähä pe Sala, pähä pe Naxsun,
³³ pähä pe Aminadip, pähä pe Adämin,
 pähä pe Arni, pähä pe Xasrun,
 pähä pe Faris, pähä pe Yaxuza,
³⁴ pähä pe Yaxup, pähä pe Isxag,
 pähä pe Apraxim, pähä pe Tarex,
 pähä pe Naxur, ³⁵ pähä pe Suruc,
 pähä pe Raw, pähä pe Falic,
 pähä pe Apir, pähä pe Sela,
³⁶ pähä pe Kayinan, pähä pe Arfagäsad,
 pähä pe Sam, pähä pe Nox,
 pähä pe Lamag, ³⁷ pähä pe Mätäsalex,
 pähä pe Anax, pähä pe Yarad,
 pähä pe Maxalil, pähä pe Kinan,
³⁸ pähä pe Anos, pähä pe Sed,
 pähä pe Adam, pähä pe Kaläg.

4

Däniye Käläbä Yasuwa

¹ Ndä nyägäligä Yasuwa na Ligidä Kaläg, mägämel na Colonggonä Urdun, Ligidä Kaläg kagoying ma tä pumpung. ² Däniye käläbä ma tä sängga udiny pädax. 'Doga masi wundung tä sänggi, ani sänggi kä'desänonusang ma magä'di na'do. ³ Na Däniye ngade täma ka, "Näs Pähä Kaläg seleyang, lapi tä ngayiccong layis zäx." ⁴ Yasuwa kabuc ka, "Gärekäreesawa tä Sorunu Kaläg ka, 'Siyatag tol naye käxa julang song.' "

⁵ Na Däniye kabag ma tä ke'dengge'demes ndä banye ow na gertä bugundugku walangicä täzäg kä'day täma. ⁶ Na Däniye läpadas ta Yasuwa ka, "Adogodung bugundugkong kä'day tä andägi na tädäxtägki wedetese nangang, xa sadogung panggudug tä andang ndä adogada tä käxi ampayeng. ⁷ Ndä känox kundukurusa käpaley agängang, wekong kä'day känggig." ⁸ Yasuwa kabuc ka, "Gärekäreesawa ka, 'Dukurusa pala Kalägägi na wexe ngake tol.' "

⁹ Däniye kabag Yasuwa tä Ursalim, na kädokalasa ma tiyati täzä ndandangzä axä tämed tä Kaläg, na ngade täma ka, "Känox näs Pähä Kaläg seleyang, xudiwa täzäg todong. ¹⁰ Xa gerekäreesawa ka, " 'Kaläg yaxsedäng malayikadage tägi ndey meskädä gi,' "

¹¹ 'muso gi ta asängga wange gi ndey ka 'dingäsa exenägi tä ngayic song.' "

¹² Na Yasuwa kabuc ka, "Sorunu Kaläg ngade ka, 'Ndakä läbä Bazuwec Kalägägi song.' " ¹³ Na todi Däniye kä'dese läbke bägälic, na kala kawangasa ma basa xongoda.

Tebekä Wexekä Yasuwa tä Calil

¹⁴ Yasuwa käligäwa na panggudugku Ligidä Kaläg, na kämel tä Calil, na todi lulungudäma kuduwalewa kä'day tä kaxsä cabär. ¹⁵ Na madeb bäldey tä axinyä palicingyä Yaxudiny na kän kä'day kädädäxti ma.

Pexkekä Yasuwa tä Nasra

¹⁶ Ndä kala gang Yasuwa kawung tä Nasra, tä owdi ma'donga tängang, na mägä'doc maläs axä paliccä Yaxudiny tä xongondu Sapid, xa nyang näs tanyara tämang. Mangäsa tiyati tä geney, ¹⁷ na sadogas sorunu me logey Isaya täma. Na malenge soru ma'doxa owdi garekärejesawa ka,

¹⁸ "Ligidä Bazuwec Kaläggandäng na agä,

xa nya nyaseny agä

ka agä anduwaley yaxsäweccä nyani apong tä menggä wiy.

Ndä nya nyayaxsä agä ka agä anduwale 'dagkic tä känggi kacikiliningang na ndey ngojony zayza,

na känggi sägäcäläxtiyang sä'daka,

¹⁹ ka agä anduwale jendä agä waydagä Bazuwec tä kän."

²⁰ Na kala mägäräkä Sorunu Kaläg na madoga tä käxi kamen wexetang na mägäcca. Na Känggi kä'day tä axä paliccä Yaxudinyang kamende aga täma. ²¹ Na Yasuwa käbäldeyza läpede täsa ka, "Ngakä Kaläggong kändängeng genewang, xongondong kalayenäs wega."

²² Na kala kä'daykäsa salegeyze appoyo tä ngakä Yasuwa, na sa'dämdes legeygi tidiny käptäzäng ikämang. Na sängadeccä ka, "Yä 'doxtong de päxä pe Yusifang?"

²³ Yasuwa ngade täsa ka, "Nästire anggo zeredeng ngakong tagä ka, 'Wanga tumarajuwic, däxä ngase!' na kämpayang tagä ka, 'Dogi kändänggi ka gi käsog tä cabärä Kafärnaxumang, sogä todong tä cabärägi mändey.'"

²⁴ Na mapos legey ka, "Aläpedäng zänggä nga tanggo ka, me lo-geyandäng sägixidi tä cabäre song. ²⁵ Ndä näs tire aläpedäng ngakong tanggo ka madurinyatäng mange tä cabärä Israyil tä cuku me logey Iliya ani zäkoxa kärigkäwa tä jendäg kodos na asämeny aranang, xas kawung tä walangic kä'day. ²⁶ Yä Kaläg kayaxsä me logey Iliya ta nuxu accäsa song, basa ta uxi näs mandur näs me pungud tä kaxsä pang Sarfa tä cabärä Sayidunang. ²⁷ Ndä menggä omodatäng mange tä Israyil tä cuku me logey Iliya, yä nuxu accäsandäng kädäxäwa song, basa Naman me pungudi käpätäng Suriya."

²⁸ Ani sägädängäs ngakongang, känggi kä'day tä axä paliccä Yaxudinyang käsängasa paccy. ²⁹ Na sangusosuno tiyati, samagäng ma tunyu tä kaxsä pa. Na sagoyas ma tä nyixtä päxä cobocoboric, säpaye säzajas ma täzäg tä zä cabäri käke'decekang. ³⁰ Neng mawetä tä warä xä'dä na mägä'doc tä akäsögäma watäkäma.

Wexekä Yasuwa tä Kafärnaxum

³¹ Yasuwa kä'doc tägaxsä Kafärnaxum tä Calil, tä xongondu Sapid, na madeb bäldeygä kän. ³² Na sa'dämdes bäldeccäma xa soxo bugundug täng.

³³ Ndä tänya axä paliccä Yaxudinygi apangandäng käxa tasandäng tä wane, ndä kapere ka, ³⁴ "Wayi! Wanga was watäkäsko, Yasuwa me Nasra! Gining kuwung tä paxagäsko? Ayex gi ka giningang Ndedelang na näs näkä Kaläg."

³⁵ Na Yasuwa kadux kăxa tasti tă wanămang ka, “Păli! Wete tă wanăma!” Na kala kăxa tas kacodasa ma tăzăg tă pidănăsa na kawetă napăl kawung ma kăppărjig.

³⁶ Kănggi taxă paliccang, kădongasa ndă mănădăning ka, “Oxadi sogowa todong manang? Na butug na panggudug mădaxedăng ligitiga tasiny tunyu na wedeccă!” ³⁷ Na kala lulungudă Yasuwa kawasasăwa tă cabăr băgălic.

Yasuwa Dăxă Kăn

³⁸ Ani Yasuwa kawangasanăs axă paliccă Yaxudinyang, malăs pang Saman. Na ma'doxa wawana uxu băxadiccandăng paccey, na săgăpay Yasuwa ka dăxă ce. ³⁹ Na măgădokol todu zăce na maduxsi ka băxadicalay wundung tăce. Na kăccogos cangăsa tiyati cawexse tăsa.

⁴⁰ Tă 'dăngakă xong, kănggi wayaka tăxăccă na tăxăka căgăcaguwinyang, sagoying tăma. Na măgălăbtă sa kă'day na wadăkăsa kădaxăning. ⁴¹ Kăngga tasiny kawetăcco tunyu mangeccă, na pered ndă ngadeccă ka, “Giningang năs păxă Kalăgkang!” Na madux sa măleyis sa legey xa sa săyex ma ka măs Almasi.

⁴² Na megetuduyzi tăbängeneng, Yasuwa kawangasa sa ka'doc tă owda kaculdoy, yă musku xă'dă nyame bangăma. Ani sa'doxus mang, săleyis ma 'doc wangesănakă sa. ⁴³ Ndă Yasuwa ngade tăsa ka, “Basa anduwaley yaxsăwecci apo lege ngakă bugundugku Kalăgkang tă kulung cabărtagi tăngang măndey, xa ngakongag Kalăg kayaxsă agă ka awung awexang.”

⁴⁴ Na todi măwedede măbăldecce tă axinyă palăccinyă Yaxudiny tă Yaxudiya.

5

Băngănakă Menggă Răb

¹ Xongenendăng, Yasuwandăng dokolo tă nyixtă Colonggonă Calil, ndă xă'dă kagurma paye dăng ngakă Kalăg. ² Na măgox dămpejiginy pădax tă nyixtă colonggo yă letuganagi năs menggă menekă asang, kawetăcco tunyu 'daye ka'dadaga. ³ Na Yasuwa kă'doc tă kaxsă nuxu dămpejigsi năs năkă Samanang, na mălăpede ta Saman ka, “Zexteyi dămpejigsiginong na pidănă ma.” Yasuwa kăcca tă nya kaxsă dămpejigsi ndă bălde xă'dă.

⁴ Yasuwa kă'dese legeyge, na ngade ta Saman ka, “Nyasi dămpejig tă maga tă'duginy na nggawi ka'dadagăgo tăng ndey meneng as.” ⁵ Saman kabuc ka, “Ngotorpo, wakasăngig kădayi tă wexed ndă kamenig nuxu 'dog song! Neng tă legeygăgigong anggawada ka'dada tă ma.”

⁶ Na săgădăng ngakăma săgawa ka'dadakăsa tă ma na samen as mange de ka'dadagăsa kacertăno. ⁷ Na săgădawasa ta biskodagăsagi tă dămpejigsi nuxungang ka wuno posa. Na sawuno săgăpăsă dămpejiginy pădax na as de paye muxosuno tă ma.

⁸ Saman Putros kox mănang, na kudukurusa tagă Yasuwa ngade ka, “Bazuwec, wede wangasa agă, xa anăs kăxa sogo ngaka tasiny!”

⁹ Na todi Putros na kănggi namang, kădongo tă menekă aski samendă mangeng. ¹⁰ Yaxup na Yoxana enggă penggă Zapadi menggă wexed na Saman kădongo măndey. Na Yasuwa ngade tă Saman ka, “Wanga nyigatăg, xa gang na ur'dug gi layis me menekă kăn.” ¹¹ Na kala sagoyas dămpejiginygăsa tă tungurtic, na sawangasa weg băgălic na săgărăbkădă Yasuwa.

Dăxă Me Omo

¹² Tä cuku Yasuwa tä nuxu kaxsä pandäng, apangandäng kawung täma wane kä'dod na omo. Mägox Yasuwa na mägunusawa täzäg mäzaye zäg na manyäxay Yasuwa ka, "Bazuwec, kä'dang mpayeng kax kusog wanag kalay apo." ¹³ Na Yasuwa kälanga ande kápärä ma na ngade ka, "Agä ampaye asog gi lay mpo. Omo caya!" Na käckogos omo kaway tä wanäma.

¹⁴ Na Yasuwa kä'dedey ma ka andakä mäläpe tä nuxu kig song. Na madästä me omo ka, "Wede koyi ngasägi ta me tämed tä Kaläg na koyi 'dogu tämekägi ndey mäduwalasa ka wanägi kälal apo, tä bangä asiriyenä Musa kadästase nangang, ndey säbäle ka wanägi kälal apo."

¹⁵ Yä wadi lulungudu wexekä Yasuwa kawasasäwa käked na xä'däni kädängang kawuno tä dänggä ngakäma ndey Yasuwa dächä sa tä täxäkäsa.

¹⁶ Ndä Yasuwa päledeswa tä owda kaculdoy xondaxonda watäke tä paley.

Yasuwa Kadächä Pudude

¹⁷ Na xongenendäng Yasuwa bäldecce na Farisiny na menggä lelericcä asiriyenä Musa aki kápädäsäno tä Calil na tä Yaxudiya na tä Ürsalimang kăcasäng kăsac, ndä panggudugku Kaläggkang kasog Yasuwa dächä kănang.

¹⁸ Kulung apangas kawuno poko pudude tä salany. Säpaye ka sägoyas ma tax tagä Yasuwa. ¹⁹ Neng sa'doxa ow kapäs, ndä owda sälangeyis ma undung na sa'dese tazä ax sawe ax ndä sälolas ma nang tax na salany tagä Yasuwa. ²⁰ Yasuwa kox menekä ngakäsa täma, na ngade ta pudude ka, "Bisko, ngaka tasinygägi kăcayino."

²¹ Na menggä lelericcä asiriyenä Musa na Farisiny käre tä ngastängga ka, "Apangza tiyanang degeje Kaläggkang? Xănang caye ngaka tasiny tä kăn basa Kaläggkang?"

²² Ani Yasuwa kabälenäs ngakäsagiyang, mäne sa ka, "Wi siye anggo makadang ngakong tä mäganYGagong? ²³ Ngakatiyag kädäppa ka xäxäminy ngadäningang, 'Ani ka ngaka tasinygägi kăcayining,' wala ka, 'Ngäsa tiyati wetäde'? ²⁴ Asogo ngakong ndey bäleng ka agä, Pächä Käxa Jul panggudugkatäng tä andang täzäg layis näka anycayis ngaka tasiny." Na Yasuwa ngade ta pudude ka, "Ngäsa tiyati poka salanygägi wede tä pa."

²⁵ Na tetex mangäsa tagäsa tiyati na madeccäng salanygäma mägä'doc tä pa, mädädäxti Kaläg. ²⁶ Na mäganYGäsa kabalza na sägädongo, na sägädädäxti Kaläg tä ngaki kasogunong. Na kala sanyigata Kaläg, sängadeccä ka, "Was kanoxig ngaka tädäxiny xongondong."

Yasuwa Kabandä Lawi

²⁷ Tä bangä ngakong Yasuwa kawetä tunyu na kox käxa age ka Lawi, säbängäs ma mändeng Mata, näs me yawgä tuluba kăcca gixinicci taxä burkune. Na Yasuwa ngade täma ka, "Räbta agä." ²⁸ Na mangäsa tiyati mawangasa weg kä'day mägä'doc tä bangä Yasuwa.

²⁹ Na Lawi kasog led tä pane ta Yasuwa, na kala xä'dä na menggä yawgä tulubada na kulung palangaski tängang, kăcasäng sagur siyad nasa. ³⁰ Na Farisiny na menggä lelericcä asiriyenä Musa daweccä ta menggä räbkä Yasuwa ka, "Wi siye anggo darjangedänang na ziyaccang na wuxiccing na menggä yawgä tuluba na kängga sogo ngaka tasinyang?"

³¹ Na Yasuwa kabuc ta Farisiny ka, "Känggi täxäccä songang paye me nayic song, basa känggi täxäccäng kăcag paye me nayicang. ³² Agä kawung tä bangakä känggi apocung song, wadi kawung tä känggi sogo ngaka tasinyang ndey meley mäganYGa."

Yasuwa Legey Ngagä Akäsoga Warändi

³³ Sängadeccä ta Yasuwa ka, “Menggä räbkä Yoxana mene uxxud todotol na palacca tä Kaläg, na mändey menggä räbkä Farisiny sogo mänang, yä menggä räbkägi kädil siyad na wuxid tol.”

³⁴ Na kala Yasuwa ngade täsa ka, “Kädäppa ka dogang palangaska kawuno tä batad ka men uxxud yä me batatandäng nang? ³⁵ Musku xa ow wunodung säbate me batad täsa, ndä kala sälayenäs kängga mene uxxud.”

³⁶ Na sax mändey maser nga täsa ka, “Kigkandäng cerede nyonggo tä tandäna warändi ndä debede tä näka kaboxsu song. Käxa kasog mänangang kacere tandäni waränding, ndä nyonggoni waränding 'dasedäning na boxe song. ³⁷ Kigkandäng colada bux tä meldäna näs boxenendäng song. Käxa kacolas buxka warändi tä meldäna näs boxeneng, zage meldä na wanyisäwa. ³⁸ Wadi kädäppa ka buxka warändi säcolas tä kaxsä meldäna warändi. ³⁹ Ndä käxa kawux buxku boxinyangang paye buxka warändi song. 'Do ngade ka, 'Buxku boxinyaga apoccu na wizicci.'”

6

Bazuweccä Xongondu Sapid

¹ Xongenendäng Yasuwa kadus kaxsänggä pelow tä xongondu Sapid. Na menggä räbkä ma kabag zänggä kuny kapujuguy kasi. ² Na kulung Farisiny ngadeccä ka, “Wi siye anggo nyca'dadang asiriyeänä Musa tä xongondu Sapidang?” *

³ Yasuwa kabuc täsa ka, “Anggo känggeneng ngaki Sorunu Kaläg lege tä ngakä Dawud na biskodage kasog tä xondi xas kapaxäsang song?”

⁴ Masogkuwa key maläs axä burkunu tämed tä Kaläg de mägä'doc masi siyaki tedelinyang, yä asiriye ngade ka säsi säxong bal me tämed tä Kaläg watäkeneng, ndä madoga kulung tä enggä biskodagämang?” ⁵ Na mängade täsa ka, “Agä Pähä Käxa Jul anäs bazuwec tä xongondu Sapid.”

Däx tä Xongondu Sapid

⁶ Yasuwa käläs axä paliccä Yaxudiny bäldecce tä nuxu xongondu Sapidandäng. Ndä apangandäng tänya axä owdi andä abanicce käxsä.

⁷ Menggä lelericcä asiriyeänä Musa, na Farisiny jenggere Yasuwa käsac. Paye bäle ka cong Yasuwa däxäccä tä xongondu Sapidang, ndey ka sä'dox rakawza säglinäs nga täma. ⁸ Ndä Yasuwa yex ngakäsagi sabokasa tä zänggäsang, na mängade tä 'doxti ande käxsängang ka, “Ngäsa tiyati dokala tä pidi todong.” Na todi mängäsa magädokol tänya owdi.

⁹ Na Yasuwa ngade täsa ka, “Ampaye amän anggo ka, apo ta asiriye ka wex ngaka apoccu wala ka wex ngaka tasiny tä xongondu Sapid, ka xony rongic wala ka wanydäs?”

¹⁰ Na Yasuwa gaw ze käsaya sa na'anggäsa na ngade ta apangzi ande käxsäng ka, “Langi andägi.” Na apang kalanga ande na ande kaliy apo.

¹¹ Na ngaki mänangang kawaley mäganygäsa na sälegecce säbodo 'doga säsong ta Yasuwa.

Tecekä Yasuwa tä Känggi Sägalägä Asiny wang Pädaxang

* **6:2** Farisiny bangäs pujukuygä zänggä kunyi menggä räbkä Yasuwa kapujukuyang, wexed xa asiriye ngade ka kän wang wexed tä xongondu Sapid xa xongondu nunguccä Yaxudinyang.

¹² Xongondi Yasuwa ka'deg cabär tä paley tängang, masäng kadayi tä paley tä Kaläg. ¹³ Ow kagezä na mabandä menggä räbkäma madec kulung tä wara asiny wang pädax ndey mäligä. ¹⁴ Madeccäng kanggong, Saman, ani sabangäs Putrosang, na päxä bona Andrawus, Yaxup, Yoxana, Filipus, na Partalmawus, ¹⁵ Mata, Toma, Yaxup päxä pe Xalafi, Saman ani sabangäs me mäganygä pädätäkgang, ¹⁶ Yaxuza päxä pe Yaxup, na Yaxuza Askariyuti ani kamenes Yasuwang.

Yasuwa Bäldecce na Naye Kän

¹⁷ Yasuwa kawung täzäg na kanggenegi kälägäng na mägädokol tä owda kädäpä. Na menggä räbkäma käyawesäno mange na kän bägälic kädurisäno kápätäsäno tä cabärä Yaxudiya na Ursalim na tä nyäxtä ndandangzä colonggonu Taya na Sayidun. Sawuno tä dänggä bäldecäma Yasuwa na ndey ka mädäxäsa tä täxäkäsa. ¹⁸ Na kanggi lititiga tasiny käco'deyang, kalaye käccag. ¹⁹ Xä'dä paye zegeleyi ma, xa panggudug päkätäsäng wanäma ndä mädäxä sa na'anggäsa.

²⁰ Na mägäza menggä räbkäma na mängade täsa ka, "Baxändäg ta anggogong widänangang, xa bugundugku Kaläg kunggog.

²¹ "Baxändäg ta anggogong xas tanggo gangang, xa edekeny matasang.

"Baxändäg ta anggogong ngecceng gangang, xa edekeny guguccing.

²² "Baxändäg ta anggogong säxaxenggong, na sa'däda tunyang, na sälangeng, na säpexke kala kangga tasiny xa kämeneng ngakang, agä Päxä Käxa Julang!

²³ "Ledining na zanedicci tä xongondi ngakong kasoguning tanggong, xa dericcägo ngondey tä pang Kaläg tiyati. Xa wawanakäsagi kä'doccong kasog mänang tä menggä logey.

²⁴ "Woyoy ta anggogong male tanggong, xa anggo ka'doxang buduldugkugo na kä'deseng kala.

²⁵ "Woyoy ta anggogong kämasang gangang, xa edekeny xas lukudi paxe anggo.

"Woyoy ta anggogong guguccing gangang, xa edekeny guniccing na ngecceng.

²⁶ "Woyoy ta anggogong kän kä'day lege ngaka apoccu tä ngakägong, xa wawanakäsagi kä'doccong mändey kasog mänang ta menggä logeygi celuwinyang."

Mpayä Menggä Kurugo

²⁷ Na Yasuwa kapos legey ngade ka, "Ndä agä alegecce tanggogong, ndeldedeng wunggugong. Mpayä menggä kurugo, zoga ngaka apoccu tä kanggi saxenggong. ²⁸ Pese kanggi cage anggong, na palezi tä kanggi cälixtinggong. ²⁹ Tä käxi 'dade abogiccäging, wexi cengicci kalayang täng 'dadä, na käxa bate tandänäging, togi nuxu ani biyeyang täng mändey. ³⁰ Kig kanyäxayging togi 'dogi payeng, ndä kig kabag 'dog täging, adakä naläng täng tunyu. ³¹ Koyada kän kala koyaki mpaye sägoydäs ging.

³² "Gang mpayadang kanggi paye anggong, oxadi 'doxadang tä bängeneng? Mändey kanggi sogo ngaka tasinyang paye kanggi payeng.

³³ Gang zogadang ngaka apoccu tä kanggi sogo ngaka apoccu tanggong, oxadiyang 'doxadang tä bängeneng? Mändey kanggi sogo ngaka tasinyang sogo mänang. ³⁴ Ndä gang kämeneng amusu tä kanggi yexeng ka meledäng tanggong, oxadiyang 'doxadang tä bängeneng? Mändey kangga

sogo ngaka tasiny menede amusu tā kāngga tasiny ndey mele tāng kā'day.
³⁵ Wadi kādāppa ka mpayang mēnggā kurugo, na zogang ngaka apoccu tāng, na meneng 'dog ndā bokosānang ka sāmēleyāng tanggo song. Ndey dericcugo lay tādāx, na layisang enggā penggā Kalāgi Tādāxang, xa māgaxsānya bow tā kāngga māganyga juliny na tā kāngga logacca song.
³⁶ Layesi kāngga aga watāsa tā kān xa Menggoni Tiyyating age watāsa tā kān.”

Wanga Kāligkā Nga tā Kān

³⁷ Yasuwa ngade ka, “Wanga kāligkā nga tā kān, andakā sāgāling tanggo. Wanga zāgkoygā kān, ndey sāwang zāgkoygā ko. Zaxi nga tā kān ndey sāsaxāng nga tanggo. ³⁸ Begsi ndey sābeg anggo. Kili 'dog appoyo, 'dixisa tāzāg ndā ngādengādesa, ndā didili, ndey sāduki tā satā ngorezāgi. Tā kiligi gi gilingang sāgilidāng tāgi.”

³⁹ Na māndey maser nga tāsa ka, “Kāxa layis ngojox 'dosto ngojox song, kādāppa mānang? Pādaxkāsa sādēlgetese taxā 'dog, sāxong? ⁴⁰ Me rāb ngondey ta me bāldicce song, basa kāxi sāgābāldēy appoyong nyang laye kala me bāldicceneng.

⁴¹ “Wi siye gi zaye nyaxic ta awunu pāxā bonggo yā kā'diya sarakaduwecci ta awunuging? ⁴² Kāsogkuwa key lāpede tā pāxā bonggo ka, 'Pāxā bisko, wanga agā anycay nyaxic ta awunugi' yā kā'diya bo sarakaduwecci ta awunuging? Ama me fonofoney! Caya bo sarakaduwecci ta awunuging tāzālāg ndey zayza kāley ndā kala bokung nyaxicci ta awunu pāxā bonggong tunyu.”

Ed Bāledeswa na Enggegenēgi Iyēdāngang

⁴³ “Eta apo iyēdāng pāxenena tas song, ndā māndey eta tas iyēdāng pāxenena apo song. ⁴⁴ Ewe kā'day bāletāsāning na enggengganagi iyēdāngang. Ewegā kunyu iyēdāng enggā 'dami song, na adilu sete tā kenyege song. ⁴⁵ Kāxa apong ngaka apoccu pākātāsāng māgaxse, yā kāxa tas ngaka tasiny pākātāsāng māgaxse. Xa 'dogi mālegeng pākādāng māgaxsāmani kapāsang.”

Padāg Pādax

⁴⁶ Yasuwa ngade ka, “Wi siye anggo bangadang agā ka, 'Bazuwec, Bazuwec,' ndā wexedeng ngaki alāpedāng tanggo songang? ⁴⁷ Kāxa kawung tagā ndā delde wunde tā legeygang ndey wexse nangang, agā alāpede tāng ka kāxeneni ka'das ⁴⁸ apangza kadony pane kabosasa tāzāg loy, ndā repesa kadasu tāzā tappa. Faya kawung basa colonggo kāmamanya tā pox de kābung pa, ndā kāgā'dikiy pa song, xa kārepesawa appoyo. ⁴⁹ Yā kāxa dānge ngakang ndā wexe songang, kāxeneni ka'das apangza kadony pane tāzāg winy kabosasa kadasu sāxong. Ndā colonggo kapās kāsajā pane, na kagurumusawa tetex na kawanydāswa seley!”

7

Nayigā Cālāxsā Ngotorponu Asāgaru

¹ Ani Yasuwa kā'desenās bāldēyge kā'day tā kānang, malāsa Kafārnaxum. ² Ndā ngotorponu asāgarugu Romanandāng tānya owdi paye cālāxse nano, ndā nya cālāxsāmani tāxā paccey paye āxsā. ³ Ani ngotorpo kādāngās ka Yasuwa kawunāsang, mayaxsā ngondowinyā Yaxudīny ta Yasuwa, ka sābandā ma māwung, ndey mānay cālāxsā ngotorpo.

⁴ Sawuno ta Yasuwa, na sägä'dedey ma ka, "Wede xonya ngotorpo xa mang mägädäppas xonyatang, ⁵ xa mäpaye känggä Yaxudiny, na mändey madony axä palic."

⁶ Na todi Yasuwa kä'doc nasa. Ani sägä'docconäs ngäte tä pang, ngotorpo kayxa aminuge kaläpe täma ka, "Bazuwec, wanga dereygä ngäsägi xa kändäppas ka gi wung tä panang song. ⁷ Nyang kasog asaxe wunad tägingang. Ndä gang ngadi winy ndey cäläxsang 'dox nayic. ⁸ Ndä agä mändey anäs käxa panggudug tä ande kamen asägaru, ndä kangada tä nuxu ka, 'Wedeng' na 'docco, na tä nuxung ka, 'Bong' na wunodung, na tä cäläxsang ka, 'Wexe 'dogongang,' na wexe 'dogeneni."

⁹ Ani Yasuwa kädängäs ngakongang, ma'dämdes ngakäma. Na mawexwa mängade tä xä'däni räbtomang ka, "Aläpedäng tanggo ka tä Israyil bägälic ka'dox käxa kamen ngakang ka'das 'doxtongandäng song!"

¹⁰ Na kala känggi sayaxsäng, kämele tä pa ka'doxäng cäläx kalay apo.

Nguseygä Päxä Mandur tä Xäs

¹¹ Kala tetex Yasuwa kä'doc tä kaxsä pana säbangäs Nayin. Na menggä räbkäma Yasuwa na xä'dä kä'docco nama. ¹² Sawuno saläs kaxsä pa, na sa'doxung apangandäng kaxsä kän käpokung tunyu, ndä nyang nuxundugke ta bona ndä cäs mandur, ndä känatäng nace mange.

¹³ Bazuwec kox ce, na agäma kawasa täce na mängade täce ka, "Wanga ngeyig." ¹⁴ Na mawung mägäläbä salany, na nycogi pokaccangäng kädokalasa kisid. Na mängade ka, "Päxä op, angade tägi ka, ngäsa tiyati!"

¹⁵ Na päxä opi käxsängang kangäsa tiyati na kalegese, na Yasuwa kämeles ma ta bosa.

¹⁶ Na sägädongo kä'daygäsa, na sadelese tä däädäxtigä Kaläg, sängadeccä ka, "Me logeyga tädäxandäng tä warog!" na, "Kaläg kawung tä posakä kängge!" ¹⁷ Na todi lulungudä Yasuwa kawasasäwa tä Yaxudiya na tä cendegä walangic kä'day.

Yasuwa na Yoxana me Pac

¹⁸ Menggä räbkä Yoxana kaläpe ngaki kä'day Yasuwa kasogkang ta Yoxana. Na Yoxana kabandä menggä räbke pädax ¹⁹ na mayaxsa sa ka sägä'docco sämän Yasuwa ka, "Giningang näs käxi kän beneng*", wala basa abendig käxa caka?"

²⁰ Ani apanginy kawunonäs ta Yasuwang, sängadeccä ka, "Yoxana me pac kayaxsä was tä gining ka amänzig ka, 'Giningang näs käxi kän beneng, wala basa abendig käxa caka?" ²¹ Na tä nya owdi Yasuwa kädäxä kän mange tä däxäka cakucakuny na mägäcay litigita tasiny tä wadäkä kän na malende agä ngojony.

²² Na mabuc täsa ka, "Wesi lapi ta Yoxana tä 'dogi känoxangang na kändängangang. Ka ngojony käsayiza, mexesu kewetädäcco kiccag, na menggä omoda wadägka kalaye apoccu, na bunguny kädängze, na kängga käxse koxsasa, na menggä wiy kädäng duwaleyga warändi.

²³ Baxändäg tä käxi base mägaxse tagä songang."

²⁴ Ani menggä yaxsäweccä Yoxana kä'docconäsang, Yasuwa kalegese tä ngakä Yoxana tä xä'dä ka, "Oxadi kasog anggo känoccang tä pumpung tä zaygeneng? Päx känoxang mege zäwande nyaxic? A'a! ²⁵ Neng oxadiyang känoc tunyu tä zaygeneng? Apangza kälagäwa na tandäna duladulaje? A'a! Za, känggi lage tanduga duladulajeccäng, kəcag tol cuccu tä owdu buguninginyang!"

* **7:19** Menggä Yaxudiny bene Almasini säyaxsedängang.

²⁶ “Oxadiyang kânoccang tunyu tä zaygeneng? Me logey? E, neng aläpedäng tanggo ka ma mäś me logeyga tädäx tä menggä logey. ²⁷ Ngakongag garekärejesäno tämang, ‘Lala, ayaxsada me yaxasawiccang tagägi, ani ‘docco weye akäsog ndä kala noccang.’ ²⁸ Aläpedäng tanggo ka, känggong sägiyängang käxa tädäx kala Yoxanandäng song. yä käxi biyey tä bugundugku Kaläggang tädäx täma.”

²⁹ Ani kân kä'day kädängäs ngaki Yasuwa kangatang, na mändey menggä yawgä tulubada, kagixi däppiccä Kaläg, xa Yoxana käpaccä sa. ³⁰ Ndä mändey Farisiny na menggä lelericcä asiriyenä Musa käpexkä ngaki Kaläg kabokasa täsang, xa Yoxana käpaccä sa song.

³¹ Yasuwa ngade ka, “Oxadi andäppo na känggä zongang, na sa sa'das wi? ³² Sa sa'das pipuga käcasäno ta axä owdu wanyäg ndä bängedäning, ‘Was kanusig ndetelegu tanggo ndä anggo kocoxsang song, kangeyig ndä aguniccig ndä anggo kängeydäcceng song.’

³³ “Yoxana me Pac kawung ndä kalägäji ndä mäwuxi bux song. Ndä ngadaccang ka märamacca! ³⁴ Yä agänang Päxä Käxa Jul kawung asiyacca na awuxicci, ndä anggo ngadaccang ka, ‘Za, päxä me kurugurunong na wuxicci de bux pangeng mäś biskonu menggä yawgä tulubada na kängga tasiny!’ ³⁵ Zänggä ngakä lelertäg bäledeswa na cofu'do'dugku logadä menggä räbke.”

Wawekä Yasuwa na Mid

³⁶ Nuxu Farisiccandäng säbangäs Saman kabandä Yasuwa ka säsiyza nang tä pane, na mägä'doc tä pang Farisic na sägä'docco sagur siyad. ³⁷ Ndä uxandäng tä nya kaxsä pani, sogo ngaka tasiny, cabäle ka Yasuwandäng tä pang Farisic, na cawung cago midä mäxäs tä belenyza sadotogey sägäluxu tä ngayicca säbangäs alpasta. ³⁸ Na cägä'doc täwang badadagäma, cänge, ndä cädälbede uxku agäce tä exenggäma. Ndä cäsentye exenggäma na apaxkäce, na mändey cägäbucci exenggäma, ndä cawawe exenggäma na midä mäxäs.

³⁹ Farisicci kabandä mang kox ngaki, na ngade tä ngase ka, “Kä'dang apangzong layis me logey seleyang, kax mabäle ka uxong läbe mang näka sogo ngaka tasinyang.”

⁴⁰ Na Yasuwa kabuc täma ka, “Saman, ampaye aläpäng nuxu 'dog tägi.” Na mabuc ka, “Lapäng, me bäldic.”

⁴¹ Na Yasuwa ngade ka, “Me menekä amusundäng kamene amusudi ta kân pädax. Nuxu kamen fudada udiny mädaginy mädag (500), mändey käxi nuxungang kamen udiny pädax wang asiny (50). ⁴² Ani sägämelenäs wegki samen täma songang, masaxa wegki samen tämang kä'day. Pädaxkäsa xänang täsa kädäppa ka paye ma mo'do accanang?”

⁴³ Saman kabuc ka, “Ka'das ka kädäppa ka käxi kamen amusu mangeng, nyaza.” Na Yasuwa ngade täma ka, “Mänang gi seley kälegey zänggä nga.” ⁴⁴ Na mawexwa mägäsay ce, na mängade tä Saman ka, “Gining noxo uxong? Agänang käläs panägi. Kudong magä 'dakä exenggang song, yä ce ca'day exenggang na uxku agäce ndä casenydä na apaxkä zäce. ⁴⁵ Kämpaxäng agä na modey na kägappas agä song, yä ani kaläsäs panäging cägädokala bucigä exenggang song. ⁴⁶ Käwawey zang na mid song, yä ce cawawey exenggang na midä mäxäs. ⁴⁷ Neng aläpedäng tägi ka ngaka tasinygäcegi mangeng kawangesäno täce ndä nyang cäpaye pacceyang. Yä käxi sasaxa täng bälaxinyang, paye bälaxiny.”

⁴⁸ Na Yasuwa ngade täce ka, “Ngaka tasinygägi käcayining tägi.”

⁴⁹ Ndä palangaski kagur siyad namang käre tä zängga ka, “Xänanang kanang mändey caye ngaka tasinyä tä kánang?”

⁵⁰ Na Yasuwa ngade tä ux ka, “Menekä ngakägi tagä kaxony gi. Wede na modey.”

8

Wexekä Yasuwa na Posakä Uxu

¹ Täbangä ngakongang, Yasuwa kadadara kaxsä pa na madus enggä cabärta mabäldecce na mälogo yaxsäwecca apo tä bugundugku Kaläg. Känggämagi mägälägä asiny wang pädaxang satäng nama, ² na mändey sag na kulung uxugi mägänay tä ligitiga tasinyang na tä däxakanang. Mariyomzi säbangäs Macidalia ani samagäng kängga tasiny paxtänding tunyu tä waneneng. ³ Xana uxu Cuza, ani kamen wexekä pang buguning Xirudusang, na Sosana na kulung kän mange kälarta wegkanagi layis kikä ngastängganang täsa.

Serekä Ngakä Me Zäb

⁴ Kän kawuno ta Yasuwa käpätäsäno tä kaxsänggä padägka cakucakuny na xä'dä kädurisäwa, na malegeyze täsa näs seredänic.

⁵ Mängade ka, “Me zäb kawetä kä'doc tä wasakä yugke ndä kulung kawosasa tä kaxsä akäsog na kän kebtasa, na awiny kaleb kulung.

⁶ Kulung yug kawosasa tä cobocoboric, na ani kalocconäsang kamasasa xa nyigidiccandäng song. ⁷ Kulung yug kawosasa tä warä kunyu na kalocco appoyo ndä kunyu räbta. ⁸ Na mändey aki kawosasa tä zägka apoccong kalocco na ka'dongasa appoyo, na kiye kiccag zä kuc nuxung äge kasog udiny mädäg (100) taxä mange.” Na mängade ka ngakong ngadeccä ka, “Käxa wunde dängecceng, däng ngakong!”

⁹ Na mönggä räbkä ma kamän ma ka seredäniccong näkä wiyang. ¹⁰ Na Yasuwa ngade ka, “Anggo nyadogung akäsog tanggo ndey bäleseng bodakä bugundugku Kaläg. Yä tä kulung kän agä alegecce täng na seredänic, ndey kax säläle na oxuswa pele winy, ndä kax sädänge na säbälede 'dogeneni song.

¹¹ “Ndä gang seredäniccong bangeneng ka, yugkag näs ngakä Kaläggang. ¹² Yugki kawoso tä akäsogkang sag näs känggi dänge nga na zeppe tetexang, na Däniye wunodung bate nga tä mäganyga ndey ndakä men ngakä Kaläg ndä 'dox xonyad. ¹³ Yugki kawosasa tä cobocoboriccong sag näs känggi dänge nga na bate na led, ndä mäxkanatäng song. Mene käccogos, ndä ngaka bedeccä kawunong na zäbangada. ¹⁴ Mändey yugki kawosasa tä warä kunyuwang, sag näs känggi dänge nga ndä kä'docco tunyang 'doxada ngakä kanyakanyanä cabär na ngakä Kalägi samenang 'dongatasa song. ¹⁵ Yä yugki kawosasa tä zägki apoccu ndä loccong, sag näs känggi dänge nga na mene pädäte tä mäganyganagi bowinyang na tegetese sogo yugic.

Läpäniccä Banyic

¹⁶ “Kigkandäng banye masäracane ndä xubu song na suxuludi tä boxu salany song. Basa bokasa tä zä tumu ndey känggi luso axang ox owda bow. ¹⁷ 'Dogi kabodwang paredäwa tunyu na 'dogi ka'danywang wedäwa tunyu tä owda bow. ¹⁸ Ndelde wunggugo appoyo. Käxa 'doge tängang säpосо täng, ndä käxa oxo ka 'doge täng yä wundungang, säbate täng.”

Yasuwa na Mönggä Pana

¹⁹ Enggä bonggu Yasuwanag na bosa kawuno täma, ndä kä'docco täma ngäte song xa xä'dä käsekä sa. ²⁰ Na saläpe täma ka, “Enggä bonggugo na bonggo satäng tunyu paye zay gi.” ²¹ Na mägämeley täsa ka, “Ngganang na enggä bonggusko sag näs känggi dänge ngakä Kaläg na wexeng.”

Dokoleygä Yasuwa tä Megede

²² Xongenendäng Yasuwa kä'doc tä kaxsä dämpejig na menggä räbke na mängade täsa ka, “Nycugo agali andi tagä colonggo.” Na sägä'docco tunyu. ²³ Ani säwadaccanäs na dämpejigkang Yasuwa kasändä. Na megede kasagesäng tädäxtiny täsa tä colonggo na dämpejig soro päsed na ma, ndä paye mäxasa tä ma nasa. ²⁴ Na sägänoxsas ma sängadeccä täma ka, “Bazuwec, bazuwec, kogkatäng täzänggä xäs!” Na mägoxa na madux megede, na dampajeygä ma kädokalasa na kasebesäno.

²⁵ Na mängade täsa ka, “Wi siye anggo menedeng ngakang songang?” Na nyigadäg kamen sa na sägäsäydä agäsa na samänäno ka, “Xänanang kanang? Rejede megede na ma na dänge ngakeneng!”

Matakä Ligitiga Tasiny

²⁶ Yasuwa na menggä räbke käca'dä ma na dämpejig kä'docco tä cabärä Gäresa tä xining tagä Calil. ²⁷ Ani Yasuwa kebesanäs exene tä ndandangang, 'doxtiyandäng näs me nya cabäri käpasa täma kängga tasinyatäng tä wane. Ndä kaleygädä kälägä tandä song ndä uccu tä pa song basa tä warä morota.

²⁸ Na mägox Yasuwa na mapere, madeläng täzäg tagä Yasuwa na mägädawa paccy ka, “Oxadi tagog tä pidi naging Yasuwa, Pächä Kalägi Tiyating! Kanyixay gi ka ndakä nycälixti agä!” ²⁹ Mängade tä Yasuwa mänang xa Yasuwa kadux käxa tasti tä wanämang ka wetä tunyu tä wanäma. Ndä nyacotädasa ma taxä mange, ndä kän cäkili exenggäma na asänggäma na kacägaliny ndä meske ma. Neng mä'dexe ndä käxa tasti tä wanämang koyadas ma tä owda kaculdox.

³⁰ Yasuwa kamän ma ka, “Säbängäs gi xäng?” Na mängade ka, “Säbängäs agä Katiba” xa kängga tasiny mangedcä tä wanäma.

³¹ Na kängga tasiny käpaydä ta Yasuwa ka ndakä yaxsas sa tä owdi sägäpätäsuno tängang.

³² Ndä buduruginyatäng mange siyacca tiyati tä päxä cobocoboric na kängga tasiny käpay Yasuwa ka mädokas sa tä wadäkä buduruginy ndey ka sä'docco nang na mägä'dakas sa täng. ³³ Na kängga tasiny kawetäcco täwang apangzi kä'docco tä buduruginy mangeng, na kasog buduruginy kawu'daka colonggo kamäxasa tä zäg. ³⁴ Menggä megäskä buduruginy kox 'dogi kasogkuwang na koyo kawasesäning kä'docco käduwaley tä kaxsä pa na tä enggä cabärta.

³⁵ Na kän kawetäcco paye zay 'dogi kasogkuwang, na sawuno ta Yasuwa. Sa'doxa nya apangzi kängga tasiny kawetäcco tä waneneng, ze kalay appoyo, kälagäwa na tandu na kä'doc käcca tä warä exenggä Yasuwa na kän kalaye nyägadiny. ³⁶ Känggi kox 'dogi kasogkuwang ta apangzi kängga tasiny kawetäcco tä waneneng, kaläpe tä känggi kox songang.

³⁷ Na kala menggä Gäresa kä'day na känggi kakukury cabär kä'dayang käpay Yasuwa ka 'doc wangasa sa xa nyigatäg kadele sa. Na Yasuwa ka'deg dämpejigse ka 'doco, ³⁸ na nya apangzi mägäcay kängga tasiny tängang käpay ka sä'docco nang, neng Yasuwa kayaxsas ma tä pa. ³⁹ Läpede täma ka, “Mele wede tä panägo na pari ngaki Kaläg kasog täng.” Na mägä'doc mägäduwaley tä kaxsä pa tä 'dogi Yasuwa kasog tämang.

Yasuwa Däxici na Nayacca

⁴⁰ Yasuwa kämel tä Calil na xä'dä käpaxas ma xa satäng tä benggä ma. ⁴¹ Ndä apangandäng säbangäs Yayurus näs ngondow kamen axä paliccä Yaxudiny kä'doc kudukurusa tä warä exenggä Yasuwa, käpay ma ka sä'docco nang tä pane, ⁴² xa penämandäng nuxung layis päxä ux jendäkke asiny wang pädax paye äxsä.

Yasuwa kamen akäsog, na xä'dä kagur ma de bungu ma. ⁴³ Ndä uxandäng tä warä xä'dä tamicce colowa tä jendägka asiny wang pädax ndä käxa däxändäng song. ⁴⁴ Cawung tä ongu Yasuwa ndä cäpära munu tandänäma, na tetex waxäd kädokalasa.

⁴⁵ Na Yasuwa kamänze ka, "Xänang käpära agäng?" Na kän kä'day kagil, na Putros kabuc ta Yasuwa ka, "Bazuwec, xä'dänong kä'day kagur gi ndä bungu gi!" ⁴⁶ Neng Yasuwa ngade ka, "Agä kabäle ka kigkandäng käpära agä xa panggudug kawetäcce tä wanang."

⁴⁷ Na ce uxi cabäle ka cä'danyewa song na caparängwa tunyu na cawung cädätägä cadeläng ta agäma. Na caläpe 'dogi kasog cägäpära Yasuwang na däkxi tetex kasoguno täceng tagä xä'däni kä'day. ⁴⁸ Na Yasuwa ngade täce ka, "Penang, menekä ngakägi tagä känay gi. Wede na modey."

⁴⁹ Ani musku mälegeccenäsang, nuxu kigkandäng käpätäng pang Yayurus kawung ngade ta Yayurus ka, "Päxä penägi käxsä, wanga dereyga me bäldic winy." ⁵⁰ Yasuwa kädäng ngaki na maläpe ta Yayurus ka, "Wanga kärekä nga, yä mene ngakang winy, xa coxsada."

⁵¹ Ani Yasuwa kăcogus pang Yayurusang, mawang kän kaläs ax nama song basa Putros, Yoxana, Yaxup, Yayurus na uxe.

⁵² Na'anggäsagi tä pang ngeyigkang sāngeccä na sāgunuccu tä ngakä ce, neng Yasuwa kawung ngade täsa ka, "Wanga ngeyig ka cägäxsä song casändä winy." ⁵³ Na sagug ma, xa säyex beyin ka cägäxsä.

⁵⁴ Na Yasuwa kamen andäce na ngade täce ka, "Päxä ux, ngäsa tiyati."

⁵⁵ Na ronguccäce kämel, na tetex cangäsa. Na maläpe täsa ka sädoga nuxu 'dog täce cäsi. ⁵⁶ Menggäsa kädongo tä ngaki mänang. Na mägä'dedeyza ka ndakä säläpe 'dogi kasogkuwang tä nuxu kig.

9

Yaxsakä Känggi Yasuwa Käligä Asiny Wang Pädaxang

¹ Yasuwa kuduri känggi mägäligä asiny wang pädaxang, na madoga panggudug täng kä'dayga na butug ndey layenäs kängga makadas kängga tasiny tunyu na däxi kän ² na mayaxsa sa ndey ka säduwaley bugundugku Kaläg na sädäxä känggi täxäccäng. ³ Mäläpede täsa ka, "Ndakä seley bagang nuxu 'dog nanggo tä wedäg song, kala keced na 'dogu pokakä tandu, na siyad na ariyaliny, na ndakä bagang tandu nanggo. ⁴ Ndä pani käläsangang, nycicci täng basa xongondi wangetäsänang kaxsä pa tängang. ⁵ Kaxsä pana kănoccang täng kängge kabokasa anggo songang, ndä mpadang wangesänang kaxsä pang, 'diskisining kăräptänicci ta exenggäong ndey layis ngakä ngastänggäsa ka kănoccang ndä sagixi yaxsuwiccä Kaläg song." ⁶ Na samen sog sägä'docco sadus kaxsä pa säduwale yaxsäwecci apo lege ngakä Kaläggang na sädäxä kän tä ota bägälic.

Xirudus Käbabangwa tä Ngakä Yasuwa

⁷ Buguning Xirudus kädäng ngaki kä'day kasogäningang tä wexekä Yasuwang, na zäma kaxsäwa paccey xa kulung kän ngadeccä ka käxong kanang ndakä layis Yoxana me Pac kangäsa tä xäs, ⁸ ndä kulung kän ngadeccä ka acaka layis me logey Iliya nyaza kaparaswa täsa. Ndä musku kulung kän lege ka mänang nuxu me logeyga waneng kangäsa. ⁹ Xirudus ngade ka, “Kaluwi zä Yoxana tä pox yä mändey xänanang kalugsi sälege ngakeneng?” Na Xirudus kasäkesawa paye ox Yasuwa.

Yasuwa Käsiy Kän Päsäciny Mädäg (5,000)

¹⁰ Känggi Yasuwa kälägäng kämele, na saläpe ngaki kä'day sawexang ta Yasuwa. Na mabag sa sägä'docco sapälesäning säpaxadas bo pana säbangäs Petsayida. ¹¹ Neng xä'dä kapungung owduma na käräbkädä ma. Na mabokasa sa ndä mälegety sa na ngakä butugku Kaläg na mägädäxä känggi paye däxang.

¹² Xong paye 'däng, na känggi mägälägä asiny wang pädaxang kawuno ngadeccä täma ka, “'Daki xä'dänong, ndey 'docco täwang kaxsä pa ndey 'dox owdu säng na siyad, xa kogkatäng tä owda kaculdoy.” ¹³ Neng Yasuwa kämeley täsa ka, “Anggo dogi siyad täsa.” Na sabuc täma ka, “Siyatatäng layis käka kätäx song basa raxifiny mädäg na as pädax tol. Basa anoccig anganyig siyad tä känggong kä'dayakang.” ¹⁴ Sangad ngakong xa apanginyatäng päsäciny mädäg (5,000) tä warä xä'dä. Na Yasuwa läpede tä menggä räbke ka, “Wanga sa säccasäno tä ud taxä udiny pädax wang asiny (50).” ¹⁵ Na sasog kala ngaki maläpasang. Na kän kä'day käcasäng täzäg.

¹⁶ Na mabag raxifinygi mädägang na aski pädaxang na mägäsa tiyati na malog Kaläg ndä mälarä siyad mädogä ta menggä räbkäma ka sälarta tä xä'dä. ¹⁷ Kä'daygäsa sasiza samasa, na ani kalayang sanyaptä landa asiny wang pädax.

Bucuku Putros ta Yasuwa

¹⁸ Xongenendäng Yasuwa kangäsa kä'doc palacca watägke, ndä menggä räbkämatäng nama na mamän sa ka, “Kän ngadeccä ka agä anäs xäng?” ¹⁹ Na sa sabuc täma ka, “Näs Yoxana me Pac, kulung kän ngadeccä ka me logey Iliya, na musku kulung kän ngadeccä ka nuxus menggä logeygi wane käxseng nuxungang kangäsa.” ²⁰ Na mängade täsa ka, “Yä anggo ngadaccang ka agä anäs xäng?” Na Putros kabuc ka, “Almasini Kaläg kayaxsängang.” ²¹ Na madästä sa seley ka ndakä saläpe tä nuxu kig song, ²² mängade ka, “Agä, Pächä Käxa Jul anycäläxtiwa tä nga mange, ndä ngondowiny na bazuwinygä tämed tä Kaläg na menggä lelericcä asiriyenä Musa pexke agä, na säpaxe agä ndä tä sängga kodos angäsata tä xäs.”

Ndey ka Layis Seley Me Räbkä Yasuwa

²³ Yasuwa ngade tä kän kä'day ka, “Käxi paye ndey layis me räbkangang basa 'diya ngakä ngase ndä poka kalic todotol na räbkädä bangang. ²⁴ Xa käxi paye ka xony rongicce täzäg tä ngakä ngaseneng, mesede yä käxi paye mese rongicce täzäg tä ngakangang 'doxo aygä lili. ²⁵ Oxadi kig 'doxo tä bangä tangandäg tä walangic kä'day yä edekeny mese rongicceneng?” ²⁶ Käxa ze maye tä agä na tä legeygangang, Agä, Pächä Käxa Jul alayis käxa ze maye täng tä xongondi awunodung täng tä xongondu däädäxticcang na tä däädäxticcä Appa na malayikadagi tedelinyang. ²⁷ Ndä gang seley aläpedäng tango ka, kulung känatäng tä warägo ässeccä song basa ox bugundugku Kaläg.”

Pasakä Yasuwa ta Menggä Logey Musa na Iliya

²⁸ Yasuwa käbäldeyze ndä mäsaṅg tespedespe, na mabag Putros na Yoxana na Yaxup sägä'docco tä zä cabär tä paley. ²⁹ Yasuwa palacca na toccäma kalay caka na tanduguma wuxeccä, ndä dulatulajeccä bowiny. ³⁰ Na apangas pädax kaweyesäno kadeb legey nama, apangaskenegi menggä logeyag, Musang na Iliya. ³¹ Sägaleta na tädäxtic dulatulaje na salegeyze na Yasuwa tä ngakä melgäma tiyati ka mä'doc tä Ursalim ndey ngaki Kaläḡ kangatang 'desesäning täng.

³² Ndä Putros na känggi nangang kasändäcco, na sägoxsasa na agäsa käyer na sägox tädäxticcäma na apanginy pädax dokoloccu nama. ³³ Na apanginygi pädaxang kamen sog, na Putros ngade ta Yasuwa ka, "Bazuwec, wunakog todong apoccu. Nycugo abola telegudi kodos, nuxu tägi, nuxu ta me logey Musa na nuxu ta me logey Iliya." Xa mabäle 'dogi mälegeng song.

³⁴ Ani mälegeyis ngakongang timinggaric kawung kaxub sa, na salaye sänyigadiny. ³⁵ Na sägädäng ngasäwan tä kaxsä timinggaric ka, "Päxä penanggong nyang kaderasang, ndänge ngake!" ³⁶ Ani ngasäwan kalegezenäsang, Yasuwa ka'doxuwa watäke. Na sägämolosäning saläja 'dogi sägoxang tä nuxu kig song basa xongonda caka.

Cayḡ Ligida Tas tä Päxä Pipi

³⁷ Edekenydeneni sacoccoleza na zä cabär na xä'dä käpasasa täma. ³⁸ Na nuxu apangandäng tä warä xä'dä kabandäsa ka, "Me bälidic, kanyäxay gi ka xony penang xa nyang nuxu tagä tolang!" ³⁹ Ligida tas teldedes ma na sogo ma mädawē ndä nyäpapaxe ma na sogo guxudunic päkädäng ikäma ndä wange ma mänungu song, cäläxti ma nano. ⁴⁰ Ndä kampäy tä menggä räbkägi ka cay ligida tas tä wanäma ndä kadeḡes sa."

⁴¹ Na Yasuwa kabuc ka, "Anggo menggä zong menekä ngakäḡo bedeccä ndä näsang menggä sogo ngaka tasiny! Alayde nanggo ka'das wi dexä ampanye ngakäḡong? Koying päxä penägi todong."

⁴² Sagoying päxä pipi ngäte ta Yasuwa na ligida tas kacodasa pipi täzäḡ pappaxe. Na Yasuwa kadux ligida tas, na kala Yasuwa känay päxä pipi na kämeles ta mena. ⁴³ Na todi kän kädongo tä panggudugku Kaläḡi mänangang.

Yasuwa Kanimäng Xäske

Na todi xä'dä kä'day käledäning tä 'dogi Yasuwa wexeng, na Yasuwa ngade tä menggä räbke ka, ⁴⁴ "Mene legeygong tä mäḡanyḡäḡo, xa agä Päxä Käxa Jul sä'doc sämenedes agä ta asängḡä menggä kurang." ⁴⁵ Ndä sa sabäle legeygi malegeyag song, xa bange ka'danywa täsa ndey ka ndakä säbäle. Ndä sänyigate mänekä ma tä legeygi mäḡälajängang.

Xänang Ngake Tädäxiny Tanggong?

⁴⁶ Na kala matakä nga kadebäning tä warä menggä räbkä Yasuwa ka xänang täsa ngake tädäxiny mo'do acängganang. ⁴⁷ Neng Yasuwa kabäle ngaki sabokasa tä mäḡanyḡäsa, na mabag päxä pipi mäḡatokalasa tä wanäma. ⁴⁸ Na malegeyze täsa ka, "Käxi paye päxä päxkunong na agangang, paye agä. Ndä käxi paye agäng, paye Kaläḡi kayaxsä agäng. Xa käxi biyey tä waräḡo kä'dayḡagong, nyang ngake tädäxiny mo'do acängganang."

Käxa Layis Me Kurugi Songang, Biskonuging

⁴⁹ Yoxana kabuc ta Yasuwa ka, "Bazuwec, ka'doxig nuxu kigkandäng caye kängga tasiny tä wadäkä kän na agäḡi, ndä wa kampayedig ka

andokoleyig ma xa mäs me räb na was song.” ⁵⁰ Neng Yasuwa ngade täma ka, “Wanga dokoleygä ma, xa käxi näs me kurog säxongang biskonogkang.”

Menggä Samriya Käpexkä Yasuwa

⁵¹ Säggä Yasuwa kalaye bälaxiny ndey ka Kaläg bag ma tiyati, na mägädiri Ursalim. ⁵² Na todi Yasuwa kayaxsa menggä yaxsäwec kapäccasa tagäma, na sägäcogä ow, na saläs kaxsä pang menggä Samriya ndey säbolasa ow täma. ⁵³ Neng menggä kaxsä pa kabäle ka Yasuwa 'do tä Ursalim, na sägäsekä ma.

⁵⁴ Ani Yaxup na Yoxana menggä räbkä Yasuwa koxäs mänangang, sängadeccä ka, “Bazuwec, mpaye was abandig masä Kaläg täzä koxa ndey tuny nycokong kä'day?” ⁵⁵ Neng Yasuwa kawexeswa täsa na kadux sa, ⁵⁶ na sawetädese tä kaxsä pana caka.

'Dogi Bede tä Räbkä Yasuwang

⁵⁷ Tä zänggä wedäkäsa ta akäsog, nuxu accäsa kangad täma ka, “Agä a'dorto banggi todi noco tängang.” ⁵⁸ Na Yasuwa ngade täma ka, “Atorndoru axinygä kudufuganatäng na awiny axinyganatäng, yä agänang Päxä Käxa Jul panangandäng song.”

⁵⁹ Mändey Yasuwa ngade tä nuxu accäsa ka, “'Dorkäda agä.” Neng kämeley täma ka, “Bazuwec, wanga agä accig anoc abosu appanang.”

⁶⁰ Neng Yasuwa ngade täma ka, “Wanga känggi käxseng bosu kängganagi käxseng, yä gi wede duwala bugundugku Kaläg.”

⁶¹ Na nuxu accäsa kasan ngade ka, “Agänang a'dorto gi, Bazuwec, neng bende agä accigäne anoc angada tä menggä panang.” ⁶² Na Yasuwa ngade täma ka, “Käxa seley danada ande tä sicci ndä gawada ze tongang kädäppa bugundugku Kaläg song.”

10

Yasuwa Kayaxsa Menggä Räbke Tunyu tä Wexed

Udiny Kodos, wang Asiny Wang Pädax (72)

¹ Yasuwa kayaxsa menggä räbke udiny kodos wang asiny wang pädax (72) ka päccasa pädapädax tagäma tä bonggu padäg na tä otagi kä'day ma Yasuwa mäpaye mä'doc tängang. ² Mängade täsa ka, “Jeded mangeccä yä wadi menggä wexed bälaxiny. Neng gang mäne Bazuweccä jeded ndey yaxsäng menggä wexed tä jeded.

³ “Wesi! Ayaxsadas anggo tunyu ka'das sagunuga luluduwin yä kāraka tä pidi. ⁴ Ndakä bagang ariyaliny mange, na mändey meldänä wedäg, na dataginy axinyga pädax, na ndakä galedetäsänang tä kän ta akäsog song.

⁵ “Känoxang käläsang pang, päcci ngada ka, ‘Wanga modeygä Kaläg laye tä panong!’ ⁶ Ndä käxa mägaxse paye modey tä owdiyang, modey layeccä täng, yä wundungang modeygägo layeccä täsa song. ⁷ Nycicci tä nya panä ziya na wuxi siyaki sadogung tanggong, xa me wexed kädäppa ka sädoga dericce. Wanga 'däla'dälangey tä padäg winy.

⁸ “Känoxang käläsang bo pang, ndä kän kabokasa anggong, ziya 'dogi säguxis anggo nangang. ⁹ Ndäxi känggi täxäccä 'tä cabärang na lapi täsa ka, 'Bugundugku Kaläggkatäng nanggo!’

¹⁰ “Yä käläsang bo pa ndä kängge kabokasa anggo songang, wesi tä akänggä sota na ngada ka, ¹¹ ‘Käräptänicci bo panägonong ta exenggäskong a'diskidinig tanggo ndey layis ngakä ngastänggägo ndä

bäli ngakong ka, Bugundugku Kaläg kala kawuno ngäte.’¹² Ndä ndänge, xa tä sanydä ow, ngakong layeccä tasiny täsa mo’do aki kasoguning tä Sudumang!*

¹³ “Woyoy tä menggä pang Korusin! Woyoy tä menggä pang Petsayida! Xa kä’dang weränicci kasoguning tanggo sogkuwa tä Täya na Sayidunang kax sägämele mäganygäsa tä ngaka tasiny wane, säccatetasäng tä atilisiny, säbugu zänggäsa na uskuc na saxse mäganygäsa. ¹⁴ Neng xongondi xukumzä Kaläg wunodung tängang, nga layeccä bedeccä tanggo paccey ‘diti aki tä Täya na Sayidunang!’¹⁵ Ndä anggo menggä Kafärnaxum, anggo noxadang ka edekeny Kaläg dädäxti anggo tiyati? A’a! Wadi kala sägawadas anggo tä mas!

¹⁶ “Käxa kädäng ngakägong kädäng ngakang, yä käxa käpexkä anggong käpexkä agä ndä käxa käpexkä agäng käpexkä Kalägi kayaxsä agäng.”

Menggä Räbkä Yasuwagi Udiny Kodos Wang Asiny Wang Pädxang Kämele (72)

¹⁷ Kala menggä räbki udiny kodos wang asiny wang pädxang (72) kämele na led, ngadeccä ta Yasuwa ka, “Bazuwec, mändey kangga tasiny kädängäng nga täwas na agägi!”¹⁸ Na kala Yasuwa ngade täsa ka, “Agä kanox Däniye kápätäng zä koxa kadeläng kala mälamälajegä koxa. ¹⁹ Ndänge, agä kadong panggudug tanggo ndey dereterejeyseng zänggä dolu na dänu na mändey ndey mo’dasang me kurugo Däniye, ndä ‘doga siye anggondäng song. ²⁰ Yä musku, wanga led ka ligitiga tasiny kädängäng nga tanggo, wadi ledäning xa agägo garekärejesäning tiyati tä pang Kaläg.”

²¹ Na tänya axä owdi Yasuwa käligäwa na Ligidä Kaläg na mägäledäwa mängade ka, “Agä andädäxti gi Appanang, Bazuweccä tiyati na täzäg, xa gi kä’dany ngakong tä menggä leleritäg na kanggi yeräninyang, yä käparäng tunyu tä enggä pipu. E, Appa, xa wanägi tidi täng. ²² Appananggi tiyating nyang kadong ngakong tagä kä’dayang. Appanangang tol seley yex agäng, Ndä agänangang tol seley ayex Appangang, na mändey kanggi agä käpay ka aparas Appanang tängang kăcag tol baledes mang.”

²³ Na kala Yasuwa kawexeswa ta menggä räbke kabodsa nang na ngade ka, “Baxändäg tä agäwanggi lale ‘dogi anggo zayadangang!’²⁴ Ndä agä aläpedäng tanggo ka menggä logeygä Kaläg mange na buguninginy käpay ka laley wegkong laladangang ndä kox song, sapaye ka sädäng ngakong ndängedäng ndä sägädäng song.”

Serekä Ngakä Apangza Apo tä Samriya

²⁵ Xongenendäng, me lelericcä asiriyenä Musa kangäsa paye ka läbä Yasuwa, na ngade täma ka, “Me bälidic, oxadi kädäppa ka asog ndey a’dox aygä liliyang?”²⁶ Na Yasuwa ngade täma ka, “Oxadi garekärejesawa tä asiriyenä Musang? Anggo käbäleng wi tängang?”²⁷ Na me lelericcä asiriyenä Musa kabuc ka, “Asiriye ngade ka, ‘Paya Bazuwec Kalägägi na mägaxsägi nuxung, na rongiccägi kä’day, na kutegtäggägi kä’day, na ngakä zägi kä’day’, na ‘paya menggä sogalinyägi kä’day ka’das paygi mpayis ngasäging.’”²⁸ Na Yasuwa ngade täma me lelericcä asiriyenä Musa ka, “Gi kubuc ngakong appoyo, sogä mänang ndey nay.”

²⁹ Ndä me lelericcä asiriyenä Musa paye bokung ngase tuny, na ngade ta Yasuwa ka, “Xänang näs me sogaldangang?”

* 10:12 Kaläg kaduny menggä Sudum na Amora na mas xa kafulo sogo ngaka tasiny.

³⁰ Na Yasuwa kabuc täma näs legedänic ka, “Apangandäng kacoccoleza tä Ursalim 'docco tä owda säbangäs Arixä, na kadel ta asänggä menggä bärada na kamen ma kawid ma, käbadä ma ndä wangasa ma tä enggä xäskä bälaxiny.

³¹ “Na todi me tämed tä Kaläg kälaxäng kacoccoleza na nya akäsogi ma'doxung apangzi menggä bärada käbadäng sängo täzäg na mapop-poreza mägalang cengic. ³² Na mändey me Lawi me posakä me tämed kawung kälaxäng na kox apangzi sängo täzäg na kapopporeza käläng cengic. ³³ Yä me Samriyani näs me pungutang wede kawung tänya owdu 'doxti sägäbadäng na mägox nya 'doxti sängo na agäma kawasa täng.

³⁴ “Na mägä'doc täng masenyndä penduge ndä mädogä mid täng ndä mäbodey ndä mäpoka tä kaccänäma. Magoya taxä aloc ndä mädäxä.

³⁵ Na edekenydeneni mabag ariyaliny pädax mädogä ta me aloc, mängade täng ka, ‘Meskäde 'doxtong appoyo ndä wegki noco wanyäs tämanng awunodung ameledäng tägi kä'day.’

³⁶ “Tä känggong kodosakang, xänang kädäppa ka näs me sogal tä 'doxti menggä bärada käbadäng?” ³⁷ Na me lelericcä asiriyenä Musa ngade ka, “Käxi age kawasa tämanng.” Na Yasuwa ngade täma ka, “Neng wede sogä kä'das ma mänang.”

Mariyom na Marsa

³⁸ Yasuwa na menggä räbke wedetese na kala sägä'docco saläsa nuxu kaxsä pa na uxandäng säbangäs Marsa kuxis ma xa mäsa palangasic.

³⁹ Ndä ce Marsa päxä bosandäng säbangäs Mariyom kacca todä exenggä Bazuwec Yasuwa delde wunde tä bäldeccäma. ⁴⁰ Yä Marsandäng dalewa tä wexed xa cäpaye cäwex wexed kä'day na cawung ta Yasuwa cängade ka, “Bazuwec, gining seley mpaye ngakang xa'de? Päxäsko kawangäng wexed tagä kä'day. Lapi täce ka cäpos agä.”

⁴¹ Na Bazuwec Yasuwa kabuc täce ka, “Marsa, Marsa, gining göre nga ndä käwoldoxu na'do tä ngakä weg mange. ⁴² Wadi 'dogkandäng nuxu payewa. Mariyom kadere ngaki apoccu pacceyang, 'dogä bate täcendäng song.”

11

Palic

¹ Xongonendäng Yasuwandäng palacca tä owandäng. Mägädokala paley na nuxu me räbkäma ngade täma ka, “Bazuwec, bälde was na paley, kala ani Yoxana käbäldeyis menggä räbkeneng.” ² Na Yasuwa läpede tä menggä räbke ka, “Känoxang mpadang palezangang, paleyzi ngada ka, Kaläg, Appani tiyating wanga agägi laye tädäxiny wanga bugundugkägi wuno täwas.

³ Togung zäx täwas todotol,

⁴ na saxäng ngaka tasinygusko täwas, xa was wasaxedig nga tä känggi sogo ngaka tasiny täwasang. Ndakä wang ngakä längädäsko kawas was tä sogkä ngaka tasiny.”

⁵ Na Yasuwa läpede täsa ka, “Kädäppa ka nuxu accägo biskonenendäng, ndey 'doc täng tä pälic läpe täng ka, ‘Bisko, bege agä pugandagä zäx kodos, ⁶ xa biskonang kápätäng wedäg kawung tä panang, ndä 'dogä tä andangandäng song.’ ⁷ Ndä biskonäma meley täma ka, ‘Wanga daw tagä. Xa kala kädäränggälisnig na penggang tax kasändäccig. Päx angäsata tiyati adogodung nuxu 'dog tägi song.’ ⁸ Agä aläpedäng tanggo ka, kax apang uccu tax na ngäsata togada nuxu 'dog ta biskone xa ka biskoneneng

song. Neng apang ngäsata togada 'dogi biskone payeng xa biskone ze kama tä mäneke song.

⁹ “Aläpedäng tanggo ka, mäne owdu 'dog ndey sädogung tanggo, nyamgäda 'dogi mpadangang ndey 'doxang, dотора sogal ndey sälenge tanggo. ¹⁰ Käxi mänecceng 'doxo 'dogi payeng ndä käxi nyamaccang kaledäng, na käxi totoro sogalang sälengede täng. ¹¹ Xänang tä warägo näs appa pene kanyixay axsic täng ndä doga dol tängang, yä sax togakä axsic tängang? ¹² Na cong pene kanyixay gäldic täng, ndä toga dân tängang? ¹³ Anggogi ndasinyangang yexeng togakä wegka apoccu ta penggägo, neng seley Kaläg, Appani Tiyating togada Ligide tä känggi mäne mang!”

Yasuwa na Pelizipul

¹⁴ Yasuwa kăcay kăxa tasta kădogosojeý apang. Ani kăxa tas kawetäsang, apangzi kalayis togojosang kalegesa, na xä'dä kădongo. ¹⁵ Na kulung acănggăsa ngadeccă ka, “Yasuwa caye kăngga tasiny na panggugu Pelizipul buguningză kăngga tasiny.” ¹⁶ Kulung kăn paye lăbă ma na ngadeccă ka măsog bolic pătăng tiyati.

¹⁷ Yă Yasuwa kabăle ngaki tă măganygăsang na măngade tăsa ka, “Bugundugka kălartănong wanyetăsăno, ndă caxsăwanda kălarăwang, telgedăng. ¹⁸ “Yă gang butugku Dăniye kălarănong, bugundugke dokoloccu key? Agă kamăn anggo xa anggo gasedănang ka agă anycaye kăngga tasiny na panggugu Pelizipul. ¹⁹ Ndă gang agă anycaye kăngga tasiny na panggugu Pelizipul, anggo mēggă răbkăgo caye na panggugu wi? Neng mănangang, sa săparedăng anggo tunyu ka nyceluwinyang. ²⁰ Yă gang agănang anycaye kăngga tasiny na andă Kalăgkang, mănangang bugundugku Kalăg kăcogu anggo.

²¹ “Apangza pădăg kăyiwa na wegkă pogutang meske pane, na ka'dăka'dină pane kă'day. ²² Yă apangza pădăg pacceý kasakas ma ndă kamo'das mang, soro bupsu pogudumani măpăse andăma nangang na bate wegkăma lare.

²³ “Kăxa nagă songang me kurangang ndă kăxa poso agă tă wexed songang mace tagă.”

Melgă Ligida Tas

²⁴ Yasuwa legecce ngade ka, “Ligida tas kawetă tunyu tăwang kigkang, tusu otaga ma wundung tăng nyame owda nundu tăng neng 'doxo song. Na ngade tăngase ka, 'Neng mănangang amelege tă boxu pananggi kawangasang.’ ²⁵ Na nyămele nyă'doxada boxu pa worowa kălexejeg na weg repetăsăning. ²⁶ Ndă nyăwede măndey nyă'do nyăgodung kulung ligitiga tasinyga paxtinding mo'do nya, ndey să'doc sălăs săcuccu tăng, ndey săsog 'doxti cuke laye tasiny mo'dă cukenegi tăzălăgkang.”

²⁷ Ani Yasuwa kalegeyăs ngakongang, uxandăng tă wară xă'dă kădawa ta Yasuwa ka, “Baxăndăg tă uxi kiyăng ging na ki'digi kă'dey ging!” ²⁸ Yă Yasuwa kămele tăce ka, “Wadi baxăndăg tă kănggi dănge ngakă Kalăg na wexeng!”

Boliccă me Logey Yunan

²⁹ Xă'dă kaposwa, na Yasuwa kadab legeý ngade ka, “Zong sogo ngaka tasiny pacceý, zong paye agă ka asog boliccă sogowa tăng, ndă boliccandăng dogadaswa tăng song basa boliccă me logey Yunan. ³⁰ 'Dase ani Yunan kawunăs kalayis bolic tă mēggă Niniwa, agă Păxă Kăxa Jul măndey alayis bolic tă zong. ³¹ Buguningză uxandăng năs năkă anda

tázäg ngäsata na känggä zong tä xongondu xukum. Na cäsogo asiriye siye sa xa cägäpätäng tä 'denga ndey cädäng lelericcä Seleman. Ndä kigkanang todong nake tädäxiny mo'do Seleman! ³² Menggä Niniwa ngäsotäsäng na menggä zong tä xongondu xukum. Na säsogo asiriye siye menggä zong, xa ani Yunan kábäldeyis menggä Niniwang, sägäxaje tä ngakäsägi säsogo tasinyang. Ndä kigkanang todong nake tädäxiny mo'do Yunan!

Owda Bow na Owda Jul

³³ “Käxa banye lampane ndä 'danye na gumudi 'dog tängandäng song, basa bokasa täzä tumu ndey känggi lästäng towang zayza nang. ³⁴ Awunuging näs banyiccä wanäging. Känox awunugi apong, wanägi bägälic päse nyipäxxkic, yä awunugi tasang, wanägi bägälic lätäng. ³⁵ Neng gangang bäli, nyipäxxkiccägi ndakä layis lätäng song. ³⁶ Ndä gang känox wanägi bägälic päse nyipäxxkic ndä nuxu cengiccenendäng tä lätä songang, wanägi bägälic päse nyipäxxkic kala pappareygä lampa.”

Yasuwa Kadux Farisiny na Menggä Lelericcä Asiriyenä Musa

³⁷ Yasuwa kä'dese legeyge na nuxu Farisiccandäng kabadä ma ka sä'docco sägur siyad tä pane. Na Yasuwa kä'doc kaläs tow na sägäccasäng sagur siyad. ³⁸ Ani Farisic koxus Yasuwa paye siyza yä ka'dayis asängge täbangä tanyara songang, kädonga. ³⁹ Na Bazuwec kalegese täma ka, “Neng gang anggo Farisiny 'dayadang ondugu satugugo yä kaxsängga kaganye. Yä anggog mänang. Mäganygägo päse kuruguru na tastäg. ⁴⁰ Ama anggo abadiny, anggo 'diyang ka Kaläkgang teye wanä 'dog na kaxseneng? ⁴¹ Wadi dogi weg tä känggi widäningang na mäganygo nuxung, ndey ngakä mäganygägo na wexekägo laye kälexejeg tagä Kaläg.

⁴² “Woyoy tanggo Farisiny! Anggo dogadang asiny tä udiny mädäg tä kenyu na enggä ewegä log tä Kaläg, yä musku anggo bigiding däppic na payiccä Kaläg! Wadi kädäppa ka anggo dogang wekgong tä Kaläg yä wangang bigigä däppic na payiccä Kaläg. ⁴³ Woyoy tanggo Farisiny! Xa mpadang cad tä otagä dädäxti tä axä paliccä Yaxudiny na mpadang ma'ditegä modey tä otagä nganyatada! ⁴⁴ Woyoy tanggo! Xa kä'dasang morotaga kasabe, kän wedeccä tä zängga ndä yex song!”

⁴⁵ Na nuxung me lelericcä asiriyenä Musa kabuc täma ka, “Me bäldic, legeyis ngakongang langatag täwas mändey.” ⁴⁶ Neng Yasuwa kämeley ka, “Woyoy ama menggä lelericcä asiriyenä Musa mändey! Anggo ndarandadang kän na ngakä asiriye ndä siyada tä wadäka, yä musku taxä nuxuza anggo dogadang asänggägo täng tä posad song! ⁴⁷ Woyoy tanggo xa anggo donyadang morotagä menggä logeygi wawanagkägo kapaxang. ⁴⁸ Ka'das ka anggo gixing na kábäleng wexekä wawanagkägo, xa sapaxtä menggä logey ndä anggo kädonyandang morotaga! ⁴⁹ Nenyang Kalägi yex nga kä'dayang ngade ka, ‘Agä ayaxsada menggä logey na känggi sägäligäng täsa, ndä kulung acängga säpaxe na sämaceccä täng säpexke.’ ⁵⁰ Ndä zong layis näka asiriye siye tä tamiccä menggä logeygi kacolasäwa cawu tebiccä ow, ⁵¹ cawu tamiccä Xapil na tä tamiccä Zakariya, ani sapax tä kaxsä kaldä axä tämetang. E, agä aläpedäng ka layeccänäs ngakä ngastänggä zong. ⁵² Woyoy tanggo menggä lelericcä asiriyenä Musa! Anggo kädäringgiling sogaldä yexkä nga! Anggo käläsang na ngastänggägo song, ndä käzekeng känggi paye läsang.”

⁵³ Ani Yasuwa käpayis ka wetä tä pang Farisiccang, menggä lelericcä asiriyenä Musa na Farisiny kadeb maccad tasiny täma, na samän ma seley

na mäned tä nga mange, ⁵⁴ ndey sänyamgädäs rakawza sämen ma täng tä ngaka mälege.

12

Nyigata Kaläg, Wanga Nyigatägkã Kän

¹ Ani xä'dä kädurisäno kasog päsciny dexä bungudäningang, Yasuwa kadeb legey täzälägäne tä mēggä räbke ka, "Meskädäning tä 'daziccä Farisinygi näs fonofoneyang. ² 'Doga ka'danywang, 'doxowa ndä 'doga kabotwa näs raj paredängwa tunyu. ³ Ndä gang ngaki bägälic kangadäning ongutang dängewa säxe, na ngaki käbodang taxä ndongang düwaledäning tä owda lenge.

⁴ "Aläpedäng tanggo biskodagang ka wanga nyigatägkã känggi paxe wanäwanang, xa mändey 'doga sogo täbängenendäng song. ⁵ Wadi aläpedäng tanggo ka käxi kädäppas ka nyigatangang, nyigata Kaläg xa nyang tol panggudug täng gawadas anggo tä mas tä xongondu xäskäsong. E, aläpedäng tanggo ka, nyigata Kaläg! ⁶ Päx atodu mädäg sänganyada na mälininy pädax song? Yä musku nuxung atoduwiccandäng ka'diyaswa tagä Kaläg song. ⁷ Ndä näs tire apaxki täzäging Kaläg kägänasa. Wanga nyigatäg, xa anggo ngakägo bedeccä mo'do atoduga mange.

⁸ "Aläpedäng tanggo ka, käxa 'dade awage na agä tagä kän ka räbo agäng, agä, Päxä Käxa Jul mändey a'dade awagang nang tagä malaykadagä Kaläg. ⁹ Yä käxa käli agä tagä känang agä mändey agäli tagä malaykadagä Kaläg. ¹⁰ Ndä käxa lege ngakä maccad tä ngakang, agä Päxä Käxa Julang, nyäwangada nga täng yä käxi degeje Ligidä Kaläggang nyäwangada nga täng song. ¹¹ Yä sagoying anggo tagä axä paliccä Yaxudiny na buguninginy na ngotorpodang, ndakä gäredeng ngaka mäxising nang na tä 'doga legedeng, ¹² xa Ligidä Kaläg lapedäng 'doga legedeng tänya owdi."

Serekä Ngakä Apangza Kadangandey ndä Ka'darandey

¹³ Nuxu kigkandäng tä warä xä'dä ngade ta Yasuwa ka, "Me bäldic, lapi ta päxä bisko ka walarig malenä appanang." ¹⁴ Neng Yasuwa ngade täma ka, "Amo, xänang kamenäs agä buguningang de azaye ngakäsong?" ¹⁵ Na mängade täsa ka, "Lengi agägo na meskade ngastänggägo tä 'dara, xa rongicca 'doxowa tä dangandäggandäng song."

¹⁶ Na maser nga täsa ka, " 'Doxtiyandäng näs tanganic pelowge kiyang päxä kuny, ¹⁷ na mängade ka, 'Asogowa key, ndey a'dox curuna ngotey adoga kunyang tängang?" ¹⁸ Na kala mängade ka, 'Basa asog 'dogong, apaxatasa curugang yä adonyo käka ngoniny, ndey acolda kuny täng na ka'däka'di bägälic. ¹⁹ Ndä angad tängasang ka, "Gi ka'däka'dinägi mange käyoka mange layis näkä jende, buduldi, sisi, wuxsi, na ledewa!"

²⁰ "Na kala Kaläg ngade täma ka, 'Ama abad! Ondunong analedäng rongiccägi tägi tunyu, yä xänang lugu ka'däka'dini käwex tängasäging?" ²¹ Käxa xikitäsa weg tä ngase mänangang, wadi tangandäggkenetäng tagä Kaläg song."

Kaläg Paye Ngakog

²² Yasuwa ngade tä mēggä räbke ka, "Aläpedäng tanggo ka wanga kärekä ngakä ayyägo, na wegka ziyadang na tä wadäkägo tä tanduga lagadang. ²³ Xa ay mo'do siyad, ndä wanäwan mo'do lag.

²⁴ "Lala atämidinggaru wacca song ndä zäbecce song, ndä cunananandäng song, yä Kaläg ziye. Ndä Kaläg paye anggo paccey mo'do

awiny! ²⁵ Xānang tanggo kärekä ngake posada sāngädic tä rongeneng?
²⁶ Ndä yexeng ka kärekä ngakägo posada sāngädic tä rongiccägo songang, wi siye anggo gäredeng ngakä kulung wegkang?

²⁷ “Lala dudulus 'dongoccu key, ndä wexekanatäng song, ndä secce song. Neng musku aläpedäng tanggo ka, kala Seleman tä bugundugke kälägä tandäna kusu kala nuxu dudulusiccong song! ²⁸ Ndä Kaläg nyaza nyägädel dudulus mänangang, ndä uccu todong xongong ndä edekeny sädoxus mas tä boxu tämä'di'diccä zex. Kaläg paye anggo mo'do dudulus. Wi siye anggogong menekä ngakä Kaläg bälaxiny tanggo mänangang?”

²⁹ “Ndakä makadang bandagä wegka ziyadang na wegka wuxiding na ndakä gäredeng ngakä weg. ³⁰ Xa känggi kä'day tä walangiccang, mate bandagä siyad na wuxid, ndä Appani Tiyating yex 'dogi mpadängang. ³¹ Anggo basa makadang bangä ngakä Kaläg ndä nyädogung weg tanggo käsär.

³² “Anggo menggä räb kä'dasang sagunu, wanga nyigatäg xa Menggoni Tiyating wane tidi xa buguningzägong na meske anggo. ³³ Nganyi wegkägo kä'day larti tä känggi widänong. Yawi malenägo tä pang Kaläg tä kaxsä meldugi boxsoccu na cereduno songang, na me bära bate songang na tondoc wanyäs songang ndey meskädä wegkägo tä pang Kaläg tiyati. ³⁴ Xa owdi mälenägo tängang nyang mäganygägo padasang.

Bolosäning tä Melgä Bazuweccägo

³⁵ “Laga tandugu wexekägo na meskade lampadagägo kusuccu kä'day. ³⁶ Layi kala kängga bene käxa ngondeza päkädäng owdu ledä batad, ndey mawung madotorezang ndey lenge bäling täma tetex. ³⁷ Baxändäg tä cäläxinygi käxa ngondey 'doxodung oxacca kasändäcco song tä melgämang! Aläpedäng zänggä nga tanggo ka, ma täzäma mälage tandugu wexed, na mähogkatasa sa, ndey mälarta siyad täsa! ³⁸ Kax mäwung tä pälic na mä'doxodängza soxacca, baxändäg tä cäläxinygi mänangang! ³⁹ Wadi bäli ka kä'dang me pa yex xongondi me bära wunodung tängang kax meske pane wange me bära läso song. ⁴⁰ Anggo mändey layesi kängga cuccu meskedäning, xa agä, Pächä Käxa Jul awunodung ndä xongondeneneni bäledesäwa song.”

⁴¹ Na Putros ngade ta Yasuwa ka, “Bazuwec, gining zere ngakong täwas wala kän kä'day?”

⁴² Na Bazuwec kabuc ka, “Xānang kädäppa ka mpäse andäqi nang na kalelerey tä menekä wexetang, xānang käxa ngondezä wexed bokatasa mene menggä wexed tä ande ndey togadas dericcä menggä wexed layde songang? ⁴³ Baxändäg tä me wexeki käxa ngondeze mele 'doxodung wexecceng. ⁴⁴ Aläpedäng zänggä nga tanggo ka, käxa ngondezä wexed menede ka'däka'di tä andä käxi mänangang.

⁴⁵ “Yä wadi nya me wexeki kä'doc kangad tä ngase ka käxa ngondezang kalaygädas tä mel, na kadeb badkä kulung menggä wexed, bade apänginy na uxu kä'day, ndä siyacca na wuxicci de bux paxeng, ⁴⁶ ndä käxa ngondezä nya me wexeki nuxus wung tä xongondi sabokasa ka mäwunodung songang na tä sani säyex songang, na cäläxti ma, ndä matas ma tä owdu märinginy. ⁴⁷ Ndä me wexeki yex ngaki käxa ngondeze paye ndä wexe song na käbolasa ngase songang, 'doxo bad mange.

⁴⁸ “Wadi me wexeki yex ngaki käxa ngondeze paye songang ndä wex songang säbade päxä bälax winy. Käxa sadoga weg täng mangeng, säpaye täng mange, ndä käxa saposa weg täng mange ka mendäng, säläge payge täng mange.

Yasuwa Koyodung Modey Song, Mägodung Wasad

⁴⁹ “Agä kawung täzäg tä koyinakä mas, ndä ampaye ka nyandäng ganang tunyu walangic kä'day! ⁵⁰ Ndä mänang agä alayis käxa panye xuxubtäg ndä agäre bal a'dese! ⁵¹ Anggo noxadang ka agä kawung tä koyinakä modey täzäg? A'a, agä kawung tä koyinakä modey song, wadi kawung tä koyinakä wasad! ⁵² Caw xongong na ur'dug bäli ka kän mädäg tä pana wasetäsäning, kodos pase awaga na pädax ndä pädax pase awaga na kodos.

⁵³ Sa säwasetäsäning, menäwan kixidi pene apang song, ndä penäwan kixidi mena song,

bonuwan kixidi päxe ux song, ndä päxä ux kixidi bona song, ux kixidi uxä päxe song, ndä päxä ux kixidi wawana ux song.”

Bälädäniccä Bolu

⁵⁴ Yasuwa mändey kangad tä xä'dä ka, “Känoxang timingarugu zädongang, na kala bäledeng ka koxa käje na käje. ⁵⁵ Ndä känoxang megenä anda täzäg sageng, bäledeng ka kämpagänendäng sagedäng, na sagedäng. ⁵⁶ Anggo menggä fonofoney! Anggo yexeng tetebegä ngakä bolicca alacca täzäg na täzä koxang, yä wadi kasogänang key 'diyang tetebegä ngakä bolugu wexekong awexe ganangang?

Nyca Amusu tä Ngastänggägo

⁵⁷ “Wi siye anggo zaxadang terekä ngaka apoccong? ⁵⁸ Känoxang noccang na me pokakä nga tägi tagä buguningang, mäpädagäsing ndey bolang ngakägo nama ta akäsog ndakä mägozas gi tagä buguning, xa buguning menedes gi tä andä polisic, ndä polisic rikidis gi tax. ⁵⁹ Agä aläpedäng tanggo ka, anggo 'doxadang tunyu song basa degänang na milin!”

13

Yasuwa Kabandä Kän ka Xaje tä Ngaka Tasiny

¹ Xongondi Yasuwa bäldeccenäsang, kän kawuno kaläja täma ka Pälatis kapax kulung menggä Calil ndä kurupu tamicca na tamiccä wegki sadämze nangang. ² Na Yasuwa kabuc täsa ka, “Neng anggo käbokosänang ka menggä Calilgi sapaxang sag tasiny mo'do wayaka nyang kasog sapaxang? ³ A'a, aläpedäng tanggo ka bal anggo xajang tä ngaka tasiny mändey xa na'anggägo näxsecceng mändey!”

⁴ Na mändey Yasuwa ngade täsa ka, “Känggi bägäliziccä kumagi kadeles zängga käxse asiny wang tespedespe tä Salonang, anggo ngeredeng ka sa sädasiny paccey sämo'do känggi kä'day tä Ursalimang?

⁵ A'a, aläpedäng tanggo ka bal anggo xajang tä ngaka tasiny mändey xa na'anggägo näxsecceng mändey!”

Seredäniccä Etä 'Damina Iye Säxong

⁶ Yasuwa kaser nga ka, “Apangandäng käsäbä etä 'dami tä pelowge, na xongonendäng mägä'doc mäpaye ka metä enggenge neng ma'doxa ze pälo. ⁷ Na kala mälapede tä 'doxti meske pelowang ka, 'Tä jendäg kodos agä amelde awunodung ndey ka a'dox päxä 'daminong ndä a'doxodung ze pälo. Dagasa täzäg, taxä wä 'dog uccu ndä wanyis zäkgang? ⁸ Neng me megäskä pelow kabuc täma ka, 'Bazuwec, accig wanga etong jenong yä anoc abosu boxe adoga mudura täng. ⁹ Ndä zayig cong kiye baydangang, yä kasax iyetang, ndä lusa täzäg.’”

Yasuwa Kädäxä Uxandäng näs Mexes tä Xongondu Sapid

¹⁰ Yasuwa bäldecce tä nuxu axä paliccä Yaxudiny tä xongondu Sapid, ¹¹ ndä uxandäng tänya owdi ligida tas kämexestey tä jendägka asiny wang tespedespe. Nyägonggosey ce kasog ce seley cäyex dokol kätay song. ¹² Yasuwa kox ce na kabandä ce na ngade täce ka, “Kala käwulegeswa tä ngguxtug.” ¹³ Na Yasuwa kädana asängge täce na tetex cägädokol tiyati kätay na cägädädäxti Kaläg.

¹⁴ Na käxa ngondezä axä paliccä Yaxudiny käsänga ta Yasuwa xa Yasuwa kädäxsi tä xongondu Sapid, na ma käxa ngondey mäläpede tä xä'dä ka wexed wexedäning tä sängga aran. Käxa täxäng wung sädäxä täng ndakä wung tä däch tä xongondu Sapid. ¹⁵ Na Bazuwec Yasuwa kabuc täma ka, “Anggo menggä fonofoney! Anggo nuxu accägondäng tä xongondu Sapid uludi tigide na cong näs kaccäneneng ndey koya tä wuxid song? ¹⁶ Yä cezong cäs päxä pe Apraxim, Däniye gun onguce tä jendägka asiny wang tespedespeng, awang 'dakakä ce tä co'dic tä xongondu Sapid?”

¹⁷ Ani Yasuwa kangadäs legeygongang, menggä kuruma kä'day zängga kamaye yä xä'dä kä'day kaledäning tä wexeki kädong sa Yasuwa wexeng.

Yasuwa Kädupoy Päxä Yugicca Biyey na Bugundugku Kaläg

¹⁸ Yasuwa kamänze ka, “Bugundugku Kaläg ka'das wi? Oxadiyang agänang andäppo nangang? ¹⁹ Bugundugku Kaläg ka'das päxä yugicca biyey apang kabag käsäbesa tä kaxsänggä pelowge ndä 'donga layis apanggä ed yagäney, ndä awiny 'danydä axinyga tä acayadage.”

²⁰ Mändey Yasuwa ngade ka, “Oxadiyang agä andäppo na bugundugku Kaläggang? ²¹ Bugundugku Kaläg ka'das 'dazicca ux kabag ndä kurupu na duc mange ndä kamojey ndä pudi kä'day.”

Akäsogalda Kacäbaswa

²² Yasuwa kä'doc tä wedäg kadus kaxsä pa na enggä cabärta bäldecce ndä mäwedede tä Ursalim. ²³ Na nuxu kigkandäng kamän ma ka, “Bazuwec, enggä kän bälaxinyag Kaläg xonyong?”

Na mängade täsa ka, ²⁴ “Mpädägäsining ndey läsäng akäsogaldi kacäbaswang, xa aläpedäng tanggo ka kän mange zäge läsake ndä mo'dada läsacca song. ²⁵ Xongonda ledä pa kangäsa kärikä sogaldeneng, anggo wunosunang ndokalaccang tunyu dotoraccang ndä nyäxadang ma ka, ‘Bazuwec, wanga was aläsig!’ Neng mäbucu tanggo ka, ‘Agänang ayex anggo song ndä ayex owda känyuccing täng song,’ ²⁶ Na noccang ngadaccang ka, ‘Was kasiyzig na kawuxsig nagi, ndä gi käbäldeyze tä kaxsä panäsko.’ ²⁷ Neng mämele ka, ‘Agänang ayex anggo song ndä ayex owda känyiccig täng song!’ Nycengäning tä wanang, na'anggägo, anggo menggä sogkä ngaka tasiny!”

²⁸ “Na kala toti ngecceng na gasadang nyäxkägö tä oxakä Apraxim na Isxag na Yaxup na menggä logeygi kä'day tä bugundugku Kaläggang yä anggo tä ngastänggägo sä'dädadas anggo tunyu. ²⁹ Ndä kän päkätäsäng zä dong na tawiny na anda tiyati na anda täzäg wunosuno catetäsäng kuru siyad tä owdu Bugundugku Kaläg. ³⁰ Ndä seley kanggi päccadas ngastängganang, latasa tong yä kanggi latasa tongang, päccatasa.”

'Dockä Yasuwa tä Ursalim

³¹ Tänya xongondi Yasuwa legeccenäsang, kulung Farisinyatäng kawuno ngadeccä täma ka, “Wete wede wangasa owdong xa Xirudus paye pax gi.”

³² Neng Yasuwa kabuc täsa ka, “Wesi lapi ta atorundorini ka, ‘Laley, agä anycaye kangga tasiny na andäxäcci xongondong na edekeny yä mugundeneni ampele wexekang.’ ³³ Ndä gang agä awedede xongondong na edekeny na mugun xa kax kädäppa ka säpaxa me logey täpox song, basa tä Ursalim.’

³⁴ “Ama, ama menggä Ursalim, anggogi paxadang menggä logey na ‘dämedeng menggä yaxsäwinygi sägäligäng! Agä tol kampay ka agä anduris anggo kala kuxug na enggengge tä boxu kubugke neng anggo kämpayang song! ³⁵ Ndä ganang lala kala agä awangatasa anggo! Ndä aläpedäng tanggo ka, anggo mpasaccang nagä mändey song basa ngadang ka, ‘Baxändäg tä käxi wunodung na agä Bazuwec Kaläggang!’”

14

Yasuwa Kädäxä Apang tä Xongondu Sapid

¹ Xongondu Sapid Yasuwa kä'doc tä siyad tä pang ngotorponu Farisiny ndä kulung känatäng tänya owdi jenggere ma käsac. ² Ndä apangandäng tänya owdi exengge na asängge kapuruzu. ³ Na Yasuwa kamän me lelericä asiriyenä Musa na Farisiny ka, “Kädäppa ta asiriye ka kig däxsi tä xongondu Sapid wala kädäppa song?” ⁴ Neng säpulocä na todi Yasuwa kädana ande ta apangzi kädäxä na kayaxsas tä pa.

⁵ Na todi Yasuwa kamän sa ka, “Xänang tanggo pene täng na cong näs tigide kadel taxä gol tä xongondu Sapid ndä dägane tetex nyasedäng tunyu songang?” ⁶ Ndä sa sabuc ngakenegi song.

Käxa Coccoło Ngaseneng Kaläg Pokada Piyati

⁷ Ani Yasuwa koxäs palangas teredenäs otagä caka apoccong, maser nga täsa ka, ⁸ “Sabandä gi tä owdu batatang, ndakä dere owdu cakä kangga ngoniny xa nuxus nuxung kigkandäng sabandä ngondey tägi. ⁹ Ndä nuxus käxi kabandä anggong wung läpäng tägi ka, ‘Togi komong känyca tängang tä käxong ngondeyanang’, ndä mänangang zänggä matag tägi ndä sogo gi cengedeswa tä päxä owda biyey.

¹⁰ “Wadi kănox sabandä ging, wede icca tä päxä owda biyey ndey käxi kabandä gi kox ging, wung läpäng tägi ka, ‘Bisko, bo wede icca tä owda apo.’ Na kala kanggi täng kä'dayang bälede nyaygi sädogodung täging.

¹¹ Xa käxa poko ngaseneng Kaläg maye ze yä käxa coccolo ngaseneng, Kaläg pokada piyati.”

¹² Sax mändey Yasuwa ngade ta apangzi kabandä kăn tä siyatang ka, “Xongonda mpaye bandä kăn tä siyatang, acaka bandä biskodagägi na enggä bonggugo na wayagkägo na cong näs menggä sogalinygägigi kadangandeng ndey ka bandä gi tä siyad mändey. ¹³ Wadi xongonda käsog letang, banda menggä wiy na kappudiny na mexesu na ngojony. ¹⁴ Ndey baxändey, xa sa sämeledäng wegki sasiyang tägi song, gi 'doxo wegkägi tä xongondu ngäsakä kanggi lelexinyang tä xäs.”

Seredäniccä Leda Tädäx

¹⁵ Nuxung accä kanggi siyacca na Yasuwa tä pang Farisiccang kädäng ngaki Yasuwa kangatang, na ngade ta Yasuwa ka, “Baxändäg tä kanggi kä'day 'docco siyacca tä owdu Bugundugku Kaläggang!”

¹⁶ Neng Yasuwa ngade täma ka, “Apangandäng kasog led ngotey ndä bandä palangas mange. ¹⁷ Na tä xongondu led mayaxsä cäläxinygäma ndey ka 'docco läpe kanggi sabandäng ka wuno xa kala siyatatäng benecce.

¹⁸ “Neng kân kâ'day kadeb kerekâ nga. Nuxu kâxi tâ zälâgkang ngade ka, ‘Agânang kangany zâg ndâ ampaye anoc anycopu, wanga agâ anoc.’

¹⁹ Na mândey ani tâbangeneng ngade ka, ‘Agâ kangany tigitiğâ way asiny ndâ ampaye anoc azâgâ, wanga agâ anoc.’ ²⁰ Yâ 'doxti layis sanydâsang ngade ka, ‘Agânang andalewa xa kabagsa kâsactong ndâ awunodung song.’

²¹ “Na kala cälâx kâmel kâ'doc kalâpe ngaki ta bazuwecce. Na bazuwec ledâ pa kâsânga na lâpedes ta cälâkse ka, ‘Wede tetex tâ akâsogâ bo pa na ta akânggâ sotagâ kukujiy. Banggâda menggâ wiy na mexesu na kappudiny na ngojony ka wuno.’

²² “Neng cälâx ngade ka, ‘Bazuwec, ngaki kâlâpâng ka sogunong, kasog kala ndâ musku otagâ catatâng pâloccâ.’ ²³ Na kala bazuwec ngade ta cälâkse ka, ‘Wede tâ akânggâ sotagi ngoniny nâs sotagâ walangang, banggâda kân ka wuno ndey panang päs. ²⁴ Xa agâ alâpedâng tanggo ka acaka nuxu kâxi kabandâng ndâ saxang, wung pong siyakong!’ ”

'Dogi Bede tâ Râbkâ Yasuwang

²⁵ Xâ'dâ mänge wedeccâ na Yasuwa na mawexwa mälâpede täsa ka, ²⁶ “Kâxa paye wung 'doc nagâ ndâ paye agâ paccey mo'do paygi payis mena na bona na uxe na pengge na enggâ bongga na mândey ngase songang, layis me râbkang song. ²⁷ Kâxa poko kalicce ndâ râbo agâ songang, layis me râbkang song.

²⁸ “Xânang tanggo paye dony pane ndâ cata ndey gan na zay wegka 'desede tonyakâ pane nang songang? ²⁹ Kânox kânyca gärtâ nga ndâ bosasa kadasuwec appoyo na kâ'dese panâgi songang, kânggi kâ'day zaye panâging kugu gi. ³⁰ 'Docco ngadeccâ ka, ‘Apangzong kadonyza ndâ kâpany kâ'dese pane song!’ ”

³¹ Mândey mângade ka, “Buguningza key paye 'doc 'ding buguningza caka tâ pogud ndâ cata bâlede ngase ka 'do tâ pogud na asâgaruge päsâciny asiny (10,000) ndey mo'du buguningza kâne päsâciny utang (20,000)? ³² Ndâ mâyex ka mâ'dingi nya buguningzi songang, tâ cuku menggâ kurusa tâxande, mâyaxsada kulung menggâ bolic pâccatasa tâ legeygâ ngakâ modey. ³³ Ndâ mânang nuxung accâgondâng layis me râbkang song basa wangesânang wegkâgo kâ'day ndey râbkâdang agâ.”

Enggälokega Tasiny

³⁴ “Enggäloke apoccu yâ kalaye leminyang, sogoduning key meletäsâno tâ coccoydâgkang? ³⁵ Enggäloke kalaye leminyang, kax sâduki tâ zâg na tâ codoro na wexekanatâng song basa sâduki tâpox. Kâxa wunde dângecceng, dâng ngakong!”

15

Seredâniccâ Ngakâ Sagânda Kâmes

¹ Menggâ yawgâ tuluba na kânggi sogo ngaka tasinyang kawuno tâ dânggâ legeygâ Yasuwa. ² Neng Farisiny na menggâ lelericcâ asiriyenâ Musa ngunungunicci ka, “Apangzong bokatasa kângga sogo ngaka tasiny ndâ siyacca nang.”

³ Na kala Yasuwa kaser nga täsa ka, ⁴ “Xânang tanggo sagunu tâng udiny mädâg (100) ndâ nuxung mes ndâ wangatasa aki udiny tesped wang asiny wang paye nuxung (99) tâ korongic yâ 'doco tä nyamgâ ani nuxung kâmesang basa 'dox songang? ⁵ Ndâ kala ma'doxang mâpoko tâ baccugâma mälededeswa nang tâ akâsog. ⁶ Mâmelede tä pa, mâbange

aminuguma na mengga akäsogalinygäma ka, ‘Posa agä nycugo aledäning xa ka’dox sagändanggi kämesang.’ ⁷ Aläpedäng tanggo ka, ka’das nya bangi kân lededäning paccey tä pang Kalägi tiyating tä ngakä käxa nuxungza käxajä tä ngaka tasiny. Xa ledi tiyati tä pang Kaläggkang kamo’dü ledä aki udiny tesped wang asiny wang paye nuxung (99) lelexiny kamen ngakä Kaläggkang.”

Seredäniccä Ngakä Ariyaliccä Fudana Kämes

⁸ Yasuwa kawetäde na legey ka, “Cong näs uxa ariyalinygä fudada täng asiny ndä nuxung mesang, banye lampane ndä wortäcca paccey ndey ‘dox owde song?’ ⁹ Ndä ca’doxang cäbange aminuguce na mengga sogalinygäce cängade ka, ‘Nycugo aledäning xa ka’dox ariyaliccanggi kämesang.’ ¹⁰ Ka’das nya bangä ledong, aläpedäng tanggo ka, Kaläg na malayikadage lededäning tä ngakä käxa nuxungza käxajä tä ngaka tasiny.”

Seredäniccä Apang na Pengge PädaX

¹¹ Yasuwa ngade ka, “Apangandäng mägccäng na engga pengge pädaX. ¹² Penämani biyeyang lapada täma ka, ‘Appa, ampaye larä male täwas.’ Na kala mesa kälarä male kadoga käma.

¹³ “Na tä sängga bälaxiny mägduri malenäma manganya kä’däy mägä’docco nang tä cabära täxande. Mägä’doc mawanye nang tä wexekä tawustug winy.

¹⁴ “Na kala mägä’dese malenäma, na buxu kamen nya cabäri na xas kapax ma paccey. ¹⁵ Na mängade tä ngasäma ka, ‘Anoco ta nuxu me cabärong ani buduruginyge tängang ndey ameskädä buduruginyge.’ ¹⁶ Mägä’doc ndä säleye siyad täma kasog ma mäpaye siyakä sa säpäarki mädogada ta buduruginyang.

¹⁷ “Na xongonendäng manimäng pang mesa na mängade tä ngasäma ka, ‘Wi siye agä anycu todong xas paxe agä, yä appanang wekenetäng mange mengga wexeke siyacca matasa de kulung tegeteseng.’ ¹⁸ Mängade ka, ‘Anoco tä pa ta appanang aläpede täma ka, ‘Appa, kasog ngaka tasiny tagä Kaläg na tagä gi. ¹⁹ Kandäppas ka bandäs agä penägi mändey song. Wanga agä alayis me wexiccägi.’”

²⁰ “Na kala mamen sog mämele tä pa ta mesa. Na mesa kox ma täxande na age kawasa täma käpaxas ma kagapas ma. ²¹ Na mängade ta mesa ka, ‘Appa, kasog ngaka tasiny tagä Kaläg na tagä gi. Kandäppas ka agä anäs penägi mändey song.’

²² “Neng mesa kabandä cäläxinyge ka, ‘Dägana goyining tandäni appoyong laga ma nang, na бага kälingic loxi tä päxä andäma na laga ma na käbadaga apoccu.’ ²³ Na mesa kabandä mengga wexed ka, ‘Goyining päxä ‘dämädi kawingang nycugo ampärki ma nang, na aledäning, ²⁴ xa päxä penanggong kämes neng sa’dox ma! Oxodig ka mägäxsä, neng manang mawung moxacca.’ Na kân käledäno.

²⁵ “Yä päxä penämani ngondeyang nyandäng tä pelow na kala kawung wede dänge tädäxä kân buldi na coxad na langad tä pa. ²⁶ Na kala mägädokala täxande mabandä me wexed mamän ka, ‘Oxadi kasiwa tä pang?’ ²⁷ Na me wexed lapada täma ka, ‘Päxä bonggo kämel kawung, neng menggo käpärkä ma na päxä ‘dämädi kawing pacceyang, xa mawung wanäma apo.’

²⁸ “Na mägäsänga malewa täxande na mesa kä’doc täma mäne ma ka, ‘Wi siye gi zaxe wunad towang?’ ²⁹ Na mängade ka, ‘Za, kalayigädä nagi ewexecce tägi kala cäläx ndä ande ngagigi, yä kax taxä nuxu kädong päxä

ayis ka apax asig na aminugang song. ³⁰ Yä pächä penäginong kasax gi, kabag malene kä'doc kawanye nang na tabany, ndä kawung kämpärkä na käledäwa täng.'

³¹ "Na mesa kabuc täma ka, 'Penang, ging nagä tol ndä wegkang kä'day kinggig. ³² Yä pächä bonggonong kämese täpox neng sa'dox, oxodig ka käxsä neng manang mawung moxacca, nyang kasog kämpärkä mang ndey ledänig.'"

16

Seredäniccä me Menekä Wegkä Käxa Kadangandey

¹ Yasuwa kaläpe tä menggä räbke ka, "Apangandäng näs tanganic saläpe täma ka me menekä wegkäma kawanydäs weg. ² Na ma 'doxti kadangandeyang kabandä me menekä wegke kamän ka, 'Oxadi kasiwa andänge sälege ngakä wexekäging? Genesa wexeki käwex kä'dayang xa gi mändey noco layis me menekä wegkang song.'

³ "Na me menekä weg ngade tängase ka, 'Oxadi gang asogkang, xa bazuweccang paye caye agä tä wexekangang? Agä ampädäg de ka awacca song ndä zänggä matag tagä ndey ka anyäxayza. ⁴ Ayex 'doga asogo ndey kax säbogkung agä tunyu tä wexekang na kän bokatasa agä tä padägka.'

⁵ "Na kala mabanggädä känggi kamendä amusudi tä 'doxti kadan-gandeyang nunuxundi. Na mamän ani täzäläggkang ka, 'Gining bazuweccang paye tägi käreny?' ⁶ Na nya apangzi kabuc ka, 'Bälegkä belenyinygä midä kuluc udiny mädäginy tespedespe (800).' Na me menekä weg ngade täma ka, 'Koyung faragiccä amusunugi icca täzäg tetex gärekärejesa udiny mädäginy tesped (400).' ⁷ Na mändey me menekä weg kamän 'doxti nuxungang ka, 'Gining bazuwec paye tägi käreny?' Na nya 'doxti kabuc ka, 'Mäpaye landägä guruwec päsic nuxung (1,000).' Na me menekä weg ngade täma ka, 'Baga faragiccä amusunugi gärekärejesa udiny mädäginy tespedespe (800).'

⁸ "Na bazuwec käboxey me menekä wegki käläkaläjang xa mawexse na yerändäg. Xa känggi mene ngakä Kaläg songang, yeräniny tä wexekanagi wexe na acängganang mo'do känggi kamen ngakä Kaläggkang. ⁹ Ndä aläpedäng tanggo ka zoga biskodagägo na bangä tangandäggkä walangic, ndey edekeny asänggägo kalaye päloccung, ndey säbogkasa anggo tä pang Kalägi tiyating.

¹⁰ "Käxa mägaxse bow tä pächä 'doga bälaxang, mändey mägaxse bow tä wegka mangeccä, yä käxa mägaxse jul sogo raj tä pächä 'doga bälaxang, mändey sogo mänang tä wegka mangeccä. ¹¹ Känox gang mägaxsägi bow tä menekä tangandäggkä walangic songang, zogowa key mägaxsägi laye bow tä tangandäg tä pang Kalägi tiyating? ¹² Ndä känox mägaxsägi bow tä menekä wegkä käxa caka songang, xänang togodung känggi täging? ¹³ Me wexetandäng päx wexecce ta bazuwecciny pädax song, xa nyäsogo 'do paye nuxung paccey yä saxe nuxung. Mändey nuxus nyäsog gigili nuxung yä ndäridäswa tä nuxung. Kigkandäng dacada wexe ngakä Kaläg na ngakä male song."

Yasuwa Kalegeyze ta Farisiny

¹⁴ Farisinygi paye ngakä male pacceyang kädäng ngaki Yasuwa kalegey kä'dayang, na sagug ma näs anyad. ¹⁵ Neng Yasuwa ngade täsa ka, "Anggo läpedeng ngastänggägo tagä kän ka anggo mpocchang na'do yä dara Kaläg yex ngakä mägangyägägo. Wegkägogi ngoxodänang nang tagä kän na warä känang, tas tagä Kaläg.

¹⁶ “Asiriyenâ Musa na sorunu menggâ logey kawexse tâ loydgâgkâ ow basa Yoxana me Pac kawung. Ndâ kala yaxsâwecci apo lege ngakâ bugundugku Kalâgkang duwaleywa ndâ kala kân kâ'day kasâgkesâno ndey ka lās bugundugku Kalâg. ¹⁷ Zâkoxa na tâzâg way winy 'diti pâxâ munu jengicca sacarasa ta asiriyenâ Kalâg ka werwa.

¹⁸ “Kâxa kasax uxe ndâ 'doc bag uxa cakang, kasog ramic, ndâ kâxa kabag uxa yoxe kasaxang, ramacca.”

Yasuwa Kâlegâ Ngakâ Apangza Kadangandey na Apangza Wiywa

¹⁹ Yasuwa ngade ka, “Apangandäng kadangandey ndâ lagewa na tanduga dulatulajecâ ndâ todotol siye siyaka apoccu. ²⁰ Ndâ apangandäng sâbangâs Liyasir wane bâgâlic kâpoposu wunodung sângo tâ akâsogaldâ pang nyapangzi kadangandeyang, ²¹ paye ka 'dox enggâ siyaki teldeccâ tâ tumunu siyakâ mang ndey ka si. Ndâ isu wunosung laxte wanâmani kâpoposung.

²² “Na kala ani Liyasir kâxsâsang, malayikada kabag ma kagoyas ma tâ owdi Apraxim tângang. Na apangzi kadangandeyang mândey kâxsâ na sabosu. ²³ Na mägâ 'doc tâ mas na mägâsa tiyati moxada Apraxim tâxande na Liyasir kâcca tâ wane kâsac. ²⁴ Na mabandâsa ka, ‘Wawa Apraxim, wanga agâgi wayesâng tagâ, lapi ta Liyasir ka mâ 'doc mâluji pâxâ andâma tâ ma mâwung mädâlbes tâ nyiparang xa agânanganang tâ cälâxtâg tâ mas.’ ²⁵ Na Apraxim kabuc tâma ka, ‘Atâ, bâli ka tâ cuku gi tâzâg kâ'dox wegkâ apoccu kâ'day yâ Liyasir ka'dox wegka apoccu song, tabewa winy. Neng gang ma mägâluki buduldug yâ gi kâwalas tabi. ²⁶ Ndâ tâ ngakong kâ'dayakang, salu ow tâgog tâ pidi ndey ka kângga paye ca'dsa wuno tanggo tâ owdiyang, wunosung song na kângga tanggo tâ owdi paye wuno tâwas tâ owdongang, cogo owduskonong song.’

²⁷ “Na sax mândey apangzi kadangandeyang ngade ta Apraxim ka, ‘Wawa, ampaye gi ka yaxsa Liyasir tâ menggâ panâsko tâzâg ²⁸ xa enggâ bongguskotâng kawangasa mädâg ndey Liyasir 'doc daxâ sa ndey sâccagâ exenggâsa ndakâ sâdelese tâ mas ka'das agâ.’ ²⁹ Neng Apraxim ngade tâma ka, ‘Asiriyenâ Musandäng na sorunu menggâ logey wanga sa sâdäng ngaki legeng.’ ³⁰ Na apangzi kadangandeyang ngade ka, ‘A'a, wawa Apraxim, basa nuxung kâxa kâxsâ kangâsa tâ xâs kâ'doc kalâpe ngakong tâsang, sâxajecâ sâwange ngaka tasiny.’ ³¹ Neng Apraxim kâmeley tâma ka, ‘Kânox sâgädäng ngakâ me logey Musa na menggâ logeygi nasa songang, kax kig âxsâ ndâ ngâsa 'doc lâpe nga tâsa na sâdäng sâxong.’”

17

Yasuwa Kâbâldey Menggâ Râbke

¹ Yasuwa ngade tâ menggâ râbke ka, “Bâli ka ngatatâng wunosung gawadas anggo tâ ngaka tasiny! Ndâ woyoy tâ kânggi 'docco sogongang! ² Ndâ kâxi kâdâppa ka 'doco sogong, saxsa ngayiccâ ngorey tâ ngase ndâ sâgawa nang tâ colonggo 'diti togku kânggong mäganyga bowinyang tâ sogku ngaka tasiny. ³ Meskâde ngastânggâgo. Kânoxang pâxâ bonggo sogo ngaka tasinyang, duxi ndâ mägâxajâ mawang ngaka tasinyang, zaxi tâma. ⁴ Kax mäsog ngaka tasiny tâgi taxâ paxtânding tâ xongonda nuxung ndâ mameley ngasâma mâwung tâgi taxâ paxtânding mangad ka, ‘Agâ kaxajâ tâ sogku ngaka tasinyang,’ saxi tâma.”

⁵ Na kânggi Yasuwa kâligâng ngadeccâ tâma Bazuwec Yasuwa ka, “Posa menekâ ngakâ Kalâg tâwas!” ⁶ Na Bazuwec kabuc ka, “Kâ'dang menekâ

ngakä Kaläg tanggo biyey kala päxä yugicca biyeyang, kax läpeng tä etong ngoteyang ka zuduwa na mäxke 'doc udusawa tä kaxsä colonggo, na dänge ngakägo.

⁷ “Päx nuxung accägondäng cäläxse päkädäng pelow na cong näs megäskä sagunuwang na läpede tänya cäläxseneni ka, ‘Bo icca siysi?’ ⁸ A’a, wadi gi bazuwec noco läpede ta cäläxsägi ka, “Dayawa, wexe siyad ndey dogung siyad tagä accäg asiya na awuxsi ndä kala gang gi ziyza na wuxsi.’ ⁹ Bazuwec logo cäläxse xa ka kasog ngaki maläpe tängang song, päx mälogo täng? ¹⁰ Anggo mändey käwexeng wexeki agä kaläpäng tanggo ka wexeng, kax wexeng na noccang ngadaccang ka, ‘Was anäsig cäläxinyga täbangä wexeki wexedäningang nenyang kandäppig dädäxti song.’”

Yasuwa Kädäxä Menggä Omoda Asiny

¹¹ Ani Yasuwa kä'docus tä Ursalimang, mägäläng pidänä Samriya na Calil. ¹² Mägä'doc ngäte tä päxä cabär, na apanginyatäng layis menggä omoda asiny käpasasa täma na kadenggeze täxande, ¹³ kädawasa ngadeccä ka, “Yasuwa, Bazuwec, wanga agägi wayesäng täwas.” ¹⁴ Mägäxo sa na mäläpede täsa ka, “Wesi pari ngastänggägo ta menggä tämed tä Kaläg ndey säduwaley ka wadäkägo kalaye apoccu.” Na kala säwedetese na sa'doxung wadäkäsa kädäxäno salaye säpoccu.

¹⁵ Na nuxung accäsa kox wane kalay apo na kämel dawé dädäxti Kaläg. ¹⁶ Kä'doc kädukurusa tagä Yasuwa logo Kaläg, ndä ma 'doxti me Samriyang. ¹⁷ Na Yasuwa ngade täma ka, “Kandäxä anggo näsang asiny song? Kulung kanggi paye nuxungang sati? ¹⁸ Basa me pungudongang tol kämel kawung kädädäxti Kaläg tä ngakä däxkeneng?” ¹⁹ Na tänya owdi Yasuwa läpede tä nya me Samriyani ka, “Ngäsa wede xa menekä ngakägi tagä kädäxä gi.”

Bugundugku Kaläg Wunosung

²⁰ Xongonendäng kulung Farisiny kamän Yasuwa ka, “Xongonda keyang bugundugku Kaläg wunosung tängang?” Na Yasuwa kabuc ka, “Bugundugku Kaläg wunosung na bolu de oxowa song. ²¹ Oxowa ndey ka anggo ngadang ka, ‘Nyanang!’ na, ‘Nyani!’ song. Bugundugku Kaläгатäng nanggo kala.”

Päxä Käxa Jul Wunodung

²² Yasuwa ngade tä menggä räbke ka, “Owandäng wunodung ndä anggo noccang mpadang ka zang cukang, agä Päxä Käxa Jul tä butug, ndä zadang säxong. ²³ Ndä kän ngadeccä tanggo ka, ‘Lala, mani todil!’ na cong ka, ‘Lala, manang todong!’ Ndä ndakä ndängeng ngakäsa. ²⁴ Xa agä, Päxä Käxa Jul, xongondeneni awunodung kala wuxekä koxana banye tiyati na ota kä'day.

²⁵ “Ndä täzäläg basa agä anycäläxtiwa tä weg mange na mändey menggä zong pekkä agä. ²⁶ Ka'das wexeki kän kawex tä xongondu 'doxti säbangäs Noxang, mändey kän wexe sawexeki basa xongondi agä, Päxä Käxa Jul awunodung tängang. ²⁷ Kän siyacca na wuxicci na batacca na sädere bal koxasa xongondi Nox kaläsa kaxsä dämpejigseneng. Na faya kawung kapax kän kä'day.

²⁸ “Winy ka'das ani tä xongondu 'doxti säbangäs Lotang, kän siyacca, wuxicci, nganyacca ndä nganyatasa, ndä zäbecce na tonyacca, ²⁹ neng xongondi Lod kawetäs tä kaxsä pana säbangäs Sudumang, Kaläg kayaxsä

mas na nganyuga kusuccu kaduny kän bågälic. ³⁰ Ndä kän wexe nya bangongang, mändey laye kala xongondi agä, Päxä Käxa Jul aweyetesawa tängang. ³¹ Ndä tänya xongondi, käxi täzä ax yä wegke tä axang, ndakä coccoleza ndey ka bag wegke song na mändey känggi tä pelowang ndakä mele tä pa song. ³² Gärning ngaki kasoguno tä uxu Lotang!*

³³ “Käxa paye ka meske rongicce täzäggang wadi mesede yä käxa meske rongicce täzäg songang 'doxo aygä liliy. ³⁴ Aläpedäng tanggo ka ongudeneni kän tugu salany pädapädax, ndä Kaläg bate nuxu yä nuxu laye. ³⁵⁻³⁶ Mändey uxu pädax tugu ngoreygä kuny tä ngayicca nuxu, ndä nuxu ux säbate yä nuxu laye.”

³⁷ Na kala menggä räb kamän Yasuwa ka, “Tä owda key, Bazuwec?” Na mabuc täsa ka, “Owda wininy kädurisäno tängang, bäli ka wegka käxsetäng täng.”

18

Yasuwa Kälegä Seredäniccä Mandur na Buguning

¹ Yasuwa kaser nga tä menggä räbke ka palacca todotol ndakä cananga. ² Mängade ka, “Buguningandäng tä nuxu bo pandäng nyigate Kaläg song ndä nyaye kän song. ³ Ndä mändey mandurandäng tänya bo pani wunodung melde täma läpede täma ka, ‘Bo geye was na me kurang ndey ndäppoy was.’ ⁴ Täzälägäne buguning kalewa, neng magärtä ngaki mandur melde tängang, na mängade tä ngasäma ka, ‘Agä anyigate Kaläg song ndä anyaye kän song, ⁵ ndä mandursong nyanang gang nyalange agä todotol, bal anoc agey ta me kure xa cämelde tagä cäwange agä anungu song.’”

⁶ Na Yasuwa ngade ka, “Ndänge sele ngakä buguningza däppo kän song! ⁷ Yä päx nya Kaläg nyädäppo känggänyagi nyalebäng ngeyecä tänya säxe na ongutang song? Yä päx Kaläg waxe posakä kän? ⁸ Aläpedäng tanggo ka Kaläg däppo kängge tetex, yä tä wunakang agä, Päxä Käxa Jul, päx awunodung a'doxodung menekä ngakä Kaläg täzäg?”

Yasuwa Kaser Ngakä Farisic na me Yawgä Tuluba

⁹ Mändey Yasuwa kaser seredäniccong ta kulung känggi kabogkasa ngastängga ka yex ngaki wexeng ndä laleyis kän kängga winyang ka, ¹⁰ “Apanginyatäng pädax kä'docco taxä tämed tä paley, nuxung Farisiccong yä ani nuxungang me yawgä tulubang.

¹¹ “Na Farisic kangäsa tiyati kapaleza ngade ka, ‘Kaläg, alogo gi xa agänangang kala kulung kän song, kala menggä celdug song, na kala menggä ngananganegä nga song, na kala menggä ramiccu song, ndä agäng kala me yawgä tulubanani song. ¹² Tä sängga paxtinding, agä amene uxkud tä sängga pädax ndä aluwu asiny tä wegkänggi a'doxo udiny mädäggang (100) adogodung tägi.’

¹³ “Yä me yawgä tuluba kädokol täxande ndä gunusawa na zänggä mayad ngade ka, ‘Kaläg, wanga agägi wayesäng tagä, xa kasog ngaka tasiny!’

¹⁴ “Aläpedäng tanggo ka kala tä 'dockäsa tä pa, Kaläg kagixi me yawgä tuluba xa mägxaxe bow, yä Farisic, Kaläg kagixi song. Käxa poko ngaseneng, Kaläg maye ze yä käxa coccolo ngaseneng, Kaläg pokada tiyati.”

* **17:32** Uxu Lod kaweräswa sudu enggäloke xa cägaw zäce calala Sudum cäsaxe 'doc wangesänake.

Yasuwa na Enggä Pipu

¹⁵ Xongonendäng kân kagoying engga ta Yasuwa ndey ka mäpes. Neng menggä räb kox mänang, na sadux kân ka dokalas koyinakä pipu. ¹⁶ Neng Yasuwa kabandä pipu ka, “Wanga pipu wuno tagä, ndakä zekeng sa xa känggi 'dase pipugongang bugundugku Kaläg kânanag. ¹⁷ Aläpedäng zänggä nga tanggo ka, kâxa kâpay bugundugku Kaläg kala päxä pipi songang, Kaläg kixidi tä bugundugke song.”

Apangza Kadangandey

¹⁸ Xongonendäng bazuweccä Yaxudinyandäng kamän Yasuwa ka, “Me bälidic, gi mpoyo na'do, asogowa key ndey a'dox aygä liliyang?” ¹⁹ Na Yasuwa kabuc täma ka, “Oxadi kasog gi bangäs agä kâxa apong? Kâxa apondäng song, basa Kaläg nuxundugke. ²⁰ Anggo yexeng täsedänic ngade ka, 'Acaka rameyza, acaka paxsa, acaka lege celdug, nyaya menggo na bonggo.’” ²¹ Na nya bazuweccä Yaxudinygi kabuc ka, “Cawu biyeydäggang agändäng awexe ngakong bägälic.”

²² Yasuwa kädäng mänang, na lapada täma ka, “'Dogkandäng nuxung musku käsog song. Nganyi wegki täging kä'day larti tä känggi widunong ndey dangandey tä pang Kaläg tiyati. Ndä bag bangang.” ²³ Ani 'doxti kädängäs ngaki Yasuwa kalegey mänangang, mägaxse ka'dexwa xa madangandey nano.

²⁴ Yasuwa kox mänang na ngade ka, “Bede paccey tä kâxa kadangandey ndey ka läs bugundugku Kaläg! ²⁵ Tireneng ka kamalä läso axä wuladä 'diti kâxa kadangandey tä läsaka bugundugku Kaläg.”

²⁶ Na känggi kädängang ngadeccä ka, “Neng gang mänangang xänang seley xonyo ngaseneng?” ²⁷ Na Yasuwa kabuc ka, “Kâxa seley xonyo ngasenendäng song, basa Kaläggang tol xonyaccang.”

²⁸ Na Putros ngade ka, “Lala, kawangesänig wegkäsö kä'day ndey ka abagig banggi!”

²⁹ Na Yasuwa ngade täsa ka, “Aläpedäng zänggä nga tanggo ka, kâxa tanggo kawangasa pane na uxe na enggä bongga na mena na bona na pengge ndey ka wex ngakä Kaläggang, ³⁰ nyäposo täng mange mo'do aki kalayeng tä jendong na ur'dug tä 'doxakä aygä liliy.”

Yasuwa Kanimäng Xäske

³¹ Yasuwa kabag känggenegi kälīgä asiny wang pädaxang, kä'doc nang tä cengic na mäläpede täsa ka, “Kala lala, 'doccig tä Ursalim, ndä ngaki kä'day menggä logey gärekärejеса tä ngakä agä Päxä Kâxa Julang, 'docco 'desetäsänig tä owdi. ³² Kân 'docco menedes agä ta asänggä känggi näs Yaxudiny songang, sä'docco sängobo agä, säcäläxti agä ndä säpädadas agä. ³³ Sä'docco säbade agä na ke'diccä oxay, säpaxe agä ndä asängo pädax na tä sängädi kodosang angäsata tä xäs.”

³⁴ Neng känggi mägäliqä asiny wang pädaxang, kabäle bangä ngakämagi song, xa legeygi malegeyang kacungguli sa. Sabäle bangä ngaki Yasuwa lege täsang song.

Yasuwa Kalenge Agä Ngojox

³⁵ Ani Yasuwa kawunäs ngäte ta Arixang, apangandäng näs ngojox kâcca tä nyixtä akäsog nyäxacca. ³⁶ Na mägädäng tädäxä kân na mamänze ka, “Oxadi kiyang kasiwang?” ³⁷ Na säläpede täma ka, “Yasuwa me Nasra nyang wedeng.” ³⁸ Na kala mabandäsa ka, “Yasuwa, päxä pe Dawud, ata agägi wayesäng tagä!” ³⁹ Na känggi kädoleywang kadux ma ka

mäpāla neng mägādawa paccey ka, “Päxä pe Dawud, ata agägi wayesäng tagä.”

⁴⁰ Na kala Yasuwa kädokala läpede ka sägoyung ngojox täma ngäte. Sägojung ma ngäte na Yasuwa kamän ma ka, ⁴¹ “Oxadiyang mpaye agä asog täging?” Na mabuc ta Yasuwa ka, “Bazuwec, soga agä azayza mändey.” ⁴² Na Yasuwa ngade täma ka, “Laleyzi, menekä ngakägi tagä kaxony gi.” ⁴³ Na tetex agäma kalengesuno na mabag bangä Yasuwa, mädädäxti Kaläg. Kän kä'day kox mänang, na kädädäxti Kaläg mändey.

19

Yasuwa na Zaka

¹ Yasuwa kadus bo pana säbangäs Arixä. ² Ndä apangandäng tänya owdi säbangäs Zaka näs ngotorponu menggä yawgä tulbada kadan-gandey. ³ Mäpaye ka mälaaley Yasuwa neng mädäläng tä warä xä'dä kasog ma moxo Yasuwa song. ⁴ Na mägoy tetex mapäcca mägä'doc ma'deg zä balasu ndey ka mox Yasuwa, xa Yasuwa 'doco lange nya sogi.

⁵ Ani Yasuwa kăcogus owdumaniyang, koxas ma tiyati täzä ed na ngade täma ka, “Zaka, coccoleyzi tetex bo xa xongondong 'doccig cuccig tä panägi.” ⁶ Na tetex Zaka kacoccoleza kä'doc kabokasa Yasuwa tä pane na led.

⁷ Kän kä'day kox mänang na kangunungunizi ka Yasuwa kä'doc kalayis palangasiccä käxa sogo ngaka tasiny. ⁸ Neng Zaka kangäsa ngade ta Bazuwec ka, “Lala, Bazuwec, agä alare wegkang tä pidi adogada kulung tä menggä wiw, na mändey kasog käläkälajtäg tä wegkä nuxu kigkang amelede dogi payeng täng taxä tesped!”

⁹ Na Yasuwa ngade täma ka, “Xongondong Kaläg kaxony panong, xa Zaka tirä päxä pe Apraximang! ¹⁰ Xa agä, Päxä Käxa Jul kawung tä nyam na tä xonyakä kängga kämese.”

Yasuwa Kaser Ngakä Buguning na Cäläxinyge Asiny

¹¹ Ani xä'dä deldeyäs wungga tä legeygä Yasuwang, mawung ngäte tä Ursalim, ndä kän oxo ka bugundugku Kaläg kala wunosung kăccogus. Na todi maser nga täsa. ¹² Mängade ka, “Päxä pe buguningandäng kä'doc tä walangicca täxande ndey ka sädoga butug täng ndä mel. ¹³ Na kala ka mä'doco na mabandä cäläxinygäma asiny mägalarta ariyaliny täng asiny ka däseydä basa mämel mäwung.

¹⁴ “Neng känggäma paye ngakäma song na sayaxsa menggä yaxsäwiny ka läpe ka, ‘Ampayedig 'doxtong layis buguningzäsko song.’ ¹⁵ Ani mägä'docus sädoganäs butug täma ndä mämeläsang, mabandä cäläxinygämagi madoga ariyaliny täng ndey ka däseydäng. Mäpaye mäbäle wegki sa'dox tä zängganang.

¹⁶ “Cäläxsi täzäläggang kapäcca täma ngade ka, ‘Bazuwec, ariyalicci kädogung tagä nuxungang, kawexä ka'dox täze asiny.’ ¹⁷ Na buguning ngade täma ka, ‘Käwexä apo, gi näs cäläxsa apo! Xa mägaxsägi bow tä päxä 'doga bälax, asogus gi ngotorpo mene kaxsänggä padäg asiny.’

¹⁸ “Na mändey pädaxeneni kawung ngade täma ka, ‘Bazuwec, ariyalicci kädogungang kawexä ka'dox täze mädag.’ ¹⁹ Na buguning ngade täma ka, ‘Gi noco mene kaxsänggä padäg mädag.’

²⁰ “Na kodoseneni kawung täma ngade ka, ‘Bazuwec, ariyalicci kädogung tagäng nyanang kamulungiy na päxä nyonggo kayokas. ²¹ Xa anyigate gi xa ayex gi ka näs apangza mägxaxse täbag na'do. Ndä gi bate

maleni layis nänggi kä'dangas songang ndä jede wegki kázäbä songang.'
²² Na buguning ngade täma ka, 'Agänang amene gi tä legeygä ikägi, gi näs cäläxxa kadawustey! Yex ka agä anäs buguningza mägaxse täbag abate maleni layis nänggä ka'dangas songang, na ajede wegki kázäbä songang?
²³ Neng wi siye gi kä'danga ariyaliccang tä axä owdu däsey ndey koyung ze songang?"

²⁴ "Na buguning ngade tä menggä wexekenegi dokoloccung ka, 'Gujuyn-ing ariyalicci tämang tunyu dogi tä cäläxxong käne asinyang.' ²⁵ Neng sängadeccä täma ka, 'Bazuwec, noxo ma ariyalinygämatäng asiny!' ²⁶ Na buguning ngade ka, 'Aläpedäng tanggo ka käxi kädäsey wegkeneng aposo täng, yä käxi kädäsey käne songang, agujudung täng tunyu. ²⁷ Wadi gang menggä kurangong paye ka alayis buguningza songang, goyining sa tagang todong dämde ngastänggä sa!' "

Ndetelegunu Läsakä Yasuwa tä Ursalim

²⁸ Ani Yasuwa kä'desenäs seredaniccongong, mawetäde tiyati tä Ursalim. ²⁹ Kala mägä'doc ngäte tä enggä cabärtaga säbangäs Faci na Petani tä Cabärä Zayitun, na mägäpacca menggä räbkäma pädax. ³⁰ Mäläpede täsa ka, "Wesi tä päxä cabäri taggagong. Känocang käläsangang, 'doxadang päxä kaccäna taxä nuxung kig kasana täze song kaxsasawa todi. Nyuli goyining tagä todong. ³¹ Kä'doxang käxa kamän anggo ka, 'Wi siye anggo nyuliding kaccängang?' Läpi täng ka, 'Bazuwec paye.' "

³² Na sa känggi mayaxsa kapäccasang ka'doxa sangaki maläpe täsang. ³³ Säga'docco säludi päxä kaccä na letuge mäne sa ka, "Nyuliding kaccänong koyadang ti?" ³⁴ Na sabuc täsa ka, "Bazuwec paye." ³⁵ Na kala sagoya päxä kaccä ta Yasuwa sapetäde tandugusa tä onge ndä Yasuwa 'deg. ³⁶ Masana täze na kän kapetädesa tanduga tä akäsog ndey dädäxti ma tä laxänakäma. ³⁷ Kala mawung käsac tä akäsogi coccolacca päkädäng Cabärä Zayitunang, na menggä räbkäma kä'day daweccä lededänig dädäxti Kaläg tä wexeki Kaläg kawex sägoxang. ³⁸ Sängadeccä ka, "Baxändäg tä buguningzi Bazuwec Kaläg yaxsedängang! Modeyatäng tä pang Kaläg tiyati na dädäxtiy tä Kaläg!"

³⁹ Neng kulung Farisinyatäng tä warä xä'dä ngadeccä täma ka, "Me bälidic, daxa menggä räbkägi ka säpälasa." ⁴⁰ Na Yasuwa kämeley täsa ka, "Aläpedäng tanggo ka kax säpälasa na nganyugong dawatasä dädäxti agä!"

Yasuwa Age Kawayasa tä Ursalim

⁴¹ Ani Yasuwa kawunäs ngäte koxus Ursalimang, mangedä tä ngake, ⁴² mängade ka, "Anggo menggä Ursalim, kämeseng xa xongondong käbäleng ngaki koyodung modey tanggong song, neng gang kala mändey noxadang 'dogi koyodung modey tanggo song. ⁴³ Tä sänggi wunosunong menggä kurugo kakaradas anggo tä kaxsä cabär tä cende kä'day ndä räbadas anggo. ⁴⁴ Säwasadas anggo käked, anggo na penggägo säwange nuxu accägo tä kaxsä Ursalim song, ndä kax ngayicca säwange täzä wayanandäng song. Ngakong sogoduno xa anggo käjenggereng na käbäleng ka Kaläg kawung tanggo song."

Yasuwa Käyegeley Kän Taxä Tämed tä Kaläg

⁴⁵ Yasuwa kaläs kal taxä tämed tä Kaläg mägä'doc mamagäng menggä nganyad tunyu, ⁴⁶ mängade täsa ka, "Gärekärejesawa tä Sorunu Kaläg ka, 'Panang, pang paleyang,' yä anggo käsogasang axä menggä bärada!"

⁴⁷ Yasuwa bäldecce todotol tä kaxsä kaldagä axä tämed tä Kaläg. Ndä bazuwinygä tämed tä Kaläg na menggä lelericcä asiriyenä Musa na kulung ngotorpugä Yaxudiny nyame rajsa ndey ka paxäs Yasuwa, ⁴⁸ neng sa'dox rakawza ndey säpaxäs ma song, xa kän kä'day kagur ma delde wungga tä ngaki mälegeng.

20

Bugundugku Yasuwa

¹ Xongenendäng Yasuwa bälde kän tä kaxsä kaldä axä tämed tä Kaläg na mäduwale yaxsäwecci apo lege ngakä Kaläg tä känang. Na bazuwinygä menggä tämed na menggä lelericcä asiriyenä Musa na ngondowinygä Yaxudiny kawuno täma ² ngadeccä täma ka, “Lapäng, xänang kä'dakas gi ka wexseng? Xänang kadong butug tägi ka wexseng?” ³ Neng Yasuwa kämeley täsa ka, “Amäne anggo mäned ndä anggo buci tagä. ⁴ Kaläggang kä'daka Yoxana ka pacä känang, wala känag kä'dakas ma ka mäpacsang?”

⁵ Na sacengesuno tä cengic sabodsa watäkäsa sängadeccä ka, “Kax 'doccig ngadig ka, 'Näs Kaläg' na mä'do mängade ka, 'Wi siye anggo kämeneng ngakä ma Yoxana songang?’ ⁶ Ndä mändey kä'doccig kängadig ka, 'Näs känang,' kän kä'day 'däme kog na nganyu, xa kän oxo ka Yoxana me logeyang.”

⁷ Na sägä'docco sabuc ta Yasuwa ka säyex käxa kä'dakas Yoxana ka pacsa song. ⁸ Na Yasuwa ngade täsa ka, “Neng aläpedäng käxi kä'dakas butug tagä ka awexse nangang song.”

Seredäniccä Kängga Samene Zäg Täng

⁹ Yasuwa kaser legeg tä kän ka, “Apangandäng käsäbä pelowge, ndä menes tä menggä pelowatäng ndey meskädä yä kä'doc tä wedäg kalaygädä. ¹⁰ Kala weg kiye de säjede na mayaxsas cäläxsäma ka 'doc täsa menggä pelowgi mamene zäg tängang, ndey ka larä weg toga käma. Neng sa menggä pelowgi mamene zäg tängang kabadä cäläxsäma ndä matas täma na asängge päloccu mänang. ¹¹ Sax mändey mägälasä mayaxsa nuxu cäläx. Na mändey salandä ndä säbadä ndä sämatas täma na asängge päloccu. ¹² Sax mändey mayaxsa kodoseneni. Ani kala sägäbadä sägämexestey ndä säмага tunyu.

¹³ “Na ledä pelow ngade tä ngase ka, ‘Oxadi asog gangang? Basa ayaxsas tirä päxä penenggong ampaye ngake pacceyang nuxus sä'doc sänyay ma.’ ¹⁴ Ani känggi samene zäg täng koxäs nya penämaniyang, sägaxsäning sängadeccä ka, ‘Doxatongang luguccing, nycugo apaxa ndey lugig pelowge!’ ¹⁵ Na tetex samen ma sabokung ma tunyu tä kaxsänggä pelow sägä'docco sapax ma.” Na Yasuwa kamän sa ka, “Ledä pelowgi kámenes pelow täsang sogo sa key? ¹⁶ Ma mäwunodung mäpaxe känggi mamenes pelow tängang yä mädogada tä kängga cakuny.”

Na kala kän kädäng ngakong na ngadeccä ka, “Nyäzekä ngakong ndakä soguning mänang!” ¹⁷ Neng Yasuwa kalaley sa käteg na ngade täsa ka, “Ngaki garekärejesuno tä Sorunu Kaläggang ngadeccä ka wi? Ngadeccä ka, ‘Ngayicci menggä tonyad kapexkäng kalayis ngayicciä saluweccä kadasuweccä ax.’* ¹⁸ Ndä käxa kadep täzä nya ngayicciyang, nyäroborobogo yä käxa nyadeles zeneng, nyäregeregeje.”

* **20:17** Yasuwa bangäs ngase ngayicciä saluweccä ax.

¹⁹ Na tänya axä owdi menggä lelericcä asiriyenä Musa na bazuwinygä axä tämed tä Kaläg paye ka men ma xa sabäle ka maser ngaki täsa, neng sanyigate kän.

Yawgä Tuluba ta Kaysar

²⁰ Ngotorpodagä Yaxudiny jenggere Yasuwa käsac ndey ka sä'dox rakawza sämenäs ma na sayaxsas menggä raj ka 'docco paxesäning käräp sogosuning kangga apoccu. Säpaye ka sädäng lezey tä ikäma ndey sämenenäs ma tä andä buguningzä Romaniny. ²¹ Na menggä raj ngadeccä täma ka, "Me bälidic, wa ayexig gi ka nycofu'dono lezey ndä bälde zänggä nga tä ngakä Kaläg. Ndä päx gele kän song. ²² Gang kädäppa ka wa ayawig tuluba adogit ta Kaysar wala awangig toke?"

²³ Neng Yasuwa kabäle rajsi tä mäganygäsang na mängade täsa ka, ²⁴ "Doguning dinarsä Romaniny tagä. Läpäning ligidä xänang na agä xänang garekärejesuno tä ongeneng?" Na sängadeccä täma ka, "Näkä Kaysarang."

²⁵ Na Yasuwa ngade täsa ka, "Dogi wegki layis gäkä Kaysarang ta Kaysar, na aki layis käkä Kaläggang dogi tä Kaläg." ²⁶ Na tänya owdi sägädongasa tä ngaki malegeyang na sa'dox rakawza ndey sämenäs ma tagä kän song, na sägämolosuno.

Batad na Ngäsad tä Xäs

²⁷ Kulung menggä Yaxudinygi säbangäs Saduginy, ngadeccä ka kig äxse ngäsata tä xäs songang, kawuno ta Yasuwa. ²⁸ Sängadeccä täma ka, "Me bälidic, me logey Musa garekärejesa nga täwas ka apangza päxä bona kabagsa ndä äxsä yä kiyäng pipu songang, päxä bona bag nya mandursi ndey iyäng pipu tänya päxä bonanani käxsäng. ²⁹ Ndä enggä bonyatäng paxtinding. Päxä bonanani täzäläggang kabagsa ndä käxsä kawangasa uxe kiyäng pipu täng song. ³⁰ Ndä ani täbängeneng kasog mänang. ³¹ Kodoseneni kasog mänang. Sägädoneydä batakä ce uxi ndä sägäxse na'anggäsa paxtinding sägiyäng pipu song. ³² Na ce täzäce cägäxse tä bangäsa. ³³ Gang mänangang, xänang täsa 'do layis yoxuce tä xongondu ngäsad tä xäsang, ndä na'anggäsa sägädoneydä batakä ceng?"

³⁴ Na kala Yasuwa ngade täsa ka, "Menggä zong batacca na säbate. ³⁵ Xa kanggi lelexiny, ur'dug ngästätäsäng tä xäs tä xongondu ngäsad tä xäsang, batacca na säbate song. ³⁶ Ndä sa mändey säxseccä song xa kala sa'das malayikada. Säs enggä Kaläg, xa sänguso sa tä xäs. ³⁷ Mändey me logey Musa kabäle ka käxa käxsä ngäsata tä xäs. Ka'das ani garekärejesawa tä Sorunu Kaläg tä ngakä masi kagusi ta Musa tä kaxsetang, ani mabandäs Kaläg ka Kalägä Apraxim, Kalägä Isxag na ka Kalägä Yaxubang.[†] ³⁸ Kaläg Bazuweccä kangga oxaccang, päx näkä kangga käxseng song. Xa kän kä'day ayeccä tänya."

³⁹ Na kala kulung menggä lelericcä asiriyenä Musa kabuc tä ma ka, "Me bälidic, gi kälegeyze apo na'do!" ⁴⁰ Na todi sanyigatas mänekä ma.

Mäneki Padäyiny Yasuwa Kamänäs Kän tä Ngakä Almasiyang

⁴¹ Neng mängade täsa ka, "Oxadi siye sa sängadeccä ka Almasi näs päxä pe Dawutang? ⁴² Dawud täze ngade tä Sorunu Masmur ka, Bazuwec Kaläg kangad ta Bazuweccang ka, "Bo icca tä cengiccä andä abaniccang,

[†] 20:37 Kaläg kalegeyze ta me logey Musa tä kaxseti mas kangäsa täng ndä siye kaxsed songang.

⁴³ bal asog gi nyebesa menggä kurugi täzäg.”’

⁴⁴ “Dawud bangäs ma ‘Bazuwec,’ yä mälayis päxä pene key?”

Yasuwa Kädaxä Menggä Räbke ka Wang Poporey

⁴⁵ Ani kän kä'day deldeyäs wungga ta Yasuwang, Yasuwa ngade tä menggä räbke ka, ⁴⁶ “Meskädäning ta menggä lelericcä asiriyenä Musa. Xa säpaye lagkä tanduga apoccu säwalangeccä nang ndä säma'dite modey tä owtägä nganyatada na säpaye cad tä owtägä dädäxti tä axinygä paliccinygä Yaxudiny na owtagi sänyaye ngotoropu täng tä siyatang. ⁴⁷ Yä sägäläläläji wegkä manduriny ndä sädertesäno säpalacca mäna'ang. Känggi kala akakiyang, sag seley Kaläg 'doco cäläxti ta'asang.”

21

Mandur Kadägesa

¹ Yasuwa jenggerecce tä axä tämed tä Kaläg na kox känggi kadan-gandeng gawdadas wegkanagi kabegse nangang tä kaxsä cokonu yawgä weg tä Kaläg. ² Na mändey mägox mandursa wiwandäng gawa enggä ariyaliny pädax tä kaxsä nya cokoni. ³ Na mänge ka, “Aläpedäng zänggä nga tanggo, lala päxä me wiygong näs manduranang nyang gawa wegke kamo'du kän kä'dayang. ⁴ Xa känggong kä'day kabegsekang kabag weg tä zänggä wegkä tangandägka ndä toga, yä ce satäng täce kätogo'dog song yä cabag kä'day cadoga tä Kaläg.”

Bolugi Läpedäng Sanydä Owang

⁵ Xongenendäng känatäng legecce tä ngakä axä tämed tä Kaläg, tä wegki kabastäning na nganyugi wuxeccä täwang axang na wegkä beged, na Yasuwa ngade täsa ka, ⁶ “Gang anggo nycuccang jenggeredeng wegkong xa owandäng wunodung kax ngayicca tenggelecece täza wayanandäng song, säcobatasa täzäg kä'day!”

⁷ Na samän Yasuwa ka, “Me bälidic, sangakong bägälic kälegeyang sogoduno ogey? Na oxadiyang layis boluge läpedäng ka ngakong sogoduningang?”

⁸ Na mänge täsa ka, “Meskädäning xa acaka sänanangey anggo xa kulung känatäng mange wunosung nanange anggo nagang, ngadeccä ka, ‘Agänang anäs Almasiyang,’ ndä kala, ‘Sanydä ow kawung.’ Acaka anggo ndängeng ngakäsa! ⁹ Ndä kändängeng pogud na keley na kamatang, ndakä nyigatäg men anggo. Xa basa ngakong wuno kayesäno täzälägäne tä loydägkä ow. Ndä sanydä ow wunodung tetex song.”

Cäläxtigä Menggä Räbkä Yasuwa

¹⁰ Yasuwa ngade ka, “Pogud ngäsata tä cabärta, ndä buguninginy pogo ngastänga. ¹¹ Ndä mändey wäxäd na buxu na täxäd wunosung 'da'de ota mange ndä nyigatäg mene kän na mändey tädäxtäg na bolu päkätäsäng tiyati.

¹² “Ndey ka ngakong kä'day sogoduno, sä'docco täzälägäne sämen anggo säcäläxti anggo na sämenedes anggo tä asänggä menggä axä paliccä Yaxudiny na särikidis anggo tä ax. Sägodung anggo tagä buguninginy na tagä turuginy xa anggo kämeneng ngakang. ¹³ Ndä xongondeneri layis akäsog tanggo ndey läpeng ngakang. ¹⁴ Ndakä gäredeng 'doga noccang legedeng tagä buguninginy ndey ka mäxising nang. ¹⁵ Xa agä anoco alägi anggo na turaydey tä 'doga noccang legedeng ndey ndakä menggä kurugo mo'du anggo.

¹⁶ “Menggägo na enggä bonggo, na wayakägo na biskodagägo 'docco menedes anggo de sogo kulung acänggägo säpaxe. ¹⁷ Na mändey kän kä'day 'docco saxe anggo xa anggo kämeneng ngakang. ¹⁸ Neng tä ngakong kä'day, 'doga zegeledäng rongiccägondäng song. ¹⁹ Ndä mäganyä padätätkägo tä ngakang sogo anggo liliccing ur'dug.”

Ursalim Wanyiswa

²⁰ “Neng xonga känoxang Ursalim kagukuriwa na asägaruwang, ndey kala bäleng ka wanyiske kawuno käsac. ²¹ Ndä känggi tä cabärä Yaxudiyang basa oyasa tä zänggä cabärta. Mändey känggi tä kaxsä Ursalimang, wulageccä ndä känggi tunyang ndakä läsa, ²² xa sa sänggi Kaläg cäläxti menggä Ursalim tängang, nyang ndey ngaki gärekäresänong 'desesaning.

²³ “Ndä tänya xondi kawungang woyoy tä uxugi kä'dosuning na 'deyeceng! Xa todi kän zäyazäyangedäning täzäg na bälede xuxubtäg. ²⁴ Sädelgetese ta asänggä menggä salu na menäs sa cäläxiny tä warä kän. Känggi näs Yaxudiny songang 'docco paxatasa Ursalim na teretereje basa xongondäsa 'desedeswa.”

Wunakä Pächä Käxa Jul

²⁵ “Ow kawungang, noxadang bolu tä xong tä asämex na tä nyinyiwes ndä kän kä'day täzäg wiyazeccä na käre ngakä xuduxudigä colonggo na dampajeygä ma. ²⁶ Nyigatäg mene kän togada tä woldoxey tä 'dogi sägox wunodung tä walangiccang, xa panggudugki tiyating kala gi'dikidäning seley.

²⁷ “Na kala kän oxo agä, Pächä Käxa Jul ampagacca tä däminggaru na panggudug na tädäxtic. ²⁸ Neng wegkong kasogunongang, ngusosäning bolosuning na mäganyä padätäg xa kala 'dakiccägo kacecce'deyze ngäte.”

Seredäniccä Etä 'Dami

²⁹ Yasuwa kaser nga täsa ka, “Lala etä 'dami na kulung ewegong bägäliccakang. ³⁰ Känoxang wungga lilixiccing, na bäledeng ka kala wiwilis ngäte. ³¹ Mändey känoxang ngakong sogoduningang kala bäli ka bugundugku Kaläg kasextesäng. ³² Aläpedäng zänggä nga tanggo ka menggä zong äxseccä song basa ngakong soguno. ³³ Zäkoxa na täzäg 'desetäsäno yä legeygang wayecccä song.

Nycicci Palecci

³⁴ “Mesekädäning ndey acaka mäganyägo pägäni ndaldänang tä tawustäg na tä wuxid de bux paxe anggo, na kärekä ngakä aygägo ndä acaka sanydä ow wung ndä kurumusa anggo kala kadäbäx. ³⁵ Xa nya xongondi wunodung karamedäng känggong kä'day täzäkgang. ³⁶ Wadi layesi kängga cuccu cagiyang na palecci ndey layang mpädägänyang ndey mäxäsing ngaki kä'day wunosung sagoduningang ndey ndokalang tagang agä, Pächä Käxa Jul.”

³⁷ Todotol Yasuwa bäldecce tä kaxsä kaldagä axä tämed tä Kaläg ndä ongutang mä'do mäccu tä Cabärä Zayitun. ³⁸ Ndä kän kä'day loxto ow wunotäsäno täma tä kaxsä kaldä axä tämed tä Kaläg tä dänggä bäldiccäma.

¹ Xongondi Tanyaranä Raxifta Säwacce Song, ani säbangäs Pärkitang, kawung käsac. ² Na bazuwinyä menggä tämed tä Kaläg na menggä lelericä asiriyenä Musa nyame rakawza ndey ka paxäs Yasuwa ndä sänyigate kän neng säpaye säpax ma na raj.

³ Na Däniye kadel tä wang nuxu accä känggämagi mägäligä asiny wang pädaxang, ani säbangäs Yaxusa Iskariyuti. ⁴ Mägä'doc mabodsa na bazuwinyä tämed na ngotorpugi meske axä tämed tä Kaläggang ndey ka mämene Yasuwa täsa. ⁵ Na wadäggäsa kalaye tidiny sagixi ka sädogada ariyaliny täma. ⁶ Na kala sägaxsä ngakäsa na ma. Na ma Yaxusa mägä'doc mänyame rakaw ndey mämenenäs Yasuwa täsa tä owda xä'dä wundung täng.

Deleyä Pärkid

⁷ Kala xongondi Tanyaranä Raxifta Säwacce Songang kawung ndey ka Säpärkisi na sädämze na päxä dopolog. ⁸ Na kala Yasuwa kayaxsa Putros na Yoxana, läpede täsa ka, “Wesi ndele Pärkid ndey wunig siysig täng.”

⁹ Na sängadeccä täma ka, “Owda keyang mpaye anoccig andeleyig tangang?”

¹⁰ Na mabuc täsa ka, “Ndänge, känoxang käläsang kaxsä pang 'doadang apangandäng poko pete päse ma. 'Dorkäda ma tä pani mä'doc mäläsang, ¹¹ na lapi tä ledä pa ka, ‘Me bälädic kayaxsä was tägi ka wa amänig gi ka axä palangaski mäwunodung Säpärkicci täng na menggä räbkäma na säsiyzang nyandi?’ ¹² Mä'do mäläpedäng apanggä axandäng tiyati na ka'dika'dinä kaxse, wesi ndele wexekägo todi.”

¹³ Na kala sägä'docco sa'doxa sangaki Yasuwa kaläpe täsang, na sägädeley Pärkid täng.

Siyaki Yasuwa Kasiy na Menggä Räbke ndey Niminäs Mang

¹⁴ Kala sanä Pärkid kawung, Na Yasuwa käd'oc kagur siyad na känggi mägäligäng. ¹⁵ Na mängade täsa ka, “Wanang tidi xa kalängädi tä siyakä siyakä Pärkidkong nanggo xa kala sä'docco säcäläxti agä tä bange. ¹⁶ Ndä aläpedäng tanggo ka agä asiye Pärkid nanggo mändey song basa ngaki Kaläg kayaxsäng agä tangang 'desesäning layis wega tä bugundugku Kaläg.”

¹⁷ Na mabag päxä kobox päse malog Kaläg mängade ka, “Mene dugi na'anggägo. ¹⁸ Aläpedäng tanggo ka xongondong sanydangang tä wuxikä magä adilu basa bugundugku Kaläg wuno.”

¹⁹ Na mändey mabag raxif malog Kaläg ndä mäbeny mädogä täsa mängade ka, “Yanä wanangang kadogung tanggo. Zogada adinong mänang ndey nimidänang agä nang.” ²⁰ Kala sasiyza na mabag päxä kobox, mängade ka, “Päxä koboxsä tamiccanggong coladaswa tanggong, nyang layis axäska warändi tanggo na Kaläggang.”*

Paränakä MäganYGäwan Tunyu

²¹ Yasuwa ngade täsa ka, “Lala, käxi 'doc menedes agäng andenenang nagä tä tumunu siyad ganang. ²² Agä, Päxä Käxa Jul a'docco anäxse kala ngaki Kaläg kabogkasang ndä woyoy ta apangzi menedes agäng!”

²³ Na todi sadelese tä mänekä ngastänggäsa ka xänang seley 'docco sogo ngakongang.

* **22:20** Axäski layis kākä boxinyganang sag kän tämeccä na oxayda ndey ka cay ngaka tasiny tangang.

²⁴ Na sawaläte ka xänang tä waräsa ngake tädäxiny mo'do acängganang. ²⁵ Na kala Yasuwa ngade täsa ka, "Buguninginy na ngotorpugu känggi näs Yaxudiny songang cäläxti kân ndä dalacca ka apoccu. ²⁶ Ndä anggo kändäppang ka layang ka'das sa song, wadi käxi tä warägo ngake tädäxiny kamo'du acängganang, bokasa ngase täzäg na ngotorpo lay kala me wexed. ²⁷ Xänang ngake tädäxiny mo'do accanang, käxi kacca bene siyatang, wala käxi wexe siyatang? Wadi käxi kacca bene siyatang kädäppa ka nyaza ngake tädäxinyang. Neng agänang tä warägo ka'das käxi wexecceng.

²⁸ "Anggog tol kändokalang nagä tä läbang. ²⁹ Nenyang agä adogodung butug tango ka'das togunakenegi appanang kadogunäs tagäng, ³⁰ ndey guring siyad tä owdu bugundugkang ndä nycatetäsänang tä komzu bugundug menedeng caxsänggä Israyilinygi asiny wang pädaxang."

³¹ Na Yasuwa ngade ta Saman Putros ka, "Saman, Saman, dänge! Däniye kăpaydä ka läbä anggo na'anggägo ndä Kaläg kă'daka, ndä Däniye 'do pede anggo kala pedeki me pelow pededenäs nyadanä gärwec täpoxang.

³² Neng agä kapaleyza tägi Saman, xa ndakä menekä ngakägi tagä 'dexäning. Xongonda kămeley mägaxsäging, pädäti enggä bonggugo."

³³ Neng Putros ngade täma ka, "Bazuwec, kax ka wi, na agä ano nagi tä ax na tä xäs!" ³⁴ Na Yasuwa kămeley täma ka, "Putros dänge, ndey ka tä kesekä ow modolong logo, gi n'do gäli agä taxä kodos ka 'di agä."

³⁵ Na Yasuwa ngade täsa ka, "Ani kayaxsanäs anggo tä wexed ndä alăpănäs tango ka ndakä bagang ariyaliny mange nanggo na meldänä wedäg na 'dataginy axinyga pädaxang, päx nuxu 'dogkandäng kă'disä tango?" Sabuc ka, "A'a, päx 'doga kă'disändäng song." ³⁶ Na mângade täsa ka, "Neng gang kăxa tango ndarudigä ariyaliny tängang bag na mändey bag meldänä wedäg. Ndä kăxa saläne täng songang, nganya tandäne, nganyäs salä. ³⁷ Alăpedäng tango ka ngaki menggä logey gärekäreja tä ngakangang, basa 'desesuno. 'Ndä kân bangäs agä märing.' Xa ngaki menggä logey gärekäreja ka soguno tagäng kala sogoduno." ³⁸ Na menggä räbkăma ngadeccä täma ka, "Za, Bazuwec, saluwakang todong pädax." Na Yasuwa läpede täsa ka, "Mangeccä."

Yasuwa Kapaleyza tä Cabärä Zayitun

³⁹ Yasuwa kawetä ka'das ani todotolang kă'doc tä Cabärä Zayitun, na menggä räbkăma kabag bangăma. ⁴⁰ Săgăcoqu ow na mälăpede tä menggä räbkăma ka, "Palecci ndey Däniye kälăbä anggong degeng."

⁴¹ Na masexte mägä'doc mägădukurusa măpalacca ka, ⁴² "Appa, kănox gixisang, ampaye gi xony agä tä akăsogu cälăxtigong awededes tängang. Yä näs giza kămpaydäs agäng, wanga soguning na ngakägi xa na ngakang song." ⁴³ Na malayika kăpătäng tiyati kăpădäti ma. ⁴⁴ Tä zänggä paleygămagi măpalacca na ză'diriy na mapaleydcăca paccey seley dexă modiccăma tälăbe täzäg ka'das tamic.

⁴⁵ Ani mângăsanäs tä paliccang mägămele ta menggä räbkăma ma'doxas sa sapăgini tä kuniy de sasändăcco. ⁴⁶ Na mângade täsa ka, "Oxadi sängadangang? Ngăsosuning! Palezi ndey Däniye kälăbä anggong degeng!"

Menekä Yasuwa

⁴⁷ Ani musku mălegeccenäs tăsang, nuxu me räbkămani săbăngăs Yaxusang kaleza koyo xă'dä na kă'doc kawu'dakas Yasuwa kăbuciy.

⁴⁸ Neng Yasuwa ngade täma ka, "Yaxusa, gi gang menedes agä, Păxă Kăxa Jul na bucigong?"

⁴⁹ Kulung menggä räbkä Yasuwagi nangang kox 'dogi paye sogkuwang, na ngadeccä ka, "Bazuwec, mpaye was wa ampogig nycokong na salugusko?" ⁵⁰ Na nuxu me räbkäma kajede wundä abaniccä cäläxsä ngotorponu axä tämed tä Kaläg täpox. ⁵¹ Neng Yasuwa ngade ta menggä räbke ka, "Ndokolosi mänang!" Na Yasuwa käläbä wundä cäläx kämele täng na kalay apo.

⁵² Na Yasuwa ngade ta bazuwinyä axä tämed tä Kaläg na ngotorpugu megäskä axä tämed na ngondowinyä Yaxudinyi kawuno tä menekä mang ka, "Anggo käsagang tagä na salu na gany dexä ka'das ka agä anäs märing? ⁵³ Agä kanyu nanggo tä kaxsä kaldä axä tämed todotol ndä päx tä nuxung kämeneng agä song. Neng ongudong xongondugong na xongondu butugku lätag!"

Putros Kagil Yasuwa

⁵⁴ Kala samen Yasuwa samagas tagäsa sagoyas tä pang ngotorponu axä tämed tä Kaläg. Yä Putros räbto sa ndä lewa täxandäxang. ⁵⁵ Kulung kän kadox mas tä pidinä kaxsä kal pagedäning na Putros kä'doc kacca tä waräsa pagewa. ⁵⁶ Na päxä uxandäng näs me wexed kox ma tä banyiccä mas na kajenggerey ma ngade ka, "Apangzong nyang na Yasuwa seley!" ⁵⁷ Neng Putros kagil ngade ka, "Ama kuxong, ayex ma säxong!"

⁵⁸ Sax mändey tä bälaxtäg, nuxu accäsandäng kox ma na ngade täma ka, "Gining mändey näs nuxu me räbkä Yasuwa." Neng Putros ngade ka, "Amo, agänang song!"

⁵⁹ Sägäcudisi mäna'ang na nuxu kig kalewa ka, "Kax ka wi, na 'doxtangang na Yasuwa, xa ma mändey mäs me Calil." ⁶⁰ Neng Putros kämeley täma ka, "Amo, ayex 'dogani legeng song!" Na tänya owdi musku tä zänggä legeygäma, modolong kalog. ⁶¹ Na kala Yasuwa Bazuwec kawexeswa kalala Putros kätég na Putros kagäräng ngaki Bazuwec kalogey tämang, ka, "Ndey ka tä kesekä ow modolong logo, gi n'do gäli agä taxä kodos." ⁶² Na Putros koya tunyu kangey paccey.

⁶³ Na kala apangaski kamen Yasuwang kadeb ngobku Yasuwa ndä bade.

⁶⁴ Sägaxsä agäma ndä sämäne ma tetedetex ka, "Logeyzi! Xänang kadä ging?" ⁶⁵ Na mändey sägäcemdä ma.

Sagoya Yasuwa tagä Ngotorpugä Yaxudiny

⁶⁶ Ani ow kagezänäsang, bazuwinyä axä tämed tä Kaläg na menggä lelericcä asiriyenä Musa kudurisuno. Apangaski kamen Yasuwang kagoying ma ta ngotorpugä Yaxudiny. ⁶⁷ Sängadeccä täma ka, "Känox näs Almasiyang, läpäng täwas." Neng Yasuwa ngade täsa ka, "Kax aläpäng tanggo, na gixiding song, ⁶⁸ ndä kax amän anggo na bucing song. ⁶⁹ Neng bälä ka xongondong na tä bange kä'day, agä Päxä Käxa Jul, anoco anycata tä andä abaniccä Kalägi panggudug tängang." ⁷⁰ Na kala na'anggäsa sängadeccä täma ka, "Neng giningang näs päxä Kaläkgang?" Na mabuc täsa ka, "Axeneng, anggo ngadaccang ka agäng." ⁷¹ Na sängadeccä ka, "Käxa mändey payedig ndey ka mänigkandäng song. Xa kog kädängig na wunggog tä ikäma!"

23

Samenes Yasuwa ta Pälätis

¹ Ngotorpugä Yaxudiny kangusosuno kagoya Yasuwa ta Pälätis. ² Sägäli täma ka, "Wa kamenig 'doxtang woko kän ka sog pogud na ka wang yawgä tuluba ta Kaysar na mägasada tä ngasäma ka ma mäs Almasi buguning."

³ Na Pälatis kamän Yasuwa ka, “Giningang näs buguningzä Yaxudinyang?” Na Yasuwa kämeley täma ka, “Axeneng, gi kangad mänang.”

⁴ Na Pälatis ngade ta bazuwinyä axä tämed tä Kaläg na xä'dä ka, “Ka'dox 'doga tasta de ka giling nga nang tä 'doxtong song.”

⁵ Neng saleyning sägadeccä ka, “Ma mabälde kän mäwoko bägälic tä kaxsä Yaxudiya. Madeb tä Calil ndä mäccogu owdong nang!”

⁶ Ani Pälatis kädängäs ngakiyang, kamänze ka cong Yasuwa näs me Calilang. ⁷ Pälatis kabäle ka Yasuwa kápätäng Calil ndä Xirudusang näs bazuweccä Calilang, na mayaxsas Yasuwa ta Xirudus xa nya xongongi Xirudusandäng tä Ürsalim.

⁸ Ani Xirudus koxus Yasuwang wanäma kalay tidi paccey xa mandäng mäbenecce ka mäpaye mox Yasuwa, xa mägädängdä sälege ngakä Yasuwa ndä mäpaye ka mox boliccä were wexeki Yasuwa wexeng.

⁹ Xirudus kamändä Yasuwa nano. Neng Yasuwa kabuc täma song. ¹⁰ Ndä bazuwinyä axä tämed tä Kaläg na menggä lelericcä asiriyenä Musa satäng tänya owdi dokoloccu, kaleyning kilidi nga täma. ¹¹ Na todi Xirudus na asägarugu megäske kangobtu Yasuwa ndä lagä ma na tandugu butug ndä meles ma ta Pälatis. ¹² Na tänya xongondi Xirudus na Pälatis kalayenäs aminu xa kalaygädä säs menggä kur.

Sagoyas Yasuwa tagä Xä'dä

¹³ Pälatis kabandä bazuwinyä axä tämed tä Kaläg na ngotorpugä Yaxudiny na kän, ¹⁴ mäläpede täsa ka, “Anggo goynang 'doxtong tagä ka wanyis kän. Ndä kamändä ma tagägo ndä 'doga ka'dox täma tasandäng näs 'dogi anggo giling täma ka mäsongdäng song. ¹⁵ Ndä wala Xirudus ka'dox nuxu 'doga tas täma, nenyang mägämeleyäng ma tägogkang. Za, ma masog 'doga de ka säpaxe ma täng song. ¹⁶⁻¹⁷ Gang adogadas ma säbade ma na ke'diccä oxay ndä kala a'dakas ma.”

¹⁸ Neng sägädwasa na'anggäsa ka, “Baga 'doxtong paxa! Yä 'daki Parapas täwas!” ¹⁹ Parapas apangza sägäräki tä axang xa kageley ngase pogo turugsä Rumandi kamen Ürsalimang ndä kapaxsa. ²⁰ Pälatis kalegeyze täsa mändey tä ngakä Yasuwa xa mäpaye mä'dakas Yasuwa.

²¹ Neng saleyning sädaweccä ka, “Nggadi ma tä kalic, nggadi ma tä kalic!”

²² Pälatis kälasä taxä kodeseneni ngade täsa ka, “Xanya? Oxadi masog tasang? Agä ka'dox 'doga ma masog tas kädäppa ka apax ma täng song. Agängang adogadas ma säbade ma na ke'diccä oxay winy ndä a'dakas ma.”

²³ Neng musku saleyno na daw ka sägadas ma tä kalic. Na mägädänge täsa. ²⁴ Kala Pälatis kagixi 'dogi säpayeng na kä'dakas Yasuwa ka säpax.

²⁵ Na mägä'daka 'doxti säbangäs Parapas sägäräki tä ax xa kageley ngase pogo turug na kapaxsang yä macananga madoga Yasuwa ka säpax xa kän paye mänang.

Gadeygä Yasuwa tä Kalic

²⁶ Ani sabokunäs Yasuwa tunyang, sägäpasasa na Samandi näs me Sayrunang. Kápätäng tä xining ka läso Ürsalim na sägänagey sägäpoka kalic tä ngase ka 'dorkädä bangä Yasuwa nang. ²⁷ Na kän kawuno mange kabag bangäsa, ndä tä warä sa kanggi uxuwatäng kunuccu na ngeccä tä ngakä Yasuwa.

²⁸ Neng Yasuwa gaw ze läpede täsa ka, “Anggo uxugu Ürsalim, wanga ngeyig tä ngakang, wadi ngeyi tä ngakä ngastänggägo na tä enggenggägo.

²⁹ Xa ngakong ngaletäsäno, seley owda tasandäng wunodung ndä kän 'docco ngadeccä ka, 'Baxändäg ta pixu na kuxtugi taxä nuxu kápoku pipi

songang na ki'digi kă'deyze songang!" ³⁰ Ndă nya owda tasti kawungang, kăn 'docco ngadeccă tă cabărta ka, 'Delesăning tă zănggăsko!' na tă cobocoboriny ka, 'Măxosuning nawas tăzăg!' ³¹ Gang kăn kasog ngakong tă eta musku tuduwinyang, oxadi sogowa tă eta kamasăng?"

³² Kulung măringinyatăng pădax sabokung tunyu ndey ka să'doc săpax na Yasuwa. ³³ Ani săgăcogus owdi săpaxe kăn tăng săbangăs "owdu zănggă kăngga kăxseng", săgă'docco săgadas ma ta kalic na măndey măringinygi săgadas tă kăna. Nuxu ta cengiccă abaniccăma na nuxu tă cengiccă nyogoldăma. ³⁴ Neng Yasuwa ngade ka, "Appa, wangi tăsa xa săyex ngakong săsogong song." Na sa asăgarugi gadas Yasuwa tă kaliccang săgă'docco săgăcasăng sawany atapayu ndey sălartăs tandugu Yasuwa.

³⁵ Kăn kădokolo lale ma, na măndeng ngotorpugă Yaxudiny kădegejeydă ma ngadeccă tăma ka, "Ma maxonydă kăn. Wanga ma măxony ngasăma ka cong măs Almasină Kalăgkang, ani Kalăg kayaxsăng nuxungang!" ³⁶ Măndey asăgaru kăngobtă ma ndă 'docco toga buxka kawace tăma ka măwux ³⁷ ndă ngadeccă tăma ka, "Yex ngasăgi ka năs buguningză Yaxudinyang, xonya ngasăgi!" ³⁸ Badaxiccandăng săgărekărejeze tăng tă owdu zăma ngade ka, "Buguningză Yaxudinyanang."

³⁹ Nuxung măringzi săgadasa tă cengiccămang kalegeyze tăma năs langad ngade ka, "Gi năs Almasi song? Ata xony ngasăgi na xony was!"

⁴⁰ Neng măringzi nuxungang kadux nya accanani ngade ka, "Gi nyigate Kalăg song? Noxo kogkakang na'anggog tă zănggă xăs. ⁴¹ Tă ngakog tireneng xa kog kăsogig ngaka siye kog, yă 'doxiong kasog nuxung 'doga tas song." ⁴² Na mawetăde na legey măngade ka, "Yasuwa, kănox kănoc tă butugkuging wanga agăgi wayesăng tagă." ⁴³ Na Yasuwa ngade tăma ka, "Alăpedăng zănggă nga tăgi, xongondong agănanang nagi 'doccig tă Pang Kalăg tiyati."

⁴⁴ Ani xong kawunăs tă piding, ow kălămaswa tăng băgălic kasog sada kodos, ⁴⁵ xa xong kădărăndă. Na tandănă akăsogaldă axă tămed tă Kalăg kacereswa tă pidi kălarăswa pădax. ⁴⁶ Na kala Yasuwa, kabandăsa paccey ka, "Appa, agă ka'daka ligidang tă andăgi kala!" Ani mangadăs ngakiyang na măgănungis sanydă nunggăma.

⁴⁷ Ngotorponu asăgarugu Roman kox 'dogi kasogkuwang, na kădădăxti Kalăg ngade ka, "Pezăngga 'doxiong kăxa lelexang!" ⁴⁸ Na kala xă'dăni dokoloccu kox 'dogi kasogkuwang, kămele tă pa na zăngay. ⁴⁹ Na kănggi kă'day yex Yasuwang kădokolo tăxande na uxugi kărăbkădă bangă Yasuwa cawu Calilang kox 'dogi kasogkuwang.

Bosku Yasuwa

⁵⁰ Apangandăng săbangăs Yusif nuxung ngotorponu Yaxudinyang, ndă kăxa lelexang. ⁵¹ Ndă ma măpaye 'dogi nycoki kawex ta Yasuwang song. Ma măs me bo pana săbangăs Armataya tă cabără Yaxudiya ndă măbene bugundugku Kalăg.

⁵² Yusif kă'doc ta Pălatis ka toga wană Yasuwa tăma. ⁵³ Na Pălatis kagixi kadogas ma ka mă'doc măcoccoley wană Yasuwa. Na kala mamulungi na darnase măgă'doc măgălola taxă morogsa sadotogey tă ngayic ndă kax taxă nuxung sabosu kig tăng song. ⁵⁴ Ndă nya xongondeneni xongondu deleygă wexetang xa xongondu Sapid ngăte.

⁵⁵ Uxugi kabag bangă Yasuwa cawu Calilang, kă'docco tă bangă Yusif kăsay morog na bokosănaki sabokasanăs wană Yasuwang. ⁵⁶ Na săgămele

tä pa sägä'docco sägädeley may na midä mäs. Na sägänunducco tä xongondu Sapid xa asiriye Musa kangad mänang.

24

Ngäsakä Yasuwa tä Xäs

¹ Xongondi tä bangä xongondu Sapitang, tä kesekä ow uxuwatäng kä'docco tä copku morog koyo mäsäsi sägädeleyang. ² Säga'docco sa'doxa kädandafi gärenggärengeswa tä cengic, ³ ani sägä'docconäs saläsäs axä morogkang, sa'doxa wanä Bazuwec Yasuwa wundung taxä morog.

⁴ Na sägädongasa sägäre ngakä 'dogi kasogkuwang, na tetex apanginy pädax kawayesäno kälagä tanduga dulatulajecä kädokolo tä wadäkasa. ⁵ Na nyigatäg kadeles sa uxugi de kädukuruso täzäg neng sa apanginygi pädaxang ngadeccä täsa ka, "Oxadi siye anggo nyamadang käxa oxacca tä warä kängga käxseng?" ⁶ Mandäng todong song, mabägäng tä xäs! Nimäning ngaki maläpäng tanggo tä cukuma tä Calilang, ⁷ aki ka Päxä Käxa Jul basa sä'docco sämenes tä asänggä kängga tasiny ndey gadas ma tä kalic, na tä sängädi sogo kodoseneng, mängäsata tä xäs."

⁸ Na sa uxugi sägaräng legeygi Yasuwa kalegey täsang, ⁹ na sägämele na morog sägä'docco saläpe ngaki kä'day kasogunong ta känggi Yasuwa käligä asiny wang nuxungang na tä kulung känggi tängang. ¹⁰ Sa uxugi kox ngakiyang Mariyom Macidalinang na Xana na Mariyom bo Yaxupag na kulung uxugi nasang sag kaläpe ngaki tä känggi Yasuwa käligäng. ¹¹ Neng ngaki uxugi kăcopu morog kaläpe täsang samen song xa säläleyis degejey winy.

¹² Na Putros kangäsa koy kä'doc kälim morog ka'doxa darnaseni samulungis Yasuwang winy. Na mägämel tä pa mägäbabangwa tä ngaki kasogunong.

Yasuwa Kaparaswa tä Menggä Räkbe Pädax

¹³ Tänya xongondi menggä räbkä Yasuwagi pädaxang wedetese tä päxä cabära säbangäs Imawus, ndä kä'dalangaswa bate sada pädax na Ursalim. ¹⁴ Ndä sälege ngakä wegki kä'day kasoguning ta Yasuwang. ¹⁵ Na tä zänggä legeygäsagi, Yasuwa kacubugiswa täsa wedeccä nasa ¹⁶ neng agäsa kamägäning sabäles ma song.

¹⁷ Na Yasuwa kangada täsa ka, "Legeygiyakang legedeng ndä wedetese-sengang?" Na käkäräb sägädokalasa sägänyonyey agäsa.

¹⁸ Na nuxung accäsani age ka Kiloppasang kabuc täma ka, "Giningang watäkägi näs palangasic tä Ursalim tä enggä sänggongang dexä 'di ngaki kasogunong?" ¹⁹ Na mängade täsa ka, "Ngaka keyag?"

Na sabuc täma ka, "Dogi kasogkuwa ta Yasuwa me Nasrang. 'Doxteneni Kaläg kadoga pangdudug täng na wexed na legey kasog kabälesäwa ka me logeygä Kaläkgang kayaxsäng tä kän kä'day, ²⁰ ndä bazuwinygä axä tämed tä Kaläg na ngotorpugusko kamenes ma sägadas ma tä kalic ndä säpax ma. ²¹ Yä was wakabokosunig ka mang mäs Almasini kawung ndey ka xony Israyilang. Ndä ganang seley ngakong kala satäng säng pädax ndä kodosenenang. ²² Ndä mändey kulung uxugi tä waräskong kabal mägangyusko ow tudizong xa saloxtu ow sägä'docco tä morog. ²³ Säga'docco sa'doxa ngaccä wanäma song na sawuno saläpäng täwas ka sägox malayikada läpede täsa ka moxacca. ²⁴ Ndä kulung

känggi nawasang kä'docco tä morog ka'doxa sangaki saläpäng täwasang kalayenäs wega ndä sägox ma song.”

²⁵ Na Yasuwa ngade täsa ka, “Ama kängga kamanande, oxadi mäganygägo päpaxiny tä menekä ngakä menggä logeygi kalegeyze tanggong! ²⁶ Anggo käbäleng ka basa Almasi cäläxtiwa ndey sädädäxti song?” ²⁷ Na madeb geneygä ngakä me logey Musa na menggä logeygi kä'dayang, mägene kä'day ngaki garekärejesäno tä ngakä ngasäma tä kaxsä Sorunu Kaläggkang.

²⁸ Ani sawunonäs käsac tä wang päxä cabarang, Yasuwa kasoguswa käxa paye warä päxä cabär, ²⁹ neng sapappaledä ma ka mä'doc mälay nasa xa ow kamo'dsa. Na kala mägä'doc nasa.

³⁰ Ani magurus siyad nasang, mabag raxif, malog Kaläg ndä mäbeny, ndä mälarä täsa. ³¹ Na todi agäsa kalengsäning, na sajenggerey ma sabäles ma. Na käkäräb mägä'duywa täsa. ³² Na sängadeccä tä ngastänggäsa ka, “Yä päx mäganygog kalaye tidiny tä ngaki kä'dang mägene tägog tä akäsog näs käkä Sorunu Kaläggkang song?”

³³ Na tänya owdi sägämelese tä Ursalim. Säga'docco sa'doxas känggämagi mägäligä asiny wang nuxungang na kulung känggi todiyang kudurisuno ³⁴ na sa känggi sa'doxa kädurisunong läpede täsa ka, “Nästire Bazuwec kangäsa tä xäs, de maparaswa ta Saman Putros!” ³⁵ Na sagi pädaxang mändey sadedebeyde ngaki kasoguno täsa tä akäsogkang, na benyeki mabenysis raxif de sabälänäs mang.

Yasuwa Kaparaswa tä Menggä Räbke

³⁶ Ani menggä räbkä Yasuwa legeyis ngakämang, ma Yasuwa täzäma magayasawa tä waräsa mängade täsa ka, “Amodo anggo.” ³⁷ Neng sägox ma na mäganygäsa kabal sa na nyigatäg kamen sa soxo ka sägox arälodic.

³⁸ Na mängade täsa ka, “Oxadi siye anggo nyägadänyang na basadang mäganygägon? ³⁹ Lala asänggang na badagä exenggang, agänangang! Läbe wanang na lala, arälodic yandäng tä wane na ngay song yä lalang agä gang anggo noxadang ngayakang tä wanang na ya.” ⁴⁰ Ani malegeyis legegongang, madoga badadagä exenggäma na asänggäma ka säzay.

⁴¹ Ndä musku säcukuludäning samen ngaki mangatang song xa wadäkäsa tidiny tä oxakäma de sägädongo. Na mamän sa ka, “'Doga siyewa tanggo todongandäng päx?” ⁴² Na tetex sabag axsicca käbux sadoga täma ⁴³ na mabag masiy tagäsa tänya owdi.

⁴⁴ Na mängade tä menggä räbke ka, “Ngakanggongag kaläpäng tanggo ani musku cucusig nanggong, ka ngaki kä'day garekärejesäno tä ngakang tä asiriyenä Musa na tä sorunu menggä logey na tä Sorunu Masmurang ka bal päsesäwa.”

⁴⁵ Na malenge zänggäsa ndey ka säbäle ngakä Sorunu Kaläg, ⁴⁶ ndä mängade täsa ka, “Sägädokoley garekärejey tä Sorunu Kaläg ka Almasi bal cäläxtiwa ndä äxsä ndä ngäsa tä xäs tä sängädi kodosang. ⁴⁷ Sädebe duwaleygä agä Almasi tä Ursalim na tä cabärta kä'day. Säduwale nga tä kän ka xajkä mäganyga tä ngaka tasiny ndey Kaläg wanga ngaka tasiny täng. ⁴⁸ Ndä anggo käzayang ngakong nagägo seley ndey läpeng tä kulung kän. ⁴⁹ Ndä gang lala, agä yaxsedäng 'dogi Appanang kangad ngakeneng. Neng nycicci tä Ursalim basa Kaläg yaxsang panggudug tanggo.”

'Dockä Yasuwa Tiyyati tä Pang Kaläg

⁵⁰ Na Yasuwa kabag menggä räbke kä'docco nang tä owda säbängäs Petani, na mayuxi asänggäma tiyati mapes sa. ⁵¹ Ani mäpesecenäsang, Kaläg kabag ma tä pane tiyati.

⁵² Na kala sägädukurusuno sägädädäxti ma. Na kala sägämelese tä Ursalim na led, ⁵³ na todotol sädädäxti Kaläg tä axä tämed tä Kaläg.